

Deuteronomio

Deuteronomio quijtosnequi “sempa quimaca nopa tlanahuatilme”. Moisés nojquiya quijcuilo ni amatlapohuali huan quipiya nopa tlamachtili catli yaya quinmacac israelitame quema quincamanalhui tlamiyacapa miyac hueltas nopona ipan tlali Moab quema ayamo calaquiyayaj ipan nopa tlali tlatencahuali. Moisés quinelnamiquiltá tlen nochí nopa huejhueyi tlanextilijcayotl catli TOTECO quinchihuiljtoya tlen quema quisque ipan tlali Egipto 40 xihuitl achtiluia. Huajca ama nopa masehualme monequiyayaj quitlacaquilise TOTECO huan quiicnelize san ya. Nopa versículos catli más tlaiximatili eltoc 6:4-6, pero 6:5 eltoc catli Tohueyiteco Jesucristo teipa quitocaxti nopa tlanahuatili catli más hueyi. Quijtohua: “Xiquicneli TOTECO ica nochí moyolo, ica nochí moalma huan ica nochí mochicahualis.”

Deuteronomio quipiya macuili partes:

Deuteronomio 1—4 Moisés achtilui quincamanalhuía nopa masehualme.

Deuteronomio 5—26 Moisés sempa quinilhuía nopa majtlactli tlanahuatili huan quintemajmatí ica catli panos sintla amo quineltocase.

Deuteronomio 27—28 Tlamachtili ica tlaque monequi quichihuase quema cala-quise ipan nopa tlali.

Deuteronomio 29—30 Moisés quiyancuila nopa camanal sencahuali.

Deuteronomio 31—34 Itlamiya camanal Moisés. Moisés quitequimacac Josué quen ipatlaca. Imituilis Moisés ipan tepetl Nebo.

Itlayacapan camanal Moisés

1 Ni amatlapohuali quipiya nopa camanal catli Moisés quinilhui nochí israelitame quema itztoyaj ipan nopa huactoc tlali ipan neca nali hueyatl Jordán para campa hualquisa tonati. Quiquetztoyaj ininyoyoncalhua ipan nopa tlamayamitl campa itoca Arabá, nechca altepetl Suf. Nopa altepetl Parán, eltoya ipan se lado huan altepeme Tofel, Labán, Hazerot huan Dizahab ipan seyoc lado huan nopa israelitame tlatlajco mocajque. 2Masque san monequi 11 tonali para masehualme ma icxinejnemica tlen tepetl Horeb^a hasta Cades Barnea sintla pano nechca tepetl Seir, 3nopa israelitame huecjajque 40 xi-

huitl ipan ojtlí para ajsise. Huan quema panotoya 40 xihuitl huan seyoc 11 metztli, ipan nopa achtilui tonal tlen nopa metztli majtlactli ipan nopa israelita calendario^b Moisés quinilhui nopa israelitame nochí ni camanalí catli TOTECO quinahuatijtoya ma quinilhui. 4Quincamanalhui quema nopa israelitame ya quitlantoyaj Tlanahuatijquetl Sehón tlen nopa amorreos catli itztoya ipan altepetl Hesbón huan Tlanahuatijquetl Og tlen tlali Basán catli itztoya ipan altepetl Astarot nechca Edrei. 5Huajca ipan nopa tonali quema nopa israelitame noja itztoyaj ipan tlali Moab huan ayamo quiixcotontoyaj nopa hueyatl Jordán, Moisés pejqui para

^a 1:2 Nopa tepetl Horeb nojquiya quitocaxtía tepetl Sinaí, pero san se tepetl. ^b 1:3 Ni tonal quemantic huetzis ipan enero huan quemantic ipan febrero ipan tocalendario tlen ama.

sempa quinilhuis nopa israelitame ni tlanahuatilme. Huan quinilhui:

6 “Quipyi 40 xihuitl TOTECO Dios technojnotzqui tiisraelitame ipan tepetl Horeb huan quijito: ‘Ya anhuecjajtoque miyac tonali ipan ni tepetl, **7** huan monequi ximocualtlalica huan xiyaca campa nopa tlachiquilme ipan inintlal nopa amorreos. Ximoaxcatitij nochi nopa tlali campa onca tlachiquilme huan nochi pilaltepetzitzti catli nechca. Nojquiya ximoaxcatica nochi tlalme ipan nopa huactoc tlali. Huan ximoaxcatica campa tepeme, huan campa tlamayamitl, huan campa nopa huactoc tlali itoca Neguev huan hasta iteno nopa Hueyi Atl Mediterráneo campa inintlal cananeos. Nojquiya ximoaxcatitij nopa tlali Líbano hasta nopa hueyatl Efrates. **8** Nimechmactilía nochi ni tlali. Huajca xiyaca huan ximocuicuilica, pampa nochi ya nopa eltoc nopa tlali catli na, niamoTECO, niquintencahuili amohuejcapan tatahua Abraham, Isaac huan Jacob para niquinmacasquía ininhuaya amojuanti catli aninteipan ixhuihua.’

Moisés quintequimacac jueces (Ex. 18:13-27)

9 “Ipan nopa tonali nojquiya na nimechilhui para na noseltzi amo nihuelis nimechyacanas nochi amojuanti, pampa anitztoque quen se tlamamali catli tlahuel etic para nihuicas noseli. **10** TOTECO Dios anmechmacatoc miyac amoconebla, huan ama tiisraelitame tiitztoque tlahuel timiyaqui quen imiyaca sitlalime ipan ilhuicactli. **11** Nojquiya nimechilhui para TOTECO Dios catli tohuejcapan tatahua quiiximatque ma anmechmiyajili seyoc mil hueltas imiyaca más que ama anitztoque, huan ma anmechtiocihua quen techtencahuilijtoc para quichihuas. **12** Pero nimechilhui para na noseltzi amo huelis nihuicas nochi amotequipachol huan amocuesol. Amo huelis nijsencahuas sesen tlamantli quema ammocuanise. **13** Más cuál xiquintlapecjenica tlacame tlen sese hueyi familia para nechpalehuise. Xiquintlapecjenica tlacame catli tlalnamiquij huan nimantzi huelis quichihuase se tlenij-

qui. Huan inijuanti niquintlalis ma anmech-yacanaca. Quej nopa nimechilhui.

14 “Huan anquijitoque: ‘Cualtitoc catli tiquijtohua.’

15 “Huajca niquintequimacac tlawayanca tlacame catli amoteiximatahaua catli anquintlapecjenitoyaj. Niquintlali tlacame catli tlalnamiquij huan cuali quichihuaj inintequi. Sequin niquintlali ma quinmocuitlahuica se mil masehualme, sequinoc 100 masehualme, sequinoc 50 masehualme huan sequinoc 10 masehualme para inijuanti ma tlatlajtolsencahuaca campa amojuanti. **16** Nojquiya niquinna-huati nopa jueces: ‘Xitetlajtolsencahuaca xitlahuac quen quinamiqui, masque se cualantli ica israelitame catli icnime o se israelita masehuali ica se catli seyoc tlali ehua. **17** Amo xiquinchicoinelica masehualme quema antetlajtolsencahuaj. Masque tlapijpiyani o catli teicneltzitzti, nochi xiquinchihuila catli xitlahuac. Amo xiquimacasica niyon se masehuali pampa antetlajtolsencahuaj ica itequiticayo Toteco Dios. Huan sintla huala se tlamantli achi ohui, ya nopa techhualiquilica, huan na nijsencahuas.’

18 “Huan ipan nopa tonali nojquiya nimechilhui miyac tlamantli catli monequi-yaya anquichihuase.

Israelitame quitlachilitoj nopa tlali (Nm. 13:1 – 14:4)

19 “Huan tiquisque tlen tepetl Horeb quen TOTECO Dios technahuati. Huan tijpanotinenque nochi nopa huactoc tlali catli tlahuel hueyi huan tlatemajmati quen anquimati. Huan tiyajque ipan tepeme campa nopa amorreos huan teipa tiajsique tlali Cades Barnea. **20** Huan quema tiajsicoj ipan inintlal nopa amorreos, nimechilhui amojuanti huan amotatahua para nopa tlali elqui catli TOTECO Dios techmacas. **21** Niquijito: ‘Xiquitaca TOTECO Dios ya quitlajitoc nopa tlali toixmelac, huajca xitlejcoa huan ximoaxcatitij pampa quej nopa techilhuijtoc. Amo ximajmahuica, niyon amo ximotzinquixtica.’

22 “Pero amotatahua hualajque nocá na huan quijitoque para achthui ma tiquin-

titlanica sequin tlacame ma techtlayacan-cuilica huan ma quiiximatij nopa tlali. Quej nopa quema mocuepasquíaj techma-chiltisquíaj tlaque ojti ma tiquitzquica huan ipan tlaque altepeme tiajsitij.

23 “Huan nijcualcajqui catli quiijtojque huan niquintitlanqui 12 tlacame, se tlacatl tlen sesen hueyi familia. 24 Huan inijuanti yajque huan tlejcoque ipan nopa tepeme huan teipa ajsitoj campa itoca Tlamaya-mitl tlen Escol. Huan campa hueli ipan no-pa tlali quiiximatitoj. 25 Huan quicuitej-que se ome cuatlastli catli oncayaya ipan nopa tlali huan techhualiquilique. Tech-nextilijke para, quena, nelía cuali nopa tlali catli TOTECO Dios techmacayaya. 26 Pero amotatahua amo quinejque cala-quise. San quitlahuelcajque nopa camana-li catli TOTECO Dios techmacac.

27 “Huan ipan ininchajchaj pejque ca-manaltij quen amo monequi huan quiijtoj-que para TOTECO amo techniceliyaya huan yeca techquixti tlen tlali Egipto para techtemactilis ininmaco ni amoreos para techtzontlamiltisquíaj. 28 Quiijtojque para amo huelise yase pampa iniicnihua catli yajtoyaj quinmajmatico huan quinilhuij-que para itztoyaj nopona más miyaqui masehualme que tojuanti. Techilhuijque para nopona itztoyaj masehualme huej-hueyi huan inialtepehua quipixque te-pamtli huejcapantic hasta ilhuicac. Nojquiya inijuanti quinitztoyaj iconehua Anac no-pona, nopa masehualme catli tlahuel huejcapantique.

29 “Pero na niquinilhui: ‘Amo ximomaj-matica huan amo xiquinimacasica. 30 TO-TECO Dios techyacantiyas huan yaya tla-huilanas por tojuanti huan quichihuas huejhueyi tlamatli quen tiquitaque tech-chihuij ipan tlali Egipto, 31 huan ipan no-chi nopa ojti ipan huactoc tlali campa amoTECO Dios techyacantiyajqui hasta nopa tonal. Quena, amoTECO Dios tech-cuapahujtoya quen se tetaj quichihuila’ ipilcone.’

32 “Pero masque quej nopa niquinilhui, amotatahua amo quineltoque icamanal TOTECO Dios, 33 yaya catli techyacantiyaj-qui huan quitlapejpenijtiyajqui sesen lu-

gar para ma tijquetztiyaca tochajchaj tlen yoyomitl ipan toojhui hasta ama. Yaya ica tlayohua techtlahuilijtinentoja ica se tli-lelemectli ipan ojti campa monequiyaya tinejnemise huan ica tonaya techyacana-yaya ica se mixtli.

TOTECO cuanqui ica nopa israelitame

(Nm. 14:20-35)

34 “Huajca quema TOTECO quicajqui catli amotatahua quiijtohuayayaj, nelía cuanqui miyac huan quiijto 35 para ni-yon se masehuali catli ya motlantoyaj ipan nopa tonal, amo huelis quiitas nopa cuali tlali catli quintencahuili ininhueca-pan tatahua. 36 TOTECO quiijto para san Caleb, icode Jefone, quena, quiitas. Huan quiijto yaya ica iconehua quiselise nopa tlali catli quitlachilito pampa yaya sen-quistoc quitoquili.

37 “Nojquiya ica catli quichijke amo-tatahua, TOTECO cuanqui noca na, ni-Moisés, huan nechilhui para amo nihuelis niajsis ipan nopa tlali tlatencahuali. 38 Pe-ro nechilhui para Josué, icode Nun, catli nechpalehuía, yaya huelis ajsis nepa. Huajca nechilhui para ma nijyolchicahua Josué pampa yaya catli anmechmajmacas nopa tlali nochí anisraelitame. 39 Huan TOTECO camanalti tlen amojuanti huan quiijto: ‘Huan amoconehua catli ayamo tleno quimachilíaj, inijuanti quiselise no-pa tlali. Huan masque anquijtohuaj para amocualancaitacahua anmechcuilisquíaj, inijuanti elise catli calaquite ipan nopa tlali catli nimechmacas para annoaxcati-se.’ Quej nopa quiijto TOTECO ipan nopa tonal.

40 “Teipa TOTECO quinilhui amotata-hua para monequi ma mocuepacá ipan no-pa huactoc tlali huan ma panoca ipan ojti catli yohui para Hueyi Atl Chichiltic.

Inincualancaitacahua quintlanque nopa israelitame

(Nm. 14:39-45)

41 “Huan nopa tonal amotatahua qui-caffque catli TOTECO quiijto huan nechil-huijque para nelía titlajtlacolchijtoyaj ica ya, huan para nimantzi yasquíaj huan tla-

huilanásquíaj quen TOTECO Dios quinna-huatijtoya. Huan amotatahua quicuique tepestli para ica tlahuilanase, huan mo-cualtlalijque para tlejcose ipan nopa te-petl para tlahuilanásquíaj. Moilhuijque para amo ohui elisquía para tlahuilanatij nopona.

42 “Pero TOTECO nechilhui ma niquinil-hui ma amo tlejcoce para tlahuilanatij pampa yaya amo itzlosquía inihuaya, huan inincualancaitacahua quinmictise.

43 “Pero masque na, niamotoTECO, ni-quinilhui amotatahua ma amo yaca, amo nechtlacaquilijque, san mohuejcapanchij-que huan yajque campa nopa tepeme. **44** Huan nopa amoreos catli itztoyaj no-pona, panquisque huan quintojocatiyaj-que amotatahua quen tetojtocatiyohuij etzame. Huan quintlanque. Huan inintla-cayohua amotatahua huetzque tlen Seir hasta Horma. **45** Huan teipa catli mocaj-que noja itztoque mocuepque mochoquili-yayaj iixpa TOTECO, pero yaya amo quitla-caquili inintequipachol. **46** Huan yeca mo-nejqui amotatahua huan nochi tojuanti tlahuel tihuejcajque para tiitztose ipan tlali Cades.

Israelitame nejnentiyyajque miyac xihuitl

2 “Teipa timocuepque campa huactoc tlali ipan nopa ojli catli yohui para nopa Chichiltic Hueyi Atl pampa quej nopa technahuati TOTECO. Huan para miyac xihuitl tijyahualojtineneque nopa tepetl Se-ir.

2 “Huan teipa TOTECO nechilhui, **3** para ya huejcajtoc san tijyahualojtinemij nopa tepetl. Nechilhui ma tiyaca ica norte, **4** huan para ma niquinilhui nopa israelita-me ma panoca ipan inintla iixhuihua Esaú catli itztoque ipan tlali Seir. Nechil-hui inijuanti techimacasiyaj, huajca monequi ma tijpiyaca miyac cuidado. **5** Monejqui ma amo tiquinpehaultica para timohuilanase pampa TOTECO amo tech-mactilijtoya niyon pilquentzi tlen inintla. Techilhui campa tlachiquil ipan tlali Seir mocahuas iniaxca iixhuihua Esaú pampa yaya quinmactilijtoya. **6** TOTECO techilhui monequi tiquincohuijisquíaj tlacualistli

huan nojquiya ma tiquincohuilica atl para tiquijise. Quena, temachtli monequi ma ti-quinxitlahuilica nochi catli tijtequihuij-que. **7** Techilhui ma tijtlacaquilica pampa yaya techtiochijtoya ipan nochi tlamantli catli tijchijtoyaj. Techmocuitlahuijtoya ipan toojhui ipan huactoc tlali huan ipan nochi nopa 40 xihuitl yaya mocajtoya to-huaya huan amo tleno techpolojtoya. No-chi ya ni nechnahuati TOTECO Dios.

8 “Huajca teipa tinejnenque huan tijpano-que inintla toicnhua catli iteipan ix-huihua Esaú ipan Seir. Huan tijcotonque nopa ojli ipan huactoc tlali catli yohui ica sur para altepeme Elat huan Ezión Geber. Huan tiyajque quentzi ica norte ipan nopa ojli ipan nopa huactoc tlali itoca Moab.

9 “Huan TOTECO nechilhui: ‘Amo xi-quincualancamacaca, niyon amo xiquin-pehaultica Moab ehuani para amo an-mechhuilanase pampa inijuanti iixhuihua Lot huan niquinmacatoc nopa tlali Ar para iniaxca. Huan amo nimechmacas niyon quentzi nopa tlali para amoaxca.’ **10** (Huejcajya nropa itztoyaj tlahuel mi-yaqui emitame, se tlamantli masehualme catli huejcapantique quen iconehua Anac. **11** Huan nopa moabitame quintocaxtiyaya nopa emitame huan iconehua Anac, ‘emi-tame o huejcapantique masehualme’. **12** Huan achtihiuya ipan tlali Seir itztoyaj nopa horeos, pero teipa iconehua Esaú quinquixtijque huan quinsemanque. Huan nropa mocajque iixhuihua Esaú ininpatlaca quen anisraelitame anquinquixtise nopa masehualme catli itztoque ipan nopa tlali catli TOTECO anmechaxcatis.)

13 “Huan teipa TOTECO techilhui ma ti-motlananaca nimantzi huan ma tiquixcotonaca nropa atlajtli itoca Zered. Huajca ti-quixcotonque nropa atlajtli.

14 “Huajca panotoya 38 xihuitl tlen quema achtihiuya tiquistejque ipan Cades Barnea hasta nropa tonal quema sempa ti-quixcotonque nropa atlajtli Zered. TOTECO tlanahuatijtoya para amo hueli timocue-pase hasta mictose nochi nropa israelita tlacame catli ya quiaxitijtoyaj 20 xihuitl huan huelque yohuj tlahuilanatij ipan nropa tonal quema amotatahua motlepanita-

que huan quijtojque para amo calaquis-quíaj ipan nopa cuali tlali. **15** Huan TOTECO amo quinelcajqui huan ichicahualis quintzontlamiltijityajqui hasta senquistoc nochí nopa tlacame catli eliyayaj amotahua mijque.

16 “Huan quema ya mictoyaj senquis-toc nochí catli quipixque xihuitl para tla-huiilanatij ipan nopa tonal huejcajya, **17** TOTECO nechnojnotzqui huan nechil-hui, **18** para ama, quena, monequi tiquix-cotonase tlali Moab huan tiyase hasta Ar. **19** Pero nechilhui quema timopantise inin-huaya nopa amonitame catli nojquiya iix-huihua Lot, para amo ma tiquincuesoca huan para amo ma tiquinpehaultica para techhuilanase. Yaya quijto para amo techmacas niyon quentzi inintlat pampa ya quinmacatoc iixhuihua Lot.” Quej nopa quijto.

20 (Huejcajya ni tlali nojquiya quiixi-matiyaya quen inintlat masehualme catli huejcapantique pampa nropa itztoyaj nropa masehualme catli nropa amonitame quintocaxtiyayaj zomzomeos. **21** Huan itz-toyaj tlahuel miyaqui nropa huejcapanti-que masehualme. Quipixque san se inin-huejcapanca quen iixhuihua Anac, pero TOTECO quintzontlamilti ica nropa amonitame huan amo quincahuili ma mocahua-ca para itztose ipan ni tlali. **22** San se tlamantli TOTECO quichijqui ica iixhuihua Esaú catli ama itztoque ipan tlali Seir. TOTECO quintzontlamiltijityajqui nropa horeos iniixpa iixhuihua Esaú para injuanti huelqui mocahuase ipan inintlat campa ama mocahuaj. **23** Nojquiya quej ni quinpanoc nropa heveos catli itztoyaj ipan alte-peme hasta Gaza. Hualajque nropa caftoreos tlen tlali Caftor huan quintzontlamilti-coj huan teipa mocajque nropa filisteos nropa.)

Huan Moisés quinilhui: **24** “Huajca TOTECO techilhui ma timotlananaca huan ma tiquisaca ma tiquixcotonaca nropa atlajtli Arnón. Techilhui para yaya tech-mactilisquia nropa Tlanahuatijquetl Sehón catli quinnahuatía amorreos ipan Hesbón. Quijto nochí itlal mocahuas tomaco para timocuijcuilise. Huajca techilhui quema

tiajsique nropa, para ma tijpehaultica tijhuilanase para huelis timoaxcatise nropa tlali. **25** Huan TOTECO quijto para ipan nropa tonal quichihuas para masehualme campa hueli ipan tlaltipactli ma pehua techimacasica. Quena, nechilhui para masehualme huihuipicase masque san para quicaquise se acajya catli camanalti tlen tojuanti tiisraelitame.

Israelitame quitlanque Tlanahuatijquetl Sehón

(Nm. 21:21-30)

26 “Huajca quema tiitztoyaj ipan huac-toe tlali catli itoca Cademot, na, niMoisés, niquintitlanqui tlacame ma quicamanal-huitij Tlanahuatijquetl Sehón para ma amo techcualanis, **27** pero ma techcahuili ma tipanose ipan itlal. Quiilhuijque para timocahuase ipan nropa hueyi ojtlí campa nochí panos. Amo tiquitzquisquíaj niyon se tlamantli. **28** Nochi tlacualistli catli tij-cuasquíaj tquincohuilisquíaj. Nojquiya nochí atl catli tiquijisquíaj nojquiya tquincohuilisquíaj. San monequiyya ma techcahuili ma tiicxinejnemise huan tipa-nose ipan nropa ojtlí ipan itlal. **29** Quiilhui-toj para ya techcahuilijque ma tijpanoca inintlat iixhuihua Esaú catli itztoque ipan Seir huan nropa moabitame catli itztoque ipan Ar. Quiilhui-toj para tojuanti tiyohuij hueyatl Jordán para tiquixcotonase huan tiajsise nropa cuali tlali catli TOTECO Dios techmaca. Quej nropa nitlatitlani ma quiil-huitij Tlanahuatijquetl Sehón.

30 “Pero amo quinejqui ma tijpanoca itlal pampa TOTECO Dios quiyoltetilijtoya para huelis quitlalis nropa Tlanahuatij-quetl amomaixco quen quichijtco ama.

31 “Huan teipa TOTECO techilhui: ‘Ya nipejtoc para njtlalis amomaco Tlanahuatijquetl Sehón ica nochí itlal. Xipehuaca ximoaxcatica pampa ya nropa catli ni-mechmaca.’

32 “Huajca Tlanahuatijquetl Sehón ica nochí imasehualhua techhuilanacoj ipan Jahaza, **33** pero TOTECO Dios techmactili tomaco para ma tiquintlanica ininhuaya nochí iconehua huan imasehualhua. **34** Huan timoaxcatijque nochí ialtepehua

huan nojquia tiquinmijmictijque nochí tlacame, sihuame huan coneme ipan sese altepetl huan amo aqui tijcajque ma itzto. 35 San timoaxcatijque nopa tlapiyalme huan nochí tlamantli catli pajpatiyo catli tijpantijque ipan nopa altepeme catli tiqntlanque.

36 “Huajca tiquintlanque nochí altepeme tlen altepetl Aroer catli mocahua nechca hueyatl Arnón huan nochí altepeme ipan tlamayamitl hasta altepetl Galaad. Nyon se altepetl amo huelqui quijiyohui totlahuinalis pampa TOTECO Dios techmactilijtoya tomaco. 37 Pero amo tiquinhuilanque amonitame. Amo tiquincuilijque inintal nechca nopa hueyatl Jaboc, niyon nopa altepeme catli eltoc campa tepeme, niyon nopa sequinoc altepeme catli TOTECO Dios technahuatijtoya amo ma tiquinhuilanaca.

Israelitame quitlanque

Tlanahuatijquetl Og

(Nm. 21:31-35)

3 “Teipa tiyajque ipan seyoc ojtli para tlali Basán para ihuaya timotlalise Tlanahuatijquetl Og. Huan yaya huan isolados nimantzi techhuilanacoj ipan pilaltzi Edrei.

2 “Huan TOTECO nechilhui: ‘Amo xiquimacasi pampa nijtlalijtoc amomaco nopa tlanahuatijquetl ihuaya nochí imasehualhua huan inintal. Huan anquintlanise quen anquichijque ica Tlanahuatijquetl Sehón catli mosehuiyaya para tlanahuatis ipan altepetl Hesbón.’

3 “Huajca quej nopa TOTECO Dios techcahuili ma tijtlanica Tlanahuatijquetl Og ica nochí imasehualhua. Huan tiquintlamimictijque huan amo tijcajque niyon se ma itzto. 4 Huan timoaxcatijque nochí 60 altepeme campa tlali Argob catli eliyaya iaxca Tlanahuatijquetl Og. Nyon se altepetl amo tijcajque catli amo timocuilijque. 5 Huan nochí nopa altepeme eltoya cuali tlasesnahualti ica tepamitl catli ajsic huejcapa, huan quipixque huejhueyi puertas ica tepostli para quintzacuas. Nojquia tiquinitzquijque nochí sequinoc altepeme catli amo motzactoya ica tepamitl. 6 Huan tiquintlamimictijque quen tijchijque ica

Tlanahuatijquetl Sehón tlen Hesbón huan imasehualhua. Tiquinmictijque nochí tlacame, sihuame huan coneme ipan nochí nopa altepeme. 7 Pero inintlapiyahua timocuicuilijque. Nojquia tihuicaque nochí tlamantli catli ipati.

8 “Huajca ica ya nopa tijpixtoyaj toma-co nochí nopa tlalme catli quinahuatiyaj nopa ome tlanahuatiani tlen nopa amorreos ipan nica nali hueyatl Jordán. Elqui toaxca tlen nopa hueyatl Arnón hasta tepetl Hermón. 9 (Nopa Sidón ehuani quitocaxtiyayaj tepetl Hermón ica ‘tepetyl Sirión’, huan nopa amorreos quitocaxtiyayaj ‘tepetyl Senir.’) 10 Huan nojquia elqui toaxca nochí nopa altepeme ipan tlali Galaad huan nochí catli eltoya ipan tlali Basán hasta Salca huan Edrei. Nochi ya ni achthuiya quinahuatiyaya Tlanahuatijquetl Og ipan Basán.

11 “San mocajtoya Tlanahuatijquetl Og tlen nopa huejcapantique masehualme catli inintoca refaitame. Huan itlapech Tlanahuatijquetl Og eliyaya tlachihuali ica tepostli huan ihuehueyaca quipiyayaya pano nahui metros. Huan ipatlajca quipiyayaya nechca ome metros. Huan quiajoc-toque itlapech para nochí catli quinequi quitlachilitij. Eltoc ipan altepetl Rabá, se tlen inialtepehua amonitame.

Eyi huejhueyi familias mocajque

nechca Jordán

(Nm. 32:1-42)

12 “Huan nopa tlali catli timoaxcatijto-yaj ipan nopa tonali niquinmacac iixhuihua Rubén huan Gad huan nopa tlajco iixhuihua Manasés. Niquinmacac iixhuihua Rubén huan Gad nopa tlali tlen altepetl Arnón nechca hueyatl Arnón ica norte ihuaya tlajco nopa tepeme ipan tlali Galaad ica nochí ialtepehua. 13 Huan nopa tlajco iixhuihua Manasés catli quinejque qui-selise inintal ipan nica nali hueyatl Jordán niquinmacac ne seyoc tlajco tlen nopa tepeme ipan tlali Galaad, huan nochí tlali huan altepeme ipan tlali Basán campa itoca Argob. Nopona eltoya iaxca Tlanahuatijquetl Og. Nochi nopa tlali itoca eliyaya ‘Inintal Huejcapantique Masehualme’

pampa achtihiuya nopona itztoyaj.¹⁴ Iix-huihua Jair catli elqui se iixhui Manasés huejcajya mocuilijque nochí nopa tlali tlen Argob hasta monepantía ica tlali Gesar huan tlali Maaca. Huan hasta ama Basán nojquiya quitocaxtiaj Havot Jair o Itlal Jair.¹⁵ Huan tlali Galaad niquinmac-tili iixhuihua Maquir.¹⁶ Huan nopa huey-hueyi familias tlen Rubén huan Gad ni-quinmacac nopa tlali catli pejqui ica Galaad huan yohui ipan nopa tlamayamitl nechca hueyatl Arnón. Nopa tlali quipix-qui inepa ipan tlajeo nopa tlamayamitl huan ajsic hasta nopa hueyatl Jaboc catli monepantía ica nopa amonitame.¹⁷ Ininne-pa ica campa calaqui tonati elqui nopa hueyatl Jordán. Huan pejtehua campa Mantoc Atl Cineret ica norte, huan quipix-qui nochí nopa Arabá, huan hasta campa tepetl Pisga ontemo ipan nopa Hueyi Atl Arabá ica sur. Nopa Hueyi Atl Arabá noj-quiya itoca Hueyi Atl Mictoc^c.

¹⁸ Huan ipan nopa tonali nimechilhui amojuanti catli anitztoque ipan familias Rubén, Gad huan tlajco Manasés para masque TOTECO Dios amechmactilijtoya ni tlali para amoaxca, monequi nochí amosoldados ma quiitzquica ininteposhua huan ma quinyacanase iniisraelita icnihua para quiixcotonase ni hueyatl Jordán huan quinpalehuise iniiicnihua ma moac-tatica inintlatl nojquiya.¹⁹ San moca-huase nica ipan altepeme nica nopa sihuame, con-neme huan nochí nopa tlapiyalme catli anquinpiyaj,²⁰ hasta TOTECO Dios quin-macas nochí amoisraelita icnihua inintlatl ipan ne seyoc nali hueyatl Jordán. Huajca quena, huelis anmocuepase hasta ni tlali catli ama amoaxca huan campa itztoque amofamilias. Quej nopa nimechilhui.

²¹ Nojquiya nopa tonal niquilhui Josué: ‘Ica moixteyol ta tiquitztoc nochí catli TOTECO Dios quichijtoc ica nopa ome tlana-huatiani. Nojquiya san se TOTECO qui-chihuas ica nochí sequinoc tlana-huatiani campa anyohuij.²² Amo xiquinimacasica

pampa TOTECO Dios, amotemaquixtijca, yaya catli anmechtlahuilanilis.’

TOTECO amo quicahuili Moisés ma calaqui Canaán

²³ “Huan ipan nopa tonal nimotlatlaji ica TOTECO huan niquilhui;²⁴ TOTECO Dios Catli Más Tijpiya Tlanahuatili, ya tijpehual-tijtoc technextilía mohueyitis huan mochi-cahualis. Amo aqui seyoc DIOS ipan ilhui-cactli, niyon ipan tlaltipactli catli huelis qui-chihuas ni yejyectzitzí tlamatli huan te-tzatl catli ta hueli tijchihua.²⁵ Nimitztlajtlanía se favor. Techcahuili nojquiya njpanos ni hueyatl Jordán pampa njnequi niquitas nopa cuali tlali ica nopa tlachiquilme huan njnequi niquitas nopa campa itoca Líbano.” Quej nopa niquilhui.

²⁶ Pero anquimatiij TOTECO cualan-toya noca na ica catli quichijtoyaj amotata-hua huan masque njtlajtlani, amo nech-cahuili nicalaquis ipan nopa tlali. San nechilhui: ‘Ya! Ayacmo techilhui más ni tlamatli.’²⁷ Nechilhui para ma nitlejco iixco nopa tepetl Pisga huan nopona njtlachi-iyas para sur, para campa oncalaqui to-nati, huan campa hualquisa, huan campa norte. Huan tlen nopona huelis niquitas nopa cuali tlali, pero nechilhui nopa hue-yatl Jordán amo hueli njpanos para nicalaquis ipan nopa tlali.²⁸ Pero nechilhui ma njtequimaca Josué quen nopatlaca huan ma njyolchicahua huan ma njfuer-zajmaca pampa yaya amechyacanas nochí aniisraelita masehualhua para anqu-ixcotonase nopa hueyatl. Yaya catli amechmactilis nopa cuali tlali catli njtlachilis. Quej nopa TOTECO nechilhui.

²⁹ Huan teipa timocajque campa nopa tepeme, iixmelac campa itoca Bet Peor.”

Moisés quintlalnamieti nopa israelitame
4 Huan teipa Moisés quinlhui nopa isra-elitame: “Ama nochí amojuanti xijtlaca-quilica ni tlana-huatili huan ni tlamachtili catli nimechilhuía para xijtoquiliyyaca.

^c 3:17 Ni hueyi atl nojquiya itoca Hueyi Atl Poyec, o Hueyi Atl tlen Istatl o Hueyi Atl Arabá, pero san se hueyi atl.

Sintla anquichihuase ni tlamantli, huelis ancalaquise huan anitztose ipan nopa tlali catli amechmacas TOTECO, ininDios amo huejcapan tatahua. ²Amo xijmiyaquilica, niyon amo xijquixtilica catli nimechilhuis. San xijchijtinema ni ochi ni tlanahtuatinme pampa yaya, TOTECO Dios, catli amechmaca. ³Anquitztoque quenicatzta quintzontlamilti toisraelita icnihu catli quihueyichique nopa tlaixcopincayotl Baal ipan altepetl Peor. ⁴Pero amojuanti anquineltoquilijque TOTECO Dios ica ochi amoyolo huan yeca noja anitztoque hasta ama.

⁵“Huajca nojquiya ipan nopa tlali catli anquiselise monequi anquitoquilijtiyase nopa tlanahtuati huan tlamachtili catli nOTECO Dios nechnahuatijtoc para nimechmachtis. ⁶Ximomocuitlahuica miyac para anquichihuase ochi ni tlanahtuatinme pampa quej nopa quiitase ochi sequinoc masehualme para antlalnamiquij huan antlamachilaj. Huan nopa masehualme amechitase huan quicaquise tlen amotlanahuatilhua huan quiijtose para anisraelitame anitztoque se tlamantli masehualme catli nelia cuajcualtzti. Quiijtose para nelnelia antlalnamiquij huan antlamachilaj. Quej nopa quiijtose. ⁷Pampa amo onca seyoc tlali, niyon catli hueyi ica miyaqui imasehualhua, amo aqui quipiya se dios catli mocahua nelia nechca para quinpalehuis quema quitzajtzilaj quen TOTECO Dios mocahua ica tojuanti. ⁸Huan amo onca seyoc tlali ica imasehualhua catli quipiyaj tlanahtuatinme huan tlamachtilme catli xitlahuac quen catli nimechnextilis ama.

⁹“Huajca xijpiyaca cuidado huan xijmocuitlahuica miyac amoyolo. Amo xiquelcahuaca niyon se tlamantli catli anquitztoque ica amoixteyol. Ma mocahua ipan amoyolo huan ipan amotlalnamiquilis ochi tonali hasta amniqueise. Huan xiquinpoihuilica amocone huan amoixhuihua ochi huejhueyi tlamantli catli TOTECO techchihuilijtoc.

Xiquelnamiquica quema TOTECO camanaltic ipan Sinaí

¹⁰“Nojquiya amocone huan xiquinpoihuilica tlen nopa tonali quema ochi tiis-

raelitame timoquetzque iixtla TOTECO Dios nechca nopa tepetl Sinaí. Huan TOTECO nechilhui ma niquinsentili ochi israelitame para ma quitlacauilica itoscac para ma tijmachilica monequi ma tijhueyitlepanitaca san ya para nochipa. Huan nojquiya monequi ma tiquinnextilica tocone hua quej nopa ma quichihuaca. ¹¹Xi-quinilhuia amocone hua quenicatzta timonechcahuijque itzintla nopa tepetl, huan huejcapa quisayaya tlilti, poctli huan tlelemeclti quen nopa tepetl tlatlayaya. Huan ipan nopa tzintlayohuilotl tlejcoaya se poctli catli tilahuac huan yayahuic hasta ajsiyaya huejcapa ipan ilhuicactli. ¹²Huajca TOTECO amechnojnotzqui tlatlajco nopa tlilti. Ochi anquicajque itoscac, pero amo tleno anquitaque, niyon anquimatque quenicatzta nesiyaya. San itoscac anquicajque. ¹³Huan TOTECO amechilhui tlaque monequi anquichihuase para anquitlamichihuase nopa camanal sencahuai catli quichihuayaya amohuaya. Amechilhui monequi anquineltoquillise nopa majtlactli tlanahtuatinme huan quinijcuilo ipan ome tepatlactli. ¹⁴Huan TOTECO nechnahuati na ma nimechmaca nopa tlanahtuatinme huan tlamachtilme catli monequi anquichihuase ipan nopa tlali campa anajsitj huan anmoaxcatise.

Techilhui ma amo tiquintlepanitaca tiotzitzti

¹⁵“Amo anquitaque acajya itlachiyalis quema TOTECO amechcamanalhui tlen tlatlajco nopa tlilti ipan tepetl Sinaí. Huajca xijpiyaca miyac cuidado, ¹⁶para amo xijchihuaca catli fiero huan anquisencahuase se tlaixcopincayotl catli nesis quen se tlenijqui para anquitlepanitase quen elisquia amoTECO. Amo xijchihuaca se tlaixcopincayotl catli nesis quen se tlacatl o se sihuatl, ¹⁷o se tlapiyali ipan tlaltipactli, niyon catli nesis quen se totoli catli patlani ipan ilhuicactli. ¹⁸Niyon amo xijsencahuaca se tlaixcopincayotl para anquihueyichihuase catli nesi quen se tlamantli catli moxitlania tlalchi o catli nejnemi atzinla quen michime. ¹⁹Huan quema antlachiyase para ilhuicac, huan anquinitase si-

tlalime, tonati, huan metzli huan nochí sequinoc tlamantli catli eltoc nepa huejcapa, amo ximoilhuica para cuali anquinhueyichihuase, pampa amoTECO Dios quinchijchijqui nopa tlamantli para nochí masehualme ipan ni tlaltipactli. ²⁰Pero ica amojuanti huan amotatahua, TOTECO anmechquixti tlen tlali Egipto campa tlahuvel antlajiyohuiyayaj. Huan anmechchijqui xiitztoca aniaxcahua san ya, quen ama anitztoque. ²¹Pero TOTECO cualanqui noca na por amojuanti huan quijito amo nihuelis niquixcotonas nopa hueyatl Jordán para nicalaquis ipan nopa cuali tlali catli anquiselise. ²²Huajca monequi nim quis ipan ni tlali huan amo nijpanos hueyatl Jordán. Pero amojuanti, quena, anpanose huan ammoaxcatise nopa cuali tlali. ²³Huajca xijpiyaca miyac cuidado. Xijneltocaca nopa camanali catli TOTECO Dios quichijtoc amohuaya huan amo ximochijchihulica niyon se tiotzi, o niyon se tlaixcopincayotl, ²⁴pampa TOTECO Dios, yaya se Dios catli tetlasomati huan amo anmechcahuilis xijtlepanitaca seyoc tlamantli. ¡Yaya quen se tlilt catli nochí quitzontlamiltia!

²⁵“Huan quema anquinpiyase amoco-nehua huan amoixhuihua huan ya anhuej-cajtose anitztose ipan nopa cuali tlali, sintla antlajtlacolchihuase iixpa TOTECO huan anmochihuilise tiotzitzi o tlaixcopincayome catli quinextise se tlenijqui, huajca xijmatica TOTECO Dios tlahuvel cuanal is amohuaya. ²⁶Huan na nijtestigoj-quetza TOTECO catli quichijqui ilhuicactli huan tlaltipactli para melahuac nimantzi anixpolihuise. Ayacmo anitztose ipan nopa cuali tlali catli ama anquipanose ni hueyatl Jordán para anquiselise, pampa nimantzi masehualme anmechtzontlamiltise. ²⁷Huan nopa quentzi catli mocahua-se tlen amojuanti TOTECO quinsemanas campa hueli ipan nochí altepeme huan tlalme ipan tlaltipactli. ²⁸Huan nopona, quena, quintequipanose tiotzitzi catli tlahualme por masehualme. Pero nopa tiotzitzi tlen cuahuitl huan tlen tetl amo tlacaquij, niyon amo tlacuaj, niyon amo tlaijyotilanaj.

²⁹“Pero sintla nopona anquitemose TOTECO Dios, anquipantise. Quena, anquipantise sintla anquitemose ica nochí amo-yolo huan ica nochí amoalma. ³⁰Huan quema ajsis nopa tonali tlen tlaijyohuilistli huan tequipacholi catli anmechpantis ipan nopa tlawayacapan tonali, anmocuepase ica amoTECO Dios huan quena, anquinelto case catli anmechilhuía. ³¹Pampa amoTECO Dios tlahuvel tetlaosjtl. Yaya amo anmechtlahuelahuas, niyon amo anmechtzontlamiltis nochí amojuanti. Amo quielahuas nopa camanal sencahualli catli quichijqui ica amohuejapan tatahua.

³²“Pero ximotlatzintoquilica amojuanti, sintla ica nochí nopa tlamantli catli panotoc hasta ipejya tlaltipactli quema Toteco achtilui quichijqui se masehuali sintla oncatoc se tlamantli quej ni. Xijtemoca campa hueli tlen se iyecapa ilhuicac hasta seyoc, sintla panotoc se tlamantli hueyi quej ni o sintla se quicactoc tlen se tlamantli quej ni. ³³Amo onca seyoc tlali catli nochí imasehualhua quicactoque itoscac Toteco Dios catli camanaltic tlen tlatlajco ipan tlilt quen amojuanti anquicactoque huan noja amocahauaj anyoltoque para antepohuilise. ³⁴Amo oncatoc seyoc Dios catli quiitztoc se tlamantli masehualme catli quintequipanoyayaj seyoc tlali ehuani san tlaptic huan quinquitilijtoc ica huejhueyi tlanextilijcayotl huan tetzatl; huan moaxcati nopa masehualme quen amoTECO Dios anmechchihuilitoc. Pampa yaya quintitlanili nopa egiptome miyac tlayejye coli huan tlamantli catli temajmati. Quinhuilanqui ica ihueyi chicahualis. Quena, TOTECO quinmanexti huan quintlajtolsencajqui. Nochi ni tlamantli catli anquijitztoque ica amoixteyol para TOTECO anmechchihuilitoc, amo quema panotoc ipan seyoc lado. ³⁵TOTECO Dios quichijqui nochí ni huejhueyi tlanextilijcayotl para xijmachilica yaya catli nelne-llía DIOS, huan iyoca tlen ya, amo aqui seyoc. ³⁶Huan para anmechxitlahuas quen quinamiqui yaya anmechnojnotzqui tlen ilhuicac, huan ipan tlaltipactli anmechnextili se hueyi tlilt, huan npona ipan nopa tlilt anmechcamanalhui.

37 “Huan pampa yaya quinicneli amo-huejapan tatahua, quichijqui nochí ni huejhueyi tlamantli, huan quintlapejpeni amohuaya amojuanti, aniniixhuihua, para anelise imasehualhua. Huan yeca yaya iseltzi anmechquixti ipan tlali Egipto ica ihueyi chicahualis huan hualajqui amohuaya ipan ojtlí. 38 Huan yaya quintzontlamiltis amoix-tla sequinoc tlamantli masehualme catli más miyaqui huan más quipiyaj chicahua-listli que amojuanti pampa quinequi an-mechmacas inintal. Quinejqui xijselica pa-ra amoaxca quen ama mochihua.

39 “Huajca xijmatica cuali ipan amo-tlalnamiquilis para san yaya amoTECO catli nelnelía Dios ipan tlaltipactli huan ipan ilhuicactli huan amo aqui seyoc. 40 Huajca monequi xijchihuaca nochí itlanahuatil-hua huan itlamachtilhua catli na nimech-maca ama ni tonal. Huan quej nopa cuali elis para amojuanti huan amoixhuihua, huan anitztose miyac xihuitl ipan nopa cuali tlali catli amoTECO Dios anmechma-cas para nochipa.”

Altepeme campa hueli momanahuise

41 Huajca Moisés quintlapejpeni eyi alte-peme campa masehualme huelis momanahuítip iwan ni inaliyo hueyatí Jordán pa-ra campa hualquisa tonati. 42 Huan sintla se acajya quimictis seyoc masque amo quinequiyaya, huelis momanahuítip iwan se tlen nopa eyi altepeme pampa nopena amo aqui hueli quimacuepilis. 43 Huan ya ni inintoca nopa altepeme: Beser ipan nopa huactoc tlali ipan inintal nopa familia Rubén, Ramot ipan tlali Galaad ipan inintal nopa familia Gad, huan Golán ipan tlali Basán ipan inintal nopa familia tlen tlajco iteipan ixhuihua Manasés.

Quenicatza TOTECO quinmacac nopa tlanahuatilme

44 Ya ni nopa tlanahuatilme, tlamach-tilme, 45 huan leyes catli na, niMoisés, ni-quinmacac nopa israelitame quema quis-que ipan tlali Egipto. Huan niquinilhui

sempa quema itzttoyaj nopena, 46 nechca hueyatí Jordán ipan inaliyo para campa hualquisa tonati ixmelac altepetl Bet Peor ipan nopa tlali catli eliyaya iaxca mijcatzi Tlanahuatijquetl Sehón tlen amorreos. Ya-ya tlanahuatiyaya ipan altepetl Hesbón, pero tiisraelitame tijtlanque quema tiqui-sayayaj ipan tlali Egipto. 47 Huan timoax-catijque nopa tlali huan itlal Tlanahuatij-quetl Og catli mosehui ipan Basán. Ya ni eliyaya nopa ome tlanahuatiani tlen amo-rrreos ica campa hualquisa tonati tlen hue-yatl Jordán. 48 Huan inintal pehua campa altepetl Aroer iteno nopa hueyatí Arnón huan yohui hasta tepetl Sion, catli nojqui-ya quitocaxtiyaya tepetl Hermón. 49 Huan nochí nopa huactoc tlali Arabá nechca hueyatí Jordán ipan neca nali para campa hualquisa tonati huan hasta nochí nopa Hueyi Atl Mictoc^d catli mocahua itzintla tepetl Pisga.

Nopa majtlactli tlanahuatilme

(Ex. 20:1-17)

5 Huan Moisés quinnojnotzqui nochí is-raelitame ma mosentilica huan quin-ilhui:

“Xijtlacaquilica, anisraelitame, ni tla-nahuatilme huan tlamachtilme catli ni-mechilhúa ama. Monequi xijmatica nochí huan xijpiyaca cuidado para anquintoqui-litjiyase.

2 “TOTECO Dios quichijqui se camanal sencahualli tohuaya ipan tepetl Horeb o Si-naí. 3 TOTECO amo san quichijqui nopa ca-manali para quinnahuatis tohuejcapan ta-tahua catli mijque, pero nojquia quichij-qui para technahuatis tojuanti catli ama tiitztoque nica. 4 TOTECO camanaltic to-huaya ipan tlatlajco nopa tlilt huan ihua-tya timoixtlachilique.

5 “Huan na niitoya tlatlajco ica TO-TECO huan amojuanti para nimechilhuijtias catli TOTECO quiijtohuayaya, pampa amojuanti anquiimacasiyaya nopa tlilt huan amo antlejcoque campa yaya itztoya ipan nopa tepetl. Huan TOTECO quiijto:

^d4:49 Ni hueyi atl nojquia itoca Hueyi Atl Poyec, o Hueyi Atl tlen Istatl o Hueyi Atl Arabá.

- 6 Na niamotoECO Dios catli nimechquixti ipan tlali Egipto campa antetequipanohuayaj san tlaptic.
- 7 Amo quema xijhueyichihuaca seyoc quen amoTeco, san na.
- 8 Amo ximochihuilica, niyon amo xijtepanitaca niyon se tiotzi o niyon se tlamantli tlaixcopinali, masque quipiyas itlachiyalis catli eltoc ne-pa ilhuicac, o ipan ni tlaltipactli o catli eltoc ipan atl. 9 Amo ximohuitzomaca iniixtla, niyon amo xiquinhueyichihuaca, pampa na niamotoECO Dios huan nimechtlasomati huan nijnequi san na techhueyichihuaca. Huan quema niquintlatzau-cultia catli amo quinequij nechitase, nopa tlatzacultili nojquia quinassis inincone-hua, huan iniixhuihua, huan inincone-hua iniixhuihua. 10 Pero ica masehualme catli nechicnelia huan quichihuaj notlahuati, niquintlasojtas imincone-hua huan iniixhuihua. Quena, por inijuanti niquintlasojtas ininteipan ixhuihua catli quinpiyase inincone-hua mil hueltas.
- 11 Amo xicahuilmatica notoca niamotoECO DIOS, pampa naya temachtli nij-tlatzacultis catli san quiahuil-matis notoca.
- 12 Xiquelnamiquica sábado, nopa tonal para anmosiyajquetzase, huan xijtepanitaca. Ma elis tlaiyocatlalili tlen sequinoc tonali pampa quej nopa na, niamotoECO Dios, nimech-nahuatijtoc. 13 Xitequitica chicuase tonali huan ipan nopa tonalme xij-chihuaca nochí catli monequi an-quichihuase. 14 Pero nopa chicompa tonal monequi ximosiyajquetza-ca huan techhueyichihuaca na niamotoECO Dios. Amo hueli xitequitica, niyon amo xijcahuilica ma te-quití amotelpoca, niyon amoichpo-ca, niyon amotlaca tequipanojca, niyon amosihua tequipanojca, ni-yon amotoro catli quimati tlapoxo-nía, niyon amoburro, niyon nopa seyoc tlali ejquetl catli itztoc ipan amotlal. Amo aqui tequitis, san xi-mosiyajquetzaca. 15 Xiquelnamiquica para amojuanti nojquia aneli-yayaj antequipanohuani ipan tlali Egipto campa amo quema huelque anmosiyajquetzase niyon se tonal huan na niamotoECO Dios nimech-quixti ica miyac chicahualistli. Huajca yeca na nimechnahuatía xi-mosiyajquetzaca.
- 16 Xijtepanitaca amotata huan amonana quen na, niamotoECO Dios, nimech-nahuatijtoc. Huan quej nopa anitz-tose miyac xihuitl huan nochí qui-sas cuali para amojuanti ipan nopa tlali catli nimechmacas.
- 17 Amo xitemictica.
- 18 Amo ximomecatica.
- 19 Amo xitlachtequica.
- 20 Amo aqui xiquistlacahuica.
- 21 Amo xiquixtocaca seyoc isihua, ni-yon ichaj, niyon imil, niyon itlaca tequipanojca, niyon isihua tequi-panojca, niyon itoro catli quimati tlapoxonia, niyon iburro. Amo tle-no xiquixtocaca catli seyoc iax-ca."
- Quema tlahuel momajmatijque israelitame
iixpa TOTECO
(Ex. 20:18-26)**
- 22 "Nochi ya ni nopa camanali catli TOTECO techilhui tlen tlatlajco nopa tlilt huan nopa mixtli tilahuac quema amota-tahua huan amojuanti anmosentiljtoyaj itzintla nopa tepetl. Teipa ayacmo tleno más quiijtojtoc. Teipa quiijcuilo ni camanali ipan ome tepatlactli huan nechmacac.
- 23 Pero quema anquicajque itoscac catli quisayaya tlatlajco nopa tzintlayohuilotl huan anquitaque nochí nopa cuatitlamitl tlatlayaya, hualajque nechcamanalhuicoj nochí amotlayacancahua ipan sesen hueyi familia ininhuaya nopa huehue tlacame catli quihiucayayaj tequiticayotl. Huan nechilhuijque: 24 'TOTECO Dios nelnelia melahuac technextilijtoc itlatlanex huan ihueyitis, huan tijcactoque itoscac catli quisayaya tlatlajco nopa tlilt. Ama tech-nextilijtoc para DIOS, quena, hueli cama-

nalti ica masehualme huan inijuanti amo miquij. ²⁵ Pero sintla techcamanalhuis ica ompa, temachtli nopa hueyi tlilemectli techtzontlamiltis. Huan amo tijnequij timquise. ²⁶ Niyon se masehuali amo que ma quicactoc itoscac Toteco Dios catli itztox para camanaltis ihuaya tlen tlatlajco se hueyi tlilt huan teipa mocahua itztoc. Tojuanti nojquia timquise sintla más techcamanalhuis. ²⁷ Más cuali ximonechcahuia ta huan xijtlacaquili nochi catli TOTECO Dios mitzilhuis huan teipa techpo-huilis catli yaya mitzilhujtos, huan tojuanti tijchihuase catli technahuatis.'

²⁸ "Quema amojuanti ancamanaltiya yaj nohuaya, TOTECO quitlacaquilito ya nochi catli anquijtohuayaj, huan teipa nechilhui para quicajqui nochi catli anquijtoque huan cuali catli anquijtoque. ²⁹ Quijito elisquía nelcuali sintla para nochipa anquitlepanitasquíaj huan anquichihuasquíaj nochi itlanahuatilhua quen anquijtohuaj, huan amo quema anquipatlasquíaj amotlalnamiquilis. Quej nopa amojuanti huan amocone hua anquipiyase se nemilistli catli nelyejyecdzi. ³⁰ Huajca nechilhui ma niya huan nimechilhuiti para ximocuepaca hasta amoyoyonchajchaj, ³¹ huan para na ma nimocahua nopena ihuaya para nechilhuis nochi nopa tlanahuatilme catli monequi nimechnextilis para anquichihuase ipan nopa cuali tlali catli anmechmacas para amoaxca. Quej nopa nechilhui TOTECO.

³² "Huajca ama monequi amojuanti xijchihuaca nochi catli TOTECO Dios anmechhuatijtoc huan amo xijcuapoloca niyon quentzi. ³³ Xijtoquilica nopa ojtili catli TOTECO Dios anmechnextilijtoc para anitztose miyac xihuitl huan nochis quisas cuali para amojuanti ipan nopa tlali catli yaya anmechmacas para anmoaxcatise.

Nopa hueyi tlanahuatil

6 "Huajca ya ni nopa tlanahuatilme catli amoTECO Dios nechhuatijtoc ma nimechnextili para xijchihuaca ipan nopa tlali catli anquiselise para amoaxca. ² Ni tlanahuatilme nimechmaca para xiquimacasa huan xijtlepanitaca TOTECO amo-

juanti, amocone hua, huan amoixhuihua nochi tonali ipan amonemilis. Monequi xijchihuaca nochi catli quijtohuia ni tlanahuatilme huan leyes. Huan sintla quej nopa anquichijtinemise, anitztose miyac xihuitl. ³ Huajca anisraelitame, xijtlacaquilica catli nimechhuatia huan ica miyac tlamocuitlahuili xijneltoquilica para cuali anitztose huan anquinpiyase miyac amocone hua huan amoixhuihua ipan nopa cuali tlali catli nochi temacac hasta onmocahua itlajca. Pampa ya nopa catli TOTECO ininDios amohuejcapan tatahua quintencahuili para panos sintla anquinel-toquijtiyase itlanahuatilhua.

⁴ "Huajca xijtlacaquilica anisraelitame: TOTECO Dios san yaya toTeco. TOTECO itztox setzi.

⁵ "Xiquicnlica TOTECO Dios ica nochi amoyolo, huan ica nochi amoalma, huan ica nochi amochicahualis.

⁶ "Xijtzontecontlalica nochi ni tlamantli huan ximoilhuica tlatoctzitzit catli nimechilhujtoc ama. ⁷ Xiquinnextilica amocone hua mojmostla. Xiquinpohuila ni tlanahuatilme quema anitztoque ipan amochaj, huan quema annejnemij ipan ojtili. Xiquinmachtica quema anmotecase para ancochise huan quema anmehuase.

⁸ Ma eli quen anquinpiyaj ni tlanahuatilme ijculijtoc ipan amomax huan ipan amocuajtol para se tlanextilijcayotl para xiquinnetocaca huan amo xiquelcahuaca.

⁹ Xiquinijcuilocia ipan nopa tlaquetzalme huan cuapuertas tlen amochajchaj.

Monequi nopa israelitame ma quineltocaca TOTECO

¹⁰ "Quema amoTECO Dios anmechchi-huas xicalaquica ipan nopa cuali tlali catli quintencahuili amohuejcapan tatahua, Abraham, Isaac, huan Jacob para anmechmacasquía, nojquia amo xiquinelcahuaca. TOTECO anmechmacas nopa cuali tlali catli quipya huejhueyi altepeme catli yejyecdzitzit catli amojuanti amo anquisenca-toque. ¹¹ Quipiyas calme tejtemitoque ica nochi tlamantli catli cuali catli amojuanti amo anquichijchijtoque. Quipiyas amelme catli amo anquinxajtoque huan quipiyas

mili ica miyac cuame tlen olivos para aceite catli amo anquintoctoque. ¹²Pero quema antlacuase hasta anixhuise nopena, amo xiquelcahuaca TOTECO catli amechequixti ipan tlali Egipto campa antetequapanohuayayaj san tlaptic. ¹³Xiquimacasi ca huan xijtalepanitaca amoTECO Dios huan san ya xijtequipanoca, huan monequi antlatestigojquetzase san ica yaya itoca. ¹⁴Amo xiquintoquilica nopa dioses catli quinhueyichihuaj nopa masehualme nopena amonechca pampa amo neli Dios. ¹⁵AmoTECO Dios catli amohuaya itztoc yaya quintlasomati catli ya iaxcahua. Huan sintla anquihueyichihuase seyoc, cuelanis amohuaya huan amechezontlamiltis huan anpolijtehuase tlen ni tlaltipactli.

¹⁶“Amo xijyejyecoca amoTECO Dios quen anquichijke que ipan Masah. ¹⁷Ica miyac tlamocuitlahuili xijchihiuaca nochinopa tlanahuatilme huan leyes huan tlamachtili catli ya ammechnahuatijtoc. ¹⁸Xijchihiuaca san catli xitlahuac, huan catli cuali huan catli quiyolpactis TOTECO. Quej nopena cuali anquisase huan ancalaque huan amoaxcatise nopa cuali tlali catli TOTECO quintencahuili amohuejcapan tatahua para amecheamacas. ¹⁹Huan quej nopena yaya quintzontlamiltijtiyas amocualancaitacahua amoixtla quen quijtojtoc quihiuas.

²⁰“Huan teipa ica miyac xihuitl quema amoconehtua amecheatlazintoquilise quenque monequi quipiyase nochin tlanahuatilme catli technahuatijtoc TOTECO Dios, ²¹monequi xiquinilhuica ya ni: ‘Tojuanti san tlaptic tijtequipanoyayaj nopa Faraón ipan tlali Egipto huan TOTECO techquixti ica miyac chicahualistli. ²²Toseltzitzti tiquitaque nochin huejhueyi tlanextilijcayotl, huan huejhueyi tetzatl catli quichijqui. Quena, TOTECO quichijqui huejhueyi tlamanli ipan tlali Egipto catli tlahuel quinmajmati Faraón huan nochin imasehualhua. ²³Pero tojuanti techquixti tlen nopena para techhuicas ipan nopa cuali tlali catli quintencahuili tohuejcapan tatahua para techmacas. ²⁴Huan yaya TOTECO Dios technahuati ma tijchihiuaca

nochini tlanahuatilme huan ma tijtlepanitaca para quej nopa tiitztose ica cuali huan yaya techmocuitlahuis para tihuejcahuase tiitztose. Huan quej nopa quichijtoc hasta ama. ²⁵Huan sintla tijchihiuase ni tlanahuatilme quen TOTECO Dios technahuatijtoc, huajca nochin quisas cuali para tojuanti.’ Quej nopa xiquinnanquilica amoconehtua.

Tlanahuatilme para se nemilstli

tlatzejzeloltic

(Ex. 34:11-17)

7 “TOTECO Dios amechechihuas xicala quica ipan nopa tlali catli amoxacatisse, huan quintzontlamiltis amoixpa nopa heteos, gergeseos, amorreos, cananeos, febrezeos, heveos huan jebuseos, masque tlahuel miyaqui huan más quipiyaj chicahualistli que amojuanti. ²Huan quema amoTECO Dios ya amechehmactilijtos nochin nopena masehualme amomaco para xiquintlanica, monequi senquistoc xiquintzontlamiltica huan amo xijchihiuaca niyon se camanali ininhuaya, niyon amo xiquintla sojtlaca. ³Amo ximotlahuicaltica ininhuaya. Amo ma monamictica amoconehtua ica iniiichpocahua, niyon amoichpocahua ica inintelpocahua. ⁴Pampa quichihuate para amoconehtua ma mohuejcahihiuaca tlen TOTECO huan quihueyichihuase intintotzitzi, huan quej nopa icualancayo TOTECO hualtemos huan amechezontlamiltis san ipan se tlatoctzi.

⁵“Monequi xijtlamiltica nochin tlaixpame campa quihueyichihuaj intintotzitzi. Xijsemanaca nochin nopa teme huan tlaquetzalme catli quinitaj para tlatzejzeloltique, huan nochin inintlaixcopincayohua catli quihueyichihuaj. Huan nochin xiquintlatica, ⁶pampa anisraelitame TOTECO Dios amecheatlapejpenijtoc tlen nochin ininxinach masehualme catli itztoque ipan ni tlaltipactli para anitztose tlaiyocatlalili san para ya.

Tlatiochihualme israelitame

⁷“TOTECO amo amecheatlapejpeni pampa anitztoyaj más anmiyaqui que sequinoc xinach masehualme, pampa nelia inijuan-

ti más miyaqui quinpixque masehualme que amojuanti. Más anquentzitzi aneliyayaj que nochí sequinoc tlamantli masehualme. ⁸Pero TOTECO ammechtlaapejpeni pampa amechicneli. Yeca ammechquixti ipan tlali Egipto campa antetequipapanohuayayaj san tlapic. Quena, quen quintencahuili amohuejcapan tatahua para quichihuas ammechquixti imaco Faraón nopa tlanaahuatijquetl ipan tlali Egipto ica hueyi chicahualistli.

⁹“Xijmachilica cuali para amoTECO Dios yaya catli nelnelía Dios huan catli nelnelía temachtli. Para nochipa yaya quitlamichihuas catli quiijtojtoc para quichihuas ipan nopa camanalí catli quisencajqui amohuaya. Sintla tijchihuase tlanaahuatilhua, tecnicnelis tojuanti, toconehua, huan toixhuihua catli quipiyase ininconehua hasta mil hueltas. ¹⁰Pero quintlaxtlahuis quen quinamiqui nochí catli amo quinequij quittase. Quena, nimantzi quintzontlamiltis nochí catli quicualancaitaj. ¹¹Huajca xijpiyaca cuidado para anquineltoquilise nopa tlanahtilme, leyes, huan tlamachtilme catli ama nimechnahuatí xijchihuaca.

Tlatiochihualistli para catli quineltocas TOTECO

(Lv. 26:3-13; Dt. 28:1-14)

¹²“Sintla anquineltocase ni tlanahtilme, amoTECO Dios nojquiya amechicnelis quen quiijtohua ipan nopa camanal sencahualli catli quichijqui ica amohuejcapan tatahua. ¹³Quena, amechicnelis huan amechechihuas huan quichihuas ximomiyauquila. Quintiochihuas amoco-nehua huan catli anquipixcase. Quichihuas para anquipiyase tlahuel miyac trigo, xocomeca atl huan aceite. Quintiochihuas amohuacaxhua huan amoborregojhua para tlahuel miyaqui mochihuase ipan nopa tlali catli quintencahuili amo-huejcapan tatahua para amechmacas. ¹⁴Más anelise antlatiochihualme que nochí sequinoc masehualme. Ipan nochí amojuanti, amo oncas niyon se sihuatl catli amo huelis coneipyas. Huan nochí tlacame quipiyase ininconehua. Nojquiya ipan amotlapiyalhua, amo oncas oquich-

me catli amo tlaxinachose, niyon amo oncas sihua tlapiyalme catli amo huelis conepiyase. ¹⁵TOTECO ammechquixtilis nochí tlamantli cocolistli huan amo quicahuilis ma amechajsis nopa fiero cocolistli catli anquiitaque ipan tlali Egipto. Pero quena, quinmactilis nopa fiero cocolistli nochí amocualancaitacahua. ¹⁶Huan mo-nequi xiquintzontlamiltica nochí masehualme catli amoTECO Dios ammechmactilia amomaco. Amo xiquintlasoxtlaca huan amo xiquinhueyichihiuaca intintaixcopincayohua, pampa amechmasiltise.

¹⁷“Huelis amoilhuáj: ¿Quenictatz huelis tiquintlanise nopa masehualme nopona pampa inijuanti más miyaqui que tojuanti? ¹⁸Pero nimechilhuá amo xiquinimacasica. Xiquelnamiquica catli quichijqui amoTECO Dios ica Faraón huan nochí egiptome. ¹⁹Xiquelnamiquica nopa huejhueyi tlajiyohuilistli catli TOTECO Dios quinmacac. Xiquelnamiquica nopa huejhueyi tlanelxtilijcayotl huan tetzatl catli anquiitaque quichijqui amoTECO Dios ica ihueyi chicahualis quema amechquixti tlen tlali Egipto. Ya nopa sempayano quichihuas TOTECO Dios ica nochí masehualme catli ama anquinimacasij. ²⁰Teipa TOTECO Dios quintitlanis etzame campa inijuanti catli motlatijtose para momanahui-se huan nopa etzame quinquitise hasta anquintzontlamiltise senquistoc nochí.

²¹“Huajca amo ximajmahuica iniixtla amocualancaitacahua, pampa amoTECO Dios catli itztoc amohuaya, yaya tlahuel hueyi huan temajmati. ²²Huan san ica yolic TOTECO quintojtocatiyas nopa masehualme amoixtla huan quintzontlamiltis. Pampa sintla quinmictis nochí ica san se huelta, nopa tecuanime catli itztoque ipan cuatitlamitl momiyaquilisquíaj campa anitzose. ²³Pero amoTECO Dios ica yolic quintlalis nochí nopa masehualme amomaco huan quinhuihuichihuas para xiquintzontlamiltica senquistoc nochí inijuanti. ²⁴Nochí inintlanahuatijcahuas niqquintlalijtiyas amomaco huan anquinmijmictijtiyase para ayacmo aqui ma quinelnamiquis. Amo aqui huelis moquetzas amoixpa. Senquistoc anquin-tzontlamiltise.

25 “Monequi xiquintlatica intintotzitzit. Amo xiquixtocaca nopa oro huan plata catli ica quinxajtoque nopa tiotzitzit, niyon amo xijnequica amnoaxcatise para amo amechmasiltise, pampa TOTECO Dios amo quinequi quiitas. **26** Amo tleno xijhuccaca ipan amochajchaj catli TOTECO amo quinequi quitas o catli amo quipactia, pampa yaya quijitojtoc para noch i xiquixpolihuicta.

Amo san pantzi monequi para ma itzto se masehuali

8 “Ximotlachilica para xijchihuaca noch chi nopa tlanahuatilme catli nimech-nahuatia ama. Sintla quej nopa anquichihuase, cuali anitztose. Huan anmomiya-quilise miyac huan ancalauise, huan amoxcatise nopa cuali tlali catli TOTECO quintencahuilli amohuejcapan tatahua para amechmacas. **2** Huan xiquelnamiquica noch nopa ojtl catli amoTECO Dios quichijqui ma tinejnemica ipan nopa huactoc tlali para 40 xihuitl. Quinequiyaya amechechcapanoltis huan amechyejyecos para quimatis quenicatz amotlalnamiquilis huan para quiitas sintla anquichihuase itlanahuatil, o amo. **3** Huan yaya quichijqui xitlajiyohuica huan ximayanca. Huan teipa amechtlamacac ica maná, se tlacualistli catli amo anquiximatiyaj, niyon amohuejcapan tatahua, amo quiiximatiyayaj. Huan ya nopa quichijqui para amechnextilis para amo san ica pantzi monequi para itztos se masehuali. Nojquiya monequi quineltocatiyas noch icamanal TOTECO. **4** Ipan nopa 40 xihuitl quema annejnenque ipan huactoc tlali, amo tlanqui amoyoyo huan amo anicxisamajque. **5** Xijmachilica para TOTECO Dios amechtlatzacuilit huan amechtlalnamiicti quen se tetaj quichihua icon.

6 “Huajca xijchihuaca noch itlanahuatil amoTECO Dios huan san ya xijhueyimatica. Xijtoquilica nopa cuali ojtl catli amechnextilijtoc huan xiquimacasica, **7** pampa TOTECO Dios amechhuicas ipan se cuali tlali. Elis se tlali catli quipiya miyac pilatlajtzitzit, amelme huan hueyame campa hueli ipan tlamayamitl huan ipan

tepeme. **8** Elis se tlali catli quipiya miyac nectli, trigo, cebada, xocomeca mili, higuera mili, huan miyac mili ica olivo cuame catli temaca miyac aceite. **9** Ipan nopa tlali amo anmotequipachose ica tlaque anquicuase, pampa oncas miyac tlacualistli. Amo anmotequipachose ica niyon se tlamantli. Ipan teme anquipantise hierro hasta mocahuas para anquichihuase te-postli, huan nojquiya ipan tepeme onca nopa tepestli cobre. **10** Pero quema anajisto huan antlacuajtose hasta cuali anixhuitose, xijhueyichihuaca TOTECO Dios catli amechmacatoc nopa cuali tlali.

Amo xiquelcahuaca TOTECO

11 “Xipiyaca cuidado para quema ya anquipixtose noch catli monequi, amo anquielcahuase amoTECO Dios. Amo xijcahuaca xijchihuaca noch itlanahuatilhua huan noch ni icamanal catli nimech-nahuatijtoc ama. **12** Amo ximohueyimatica quema antlacuajtose, huan anixhuitose huan anitztose ipan cuajcuali calme catli anquisencajtose. **13** Anquinitate amotlapiyalhua nelmomiyaquilise, huan anquipixtiyase miyac oro, huan plata huan tlaman-tzitzit. **14** Pero amo ximohueyimatica huan amo xiquelcahuaca amoTECO Dios catli amechquixti ipan tlali Egipto campa antetequipanohuayaya san tlaptic. **15** Amo xiquelcahuaca yaya catli amechchijqui xinejnemica ipan nopa hueyi huactoc tlali catli nelia temajmati, huan campa itzto-que miyac cohuame huan colome, huan campa amo oncayaya atl. Pero TOTECO quichijqui ma quisa atl ipan se hueyi tepe-xitl huan anquipixque para anatlique. **16** Huan ipan nopa huactoc tlali amech-tlamacayaya ica maná, se tlacualistli catli amojuanti, niyon amohuejcapan tatahua amo quiiximajtoyaj. Quinequiyaya amechyejyecos huan amechechcapanoltis para más anmotemachise ipan ya, huan teipa catli cuali amechmacas. **17** Amo quema ximoilhuica para noch nopa ricojyotl catli anquipixase anquiatlantoque san ica amojuanti amochicahualis, pampa amo neli. **18** Monequi xiquelnamiquica amoTECO Dios, pampa san

yaya catli amechmacatoc chicahualistli para anquipyase nopa ricojyotl catli anquipyase. Yaya quinequiyaya quitlamichiwas catli quijito nopa camanal sencahuali catli quichijqui ica amohuejcapan tatahua.

19 “Pero sintla anquielcahuase TOTECO Dios, huan anquitoquilise tiotzitzit catli amo neli DIOS; sintla anquinhueyichihuase huan ammohujitzomase inixpa, na ni-mechilhuía ama para amechtzontlamiltis nochí amojuanti. Huan amo tleno moca-huas tlen amojuanti. **20** Anquitase quenicas-tza TOTECO quintzontlamiltis amoixpa nopa sequinoc tlamantli masehualme catli quinhueyichihuaj tiotzitzit ipan nopa tlali. Huan amojuanti nojquiya quej nopa amechtzontlamiltis sintla amo anquinelto-catiyase nochí catli TOTECO Dios quijito-hua.

Israelitame tlatlanise ica ichicahualis Toteco

9 “Xitlacuquilita anisraelitame, ya ajsic hora para xiquixcotonaca ni hueyatl Jordán huan xiquintlanitij nopa sequinoc tlamantli masehualme catli más huejhueyi huan más quipiyaj chicahualistli que amojuanti. Quinpiyaj huejhueyi altepeme catli cuali moyahualojoque ica tepame catli huejhuejcapantique. **2**Nopa masehualme nepa itztoque tlahuel huejcapantique pampa iixhuihua Anac, nopa huejcapantic tlacatl tlen huecjajya. Anquicactoque nopa camanal catli quijtohua para amo aqui huelis inihuaya motlalii iixhuihua Anac. Quej nopa nochí masehualme moilhuáj.

3 “Pero xijmatica ama para amoTECO Dios amechyacanas. Quena, yaya tlayacanas huan quintzontlamiltijiyas quen se hueyi titl. Amoixtla quinechcapantlalis masehualme para huelis anquintlanise huan anquinquixtise ipan nopa tlali ipan se tlatoctzi. Quena, anquintzontlamiltise quen quema se ixijcopis pampa quej nopa amechilhuijtoc TOTECO xijchiuaca.

4 “Huan quema TOTECO Dios ya quinto-jtocatos nopa masehualme tlen amoix-tla, amo xiquijtoca: ‘Tojuanti technamiqui

ni cuali tlali pampa tucuajcualme iixpa TOTECO, huan yeca techmactilijtoc.’ Amo ne-li ya nopa. TOTECO quintojtocas nopa ma-sehualme amoixpa pampa tlahuel miyac inintlajtlacolhua inijuanti. **5** Amo amech-calaquis ipan nopa cuali tlali huan amechaxcatis pampa anxitlahuaque iixpa o cuajcualtzí amoyolo. Yaya quintojtocas nopa masehualme por inintlajtlacolhua huan nojquiya para quitlamichiwas nopa camanal catli yaya quintencahuili Abraham, Isaac huan Jacob, amohuejcapan tatahua. **6** Huajca xijmatica para TOTECO Dios amo amechmactilía nopa cuali tlali pampa annejnemij xitlahuac, pampa amo neli. Amojuanti tlahuel antzontochon-que para anquineltocase TOTECO Dios.

Israelitame mosisiniijque ica Toteco

7 “Xiquelnamiquica quenicas-tza anquicualcamacaque TOTECO Dios ipan nopa huactoc tlali huan amo quema xiquelca-huaca. Anquichijque ma cualani ipan no-pa tonali quema tiquistejque ipan tlali Egipto huan hasta tiajsicoj nica. Nochipa anmotzontochonchijque ica ya.

Quema nopa israelitame tlajtlacolchijque

(Ex. 31:18 – 32:25)

8 “Ipan nopa tepetl Sinaí anquicuesol-macaque TOTECO huan yaya tlahuel cuan-lanqui ica amojuanti hasta quinequiyaya amechtzontlamiltis. **9** Ya nopa panoc quema nitlejcotoya ipan nopa tepetl para nijselis tlen TOTECO nopa ome tepatlactli ica nopa camanal sencahuali catli quichij-toya amohuaya. Huan nopona nimocajqui 40 tonali huan 40 yohuali huan amo tleno nijcuajqui, niyon niquijic. **10-11** Huan que-ma tlanqui nopa tonali, TOTECO nechmac-ac nopa ome tepatlactli campa tlajcuiloj-toya ica imacpil. Huan nopa ome tepatlactli quipixqui nopa tlanahuatilme catli TOTECO nechmacac itzonatipa nopa tepetl quema camanaltic tlen tlataljco nopa hueyi titl ipan nopa tonali quema nochí se-quinoc israelitame mosentilijtoyaj tepe-tzintla. **12** Huan quema nechmacac nopa tepatlactli, nechilhui ma nimoisihuilli huan ma nitemo hasta campa itztoyaj no-

chi anisraelitame, pampa quiijto para no-pa nomasehualhua catli niquinquixti ipan tlali Egipto ya mocuapolojtoyaj. Tlahuel nimantzi quielcajque nopa cuali ojtlí catli quinnahuatjtoya ma quitoquilica. Ya mo-chijchihuilijtoyaj se tlaixcopincayotl tlen oro tlaatiltli.

13 “Nojquiya TOTECO quiijto para ya quiitztoya para tlahuel titzontochontique tiisraelitame. 14 Huan nechilhui ni camanalí: ‘Techtlacahui, pampa niquintzontlamlitis huan niquinixpolos tlen ni tlalipac-tli, pero ipan ta njichihuas se tlamantli masehualme catli más quipiyase chica-hualistli huan más miyaqui que injuanti.’ Quej nopa nechilhui.

15 “Huan quema nitemoyaya tlen nopa tepetl catli tlatlayaya, njihualicayaya ipan nomax nopa ome tepatlactli catli quipix-qui nopa camanal sencahuali. 16 Huan niquitac para amojuanti huan amotatahua antlajtlacolchijtoyaj ica TOTECO Dios, huan anmochihuilijtoyaj se becerro tlen oro tlaatiltli para anquihueyichihuase. Ya anquitlalcahuijtoyá nopa cuali ojtlí catli anmechnahuatjtoyá xijtoquilica para san ya xijhueyichihuaca. 17 Huajca njicuamaj-cajqui nopa ome tepatlactli catli nijpixto-ya nomaco huan nijtlamitlapánqui amoix-tla. 18 Teipa sempa nimotlancuaixtlapacho iixpa TOTECO para seyoc 40 tonali huan 40 yohuali. Huan amo tleno njicuaj-qui, niyon niquijic, pampa tlahuel antlajtlacolchijtoyaj iixpa, huan tlahuel anquicualanijque TOTECO. 19 Na nojquiya nimo-majmatijtoya por icualancayo TOTECO ica amojuanti pampa quinequiyaya anmech-tzontlamiltis. Pero teipa TOTECO sempa nechcaquili catli nijtlajtlani huan amo anmechmicti. 20 Huan nopa tonal TOTECO nojquiya cualantoya ica Aarón huan qui-nequiyaya quitzontlamiltis, pero na nimo-tlatlajti por ya huan quicahuili ma itzto. 21 Huan niquitzqui nopa becerro catli ica antlajtlacolchijtoyaj huan catli anmochij-chihuilijtoyaj para anquihueyichihuase, huan njimajcrajqui ipan tliltl. Huan teipa njichijqui cuechtic hasta elqui san quen cuanextli huan nijtepejqui ipan se atlajtl catli temoyaya ipan nopa tepetl.

22 “Nojquiya sempa anquicualanijque TOTECO quema tiitztoyaj campa itoca Tabera, huan campa itoca Masah huan campa itoca Kibrot Hataava. 23 Huan sempa anquicualanijque ipan Cades Barnea, quema TOTECO anmechnahuati: ‘Xitlejcoca huan ximoaxcatitj nopa cuali tlali catli ni-mechmacatoc.’ Sempa anmotzontochonchijque huan amo anquineltoquilijque para anmechpalehuisquía, huan amo anquichijque catli anmechilhui. 24 Quena, hasta quema achtihui nimechiximatqui huan hasta ama, nochipa anmotzontochonchij-toque ica TOTECO. 25 Yeca nimocajqui ni-moixtlapachojtoc iixpa TOTECO para 40 tonali huan 40 yohuali pampa yaya quiijtojtoyaj para anmechtzontlamiltisquia.

26 “Huan nimotlatlajti ica TOTECO huan niquilhui: ‘TOTECO Dios, ta catli más tijpiya tlanahuatili, amo xiquintlamilti ni miyac momasehualhua catli ta tiquinselijtoc para moaxcahuá. Ta catli tiquinmanahuijtoc ica mohueyitilis. Quena, taya catli tiquinquixti ipan tlali Egipto ica hueyi chicalistli.’ Niquilhui: 27 ‘Amo xijtlachili inintzontochonyo ni masehualme, niyon inintlaixpanolhua huan inintlajtlacolhua. San xiquinelnamiqui motequipanojcahuá Abraham, Isaac huan Jacob tlen huecjaya.’ 28 Niquilhui: ‘Amo xiquincahuili ma quiijtoca nopa masehualme ipan nopa tla-li campa techquixti para ta, TOTECO, amo tihuelqui techhuicas ipan nopa tlali catli techtencahuilijtoyá, o san techcualanca-itayaya huan yeca techquixti san para techmictis ipan ni huactoc tlali.’ 29 Niquilhui: ‘Ni momasehualhua huan moaxcahuá catli tiquinselijtoc huan catli ta tiquinquixti ipan tlali Egipto ica mohueyí chica-hualis.’ Quej nopa niquilhui TOTECO.

Nopa yancuic camanal sencahuali

(Ex. 34:1-10)

10 “Huajca ipan nopa tonal TOTECO nechilhui sempa ma nijtequi ome tepatlactli catli san se quen nopa catli achtihui huan sempayano ma nittlejco ipan te-petl para nicamanaltis ihuaya. Huan teipa nechilhui ma tijchihuase nojquiya se caxa tlen cuauhuitl. 2 Yaya quiijto para sempaya-

no quiijcuilos ipan nopa yancuic tepatlacme nopa camanali catli quiijcuilojtoya ipan nopa tepatlacme catli achthuiya huan na niqquintlapanqui. Huan nechilhui para teipa ma niquinajocuis nopa tepatlacme ipan nopa caxa.

3 “Huajca nijchijqui se caxa ica cuahuitl catli itoca acacia, huan nojquiya nijtejqui nopa ome tepatlactli catli yancuic huan nitlejcoc sempa ipan tepetl. 4 Huan TOTECO quiijcuilo ipan nopa tepatlactli nopa majtlactli tlanahuatilme, quen qui-chijtoya achthuiya quema camanaltic amohuaya tlen tlatalco nopa tlilti ipan nopa tepetl quema nochí anmosentilijtoyaj tlatzintla. Huan nechmacac nopa tepatlactli, 5 huan nihualtemoc tlen nopa tepetl. Huan quen nechnahuatijtoya TOTECO nijtlali ipan nopa caxa catli quichijchijtoyaj masehualme huan noja nopona eltoc.”

6 (Huan teipa tiisraelitame tiquistejque campa iniamel iconehua Jaacán, huan tinejenque hasta Mosera. Huan nopona mijqui Aarón huan tijtoque. Huan Eleazar, icone Aarón, mochijqui hueyi totajtzi. 7 Huan nopona tiquisque huan tiyajque para Gudgoda, huan tlen nopona tiyajque Jotbata campa onca miyac hueyame. 8 Huajca nopona TOTECO, pampa hueyi iyolo, quintlapejpeni nopa hueyi familia tlen Leví para ma quihuicaca nopa caxa catli quipiya nopa majtlactli tlanahuatilme catli elqui nopa camanal sencahualli catli TOTECO quichijtoya tohuaya. Nojquiya TOTECO quitlapejpeni nopa levitame para ma moquetzaca iixtla. Quintlapejpeni para ma quitequipanoca huan ma tetiochihuaca ica itequiticayo. Huan ya nopa quichihuaj hasta ama. 9 Huan yeca nopa levitame amo quiselise tlali para iniaxca quen anisraelitame catli aniniicnihua quiselise, pampa levitame quiselise TOTECO para iniaxca. Quej nopa yaya quiijtojtoc.)

10 “Huan na, niMoisés, niitztoya ipan nopa tepetl para seyoc 40 tonali huan 40 yohuali, quen achthui nijchijtoya. Huan sempa njtlajtlani TOTECO para amo ma anmechtzontlamilti huan sempayano nechtlacaquili.

11 “San nechilhui: ‘Ximocuallatlí para xiquinyacana ni israelitame para ma qui-tlanitij nopa tlali catli niqquintencahuili ininhuejcapan tatahua.’

Catli TOTECO tlajtlani

12 “Huan ama ya ni catli tlajtlani TOTECO Dios, yaya catli moTeco, ma tijchi-huaca tiisraelitame. Quinequi ma tiquimacasica huan ma tijtoquilica iojhui. Qui-nequi ma tiquicnelica huan ma tijtequipanoca ica nochí toyolo huan toalma. 13 Qui-nequi ma tijchihuaca nochí nopa tlana-huatilme huan leyes catli nimechilhuía ama para huelis tiitztose ica cuali. 14 Xij-matica para nochí ni tlaltipactli huan nochí ilhuicactli hasta nopa ilhuicac catli más huejcpa, huan nochí catli eltoc ipani, nochí iaxcahua amoTECO Dios. 15 Pero masque tlahuel hueyi TOTECO, yaya quin-icneli amohuejcapan tatahua, huan quin-tlapejpeni san inijuanti huan amojuanti, aniniixhuihua, tlen nochí masehualme ipan ni tlaltipactli para anelise aniaxca-hua quen anquikitaj para eltoc ama.

16 “Huajca xijquixtica catli fiero ipan amo yolo huan ayacmo ximotzontochon-nequica iixpa TOTECO.

17 “TOTECO Dios, yaya catli toTeco tojuanti, yaya nopa Dios catli más hueyi tlen nochí catli quintocaxtiaj diores. Más hueyi que nochí catli quintocaxtiaj tecojme. Quena, tlayacantoc tlen nochí masehualme. Yaya onpano hueyi huan onpano qui-piyya chicahualistli hasta temajmati. Amo aqui quichicoicnelía huan amo aqui huelis quimacas se tlenijqui para ma quichihuili se favor. 18 Yaya quinchihuila catli xitla-huac catli icname huan cahual ahuime. Quinicnelía seyoc tlali ehuani catli ama mopantía amohuaya, huan quintlamaca huan quinoyontía. 19 Huajca amojuanti, nojquiya monequi xiquinicnelica seyoc tlali ehuani pampa nojquiya aneliyayaj seyoc tlali ehuani ipan tlali Egipto.

20 “Xijtlepanitaca amoTECO Dios huan san ya xijhueyichihuaca. Xiitztoca ante-machme iixpa, huan san ipan ya itoca xi-tlatestigoquetzaca. 21 Pampa san yaya quinamiqui para anquihueyichihuase,

pampa san yaya Dios huan san yaya itztoc amoTeco Dios. Yaya iseltzi quichijtoc no-pa huejhueyi tetzatl catli anquitztoque, huan nopa huejhueyi tlamtli catli temajmati. ²²Quema tohuejcapan tatahua ajsitoj tlali Egipto san eliyayaj 70 mase-hualme, pero ama TOTECO techchijtoc tiisraelitame ma timomiyakilica hasta tiitz-toque timiyaqui quen ininmiyaca nopa si-tlalime tlen ilhuicac.

Ihueyitilis TOTECO

11 “Huajca monequi xiquicnelica amoTECO Dios huan mojmostla xij-chihuaca nochí nopa tlanahuatilme, leyes huan tlamachtilistli catli ya amechmacatoc. ²TOTECO Dios quinequi xijmachilica cuali quen ya quintlanamictia masehualme catli amo quinequij quitoquilise. Amo niquincamanalhuía amocone hua. Inijuantí amo quiiximajtoque, niyon amo quiitz-toque nochí nopa tlamtli huejhueyi ica catli tetlatzacuilty TOTECO. Amo quiitztoque itlatlanex huan ihueyi chicahualis huan quenicatzta tetlajtolxitlahua. ³Amo quiitztoque nopa tlanextiljucayotl huan huejhueyi tetzatl catli TOTECO quichijqui ica Tlanahuatijquetl Faraón huan imase-hualhua ipan tlali Egipto. ⁴Amo quiitztoque catli quichijqui ica nopa Egipto soldados huan imincahuayos huan inintlahui-lanca carros, huan quenicatzta quinisahui ipan nopa Hueyi Atl Chichiltic quema ini-juanti techtepotztcayayaj. TOTECO quin-tzontlamilti huan hasta ama iniihuihua amo tleno hueli techchihuilise. ⁵Amoco-nehua amo quimati j nochí catli TOTECO amechchihuilijtihualajtoc ipan nopa huactoc tlali huan hasta tiascicoj nica. ⁶Ayamo itztoyaj quema TOTECO quitlatza-cuilty Datán huan Abiram, iconehua Eliab huan iixhuihua Rubén. Huan amo quiita-que quenicatzta tlapoqui tlali huan quin-tolo ica nochí ininfamilias, ininyoyoncal-hua huan ica nochí catli quipixtoyaj que-ma nochí tiisraelitame tijtlachilijtoyaj. ⁷Pero amojuanti catli anhuejhueyi nochí anquiitztoque huan anelque antestigos tlen nopa huejhueyi tlamtli catli qui-chijqui TOTECO.

Tlatiochihualme ipan nopa tlali tlatencahuali

⁸“Huajca xijchihuaca nochí nopa tla-nahuatilme catli ama nimechmacatoc huan quej nopa anelise antejetetique para ancalaque huan anmoaxcatise nopa cu-a-li tlali campa anajsitj. ⁹Huan quej nopa anitztose miyac xihuitl ipan nopa tlali campa nochí onca hasta onmocahua itlaj-ca catli TOTECO quintencahuli amohuej-capan tatahua para amechmacasquía amojuanti catli aniniixhuihua. ¹⁰Nopa tlali campa anajsitj amo quen nopa huac-toc tlali tlen Egipto campa anquistejque campa monequiyaya anquitocase sesen xi-nachtli, huan teipa ica amoicxihua anqui-cuatopehuayayaj nopa atl ipan aojme pa-ra anquiatequise pampa ica miyac tequitl nopa tlali huelqui temaca itlajca. ¹¹Pero nopa tlali campa anajsitj para anmoaxca-tise elis se tlali campa onca tepeme huan tepexime. Nopa tlali quitequihuía catli huala tlen ilhuicac para quiatzejzelhuis. ¹²Ya nopa se tlali catli amoTECO Dios isel-tzi quimocuitlahuía huan yaya quitlachi-lia tlen ipejya hasta itlamiya sesen xihuitl.

¹³“Sintla ica miyac tlamocuitlahuilia anquichihuase nochí ni tlanahuatilme ca-tli ama nimechmacatoc huan anquicneli-se amoTECO Dios, huan anquihueyichi-huase ica nochí amoyolo huan ica nochí amoalma, ¹⁴yaya quichihuas ma tlaquiyahuis sesen huelta quema monequi para nopa tlali amechmacas yejyectzi pixquis-tli tlen trigo, aceite huan cuali xocomeca atl. ¹⁵Nojquiya TOTECO quichihuas ma yoli cuali sacatl ipan potrero para amotla-piyalhuia huan anquipyayase tlacualisti hasta onmocahuas.

¹⁶“Pero ximomocuitlahuica miyac pa-ra amo tleno amechcrajcayahus para an-moiyocacahuas tlen TOTECO. Amo tleno o amo aqui ma amechchihua anquinhue-yichihiuse tiotzitzí huan amotlancua-quetzase iniixtla. ¹⁷Sintla ya nopa anqui-chihuase, TOTECO cualanis amohuaya huan amo quicahuilis ma tlaquiyahuis. Quej nopa, nopa tlali amo temacas itlajca huan nimantzi anmiquise ipan nopa cuali tlali catli anquiselise.

Xiquinmachtica amoconeuhua

18 "Huajca monequi xicajocuia ni camanali ipan amoyolo huan ipan amotlal-namiquilis. Ma eli quen anquilpisquáj ipan amomax o ipan amocuajtol para anquineltocase huan amo anquinelcahuase. 19 Xiquinmachtica amoconeuhua ni tlana-huatilme. Xiquinpoohulica ipan ojtlí quemá annentinemise. Xiquinmachtica quemá anmocochtecate huan quemá anmehuase. 20 Xiquicuiloca ni tlana-huatilme ipan amotlaquetzalhua huan ipan amo-cuapertas ipan amochajchaj. 21 Quej no-pa amonemilis huan ininnemilis amoco-nehua nelhuejcahuas ipan nopa cuali tlali catli TOTECO anmehctencahuilijtoc. Amo-xhuihua itztose nopona nochí tonali quemá oncas ilhuicactli huan tlaltipactli.

22 "Sintla senquistoc anquichihuase nochí ni tlana-huatilme catli ama nimech-na-huatía xijchihuaca, huan anquicnelise amoTECO Dios huan anquitoquilise ipan nochí iojhui, 23 TOTECO quintojtocas amoixtla nochí nopa masehualme catli ama npona itztoque. Anquintlanise masque más miyau-qui huan más quiipyaj chicahualistli que amojuanti. 24 Campa hueli campa anyase, nopa tlali mochihuas amoaxca. Inepa amo-ttal pehuis campa nopa huactoc tlali ipan sur huan yas hasta campa tlali Líbano ica norte, huan tlen nopa hueyatl Eufrates cam-pa hualquisa tonati yas hasta nopa Hueyi Atl Mediterráneo campa temo tonati. 25 Amo aqui huelis motlalis ica amojuanti pampa TOTECO Dios quinchihuilis ma momajmatica nochí masehualme huan ma an-mechimacasica campa hueli anpanose, quen yaya quijtojtoc para quichihuas.

26 "Huajca ama njtlali amoixpa tlatio-chihuali o tlatelchihuali para xijtlapejpe-nica catlique anquinequij. 27 Pampa an-quiselise hueyi tlatiochihuali sintla anquineltocase nochí itlanahuatilhua TOTECO Dios catli nimechnahuatijtoc ama. 28 Huan tlatelchihuali anquiselise sintla anquitoquilise tiotzitzí catli ama amo an-quiniximatij. Anquiselise tlatelchihuali sintla amo anquineltocase itlanahuatilhua o sintla anquicahuase iojhui TOTECO Dios catli nimechnextilijtoc.

29 "Quema amoTECO Dios ya anmech-huicatos ipan nopa tlali catli amoaxcati-se, xijtlalica se tlatiochihuali ipan tepetl Gerizim huan se tlatelchihuali ipan tepetl Ebal. 30 Ni tepeme eltoc nepa seyoc lado Jordán para campa temo tonati ipan inintial nopa cananeos catli itztoque ipan tla-mayamitl iixmelac altepetl Gilgal catli mocahua nechca nopa ahuacuame campa itoca More. 31 Ama ya nechcatitoc para anquixcotonase hueyatl Jordán para an-quitlanitij nopa cuali tlali catli amoTECO Dios anmechmactilis. Huajca quemá ya anquitlantose nopa tlali huan ya ipan an-itztose, 32 xijchihuaca nochí ni tlana-huatilme catli ama nimechmactilijtoc.

Ma quihueyichihuaca TOTECO san ipan nopa yoyon tiopamitl

12 "Ya ni nopa tlana-huatilme huan le-yes catli monequi anquichihuase nochí amonemilis ipan nopa tlali catli TO-TECO ininDIOS amohuejcapan tatahua an-mechmacas para amoaxcatise.

2 "Monequi senquistoc xiquintlamiltica nochí nopa lugares campa nopa mase-hualme quinhueyichihuaj inintiotzitzí ipan nochí nopa altepeme catli anquintlanise. Xjsosoloca nopa lugares masque el-toce ipan tepeme, o tlachiquiltipa o itlaj huejhueyi cuame ica ininxihuiyo. 3 Xijtlahuisoca nochí tlaixpame, huan xijtlatlapatzaca nochí nopa teme catli quinitaj para tlatzejzeloltique. Xijtlatica nochí tlaque-tzalme campa quihueyimatij nopa tiotzi Asera pampa tlahuel fiero catli quinextía npona. Xiquintlamiltica nochí nopa tla-ixcopincayome tlen nochí sequinoc inin-tiotzitzí. Ma amo mocahua niyon se tlaman-tli catli anmechelnamiquilts para no-pona tlahuejchihuayayaj.

4 "Amo hueli anquihueyichihuase amo-TECO Dios ica tlacajcahualistli campa hue-li quen nopa masehualme npona quichihuaj. 5 San hueli anquihueyichihuase huan anquimacase tlacajcahualistli ipan itiopa campa yaya mocahuas. Huan yaya quitlachilis ipan nochí nopa tlalme catli nochí amofamilias quiselise huan quitla-pejpenis canque quinequi ma mocahuas

ichaj. Huan nopona huelis anyase para anquihueyichihuati. **6** Nopona anquinhuicase tlapiyalme para tlacajcahualistli tlatlatili, huan amodiezmo, huan nochi nopa tlacajcahualistli catli anquitlananase huan anquihuisose iixpa para anquimacase. Huan nopona anquinhuicase ne sequinoc tlacajcahualistli catli monequi quema anquitencahuilise TOTECO tlaque anquichihuase. Nojquiya nopona anquihuicase nopa tlacajcahualistli catli anquimacase ica amopaqilis, huan nojquiya nopa tlacajcahualistli por amoachtihui ejcahua tlen amohuacaxhua huan amoborregojhua. **7** Huan san nopona huelis anilhuichi-huase ica amofamilias huan anquicuase nopa nacatl tlen amotlacajcahualis catli anmechtcaros. San nopona campa ichaj amoTECO Dios huelis anpaquise ininhuaya amofamilias ica nopa pixquistli catli quisqui tlen amotequi huan por nochí más catli yaya ica anmechtiochijtoc.

8 “Nopona sesen masehuali ayacmo huelis quichihuas catli ya quinequi quen anquichihuaj ama. Nopona monequi senquistoc anquitoquilise ni tlanahuatilme. **9** Ama ayamo anajsitij campa amosiyaj-quetzase ipan nopa tlali catli amoTECO Dios anmechmacas, **10** pero se tonal anquipanose ni hueyatl Jordán huan ya anajsitij ipan nopa tlali catli anmechmactilis huan anitztose anmajcajtoque tlen nochí amocualancaitacahua catli achthuiya anmechyahualohuayayaj. Yeca ayacmo monequi anmajmatose. **11** Huajca ipan nopa tonali monequi anquinhuicase nochí tlacajcahualistli catli nimechnahuatijtoc hasta nopa lugar catli amoTECO Dios qui-tlapejpenis para ichaj. Anquinhuicase tlapiyalme para tlacajcahualistli tlatlatili, huan sequinoc tlacajcahualistli, huan amodiezmo, huan amotlacajcahualis tlahuisol, huan nochí tlacajcahualistli catli anquimacase quema anquitencahuilijtose TOTECO para anquichihuase se tlenijqui. **12** Huan nopona iixtla amoTECO Dios anilhuichi-huase san sejco ica amocone-hua huan amotequipanojcahua. Nojquiya xi-quinnatzaca nopa levitame catli itztose ipan amoaltepe, pampa inijuanti amo qui-

selise tlali para iniaxca quen amojuanti anquiselise.

13 “Pero ximomocuitlahuica para amo xiquintlatica tlapiyalme para TOTECO san campa hueli. **14** San huelis anquichihuase ipan nopa lugar catli yaya quitlapejpenis para ichaj ipan itlal se hueyi familia. Nopona huelis anquimacase tlacajcahualistli TOTECO huan anquichihuase nochí catli nimechnahuatijtoc.

15 “Pero quena, huelis anquinmictise amotlapiyalhuia campa amochajchaj ipan tlen hueli tonal para anquicuase ininnacayo. Xijcuaca nochí nopa nacatl catli anquinequij quen TOTECO Dios amechtiochijtos ica tlapiyalme. Huan nochí masehuali-me huelis quicuase nopa nacatl masque tlapajpacme iixpa TOTECO quen quijto-hua tlanahuatili para totajtzitzi, o amo tlapajpacme quen hasta ama anquinmictiyaj huan anquincuayayaj nochí tlamantli masame campa hueli. **16** San nopa estli amo huelis anquicuase. Monequi anquito-yahuase tlalchi quen elisquía san atl.

17 “Pero quema anajsitij ipan nopa tlali, amo huelis anquinmictise, niyon amo huelis anquicuase se tlapiyali para se tlacajcahualistli nopona ipan amoaltepe o campa amochajchaj. Amo huelis anquicuase ipan amoaltepe nopa diezmo tlen amotrigo, o amoxocomeca iayo, o amoaceite pampa iaxca TOTECO. Niyan nopena amo huelis anquincuase nopa achthui-ehuani tlen amohuacaxhua, niyon amoborregojhua catli elise se tlacajcahualistli para TOTECO. Amo xijcuaca nopona niyon se tlapiyali catli anquijtojque anquimacase TOTECO quen se tlacajcahualistli. Masque elis se tlacajcahualistli pampa anquitencahuilijque TOTECO tlaque anquichihuase, o masque se tlacajcahualistli catli san ica amopaqilis anquimacase, o se tlacajcahualistli catli anquihuisose iixtla para anquimacase. **18** Nochi ni tlacajcahualistli monequi xiquinmictica nechca tiopamiti iixtla amoTECO Dios campa yaya qui-tlapejpenis para nopona quiquetzas ichaj. Nopona iixtla amoTECO Dios anquincuase ininhuaya amocone-hua, amotequipanojcahua huan nopa levitame catli ehuaj

amoaltepe. Quej nopa san sejco huelis anpaquise por itlajca nochí amotequi. **19** Nochí tonali ipan amonemilis ximomocuitlahuica para amo anquielcahuase anquinamajmacase catli anquipiyaj nopa levitame catli amohuaya itztoque.

20 “Quema amoTECO Dios quihueyilis nopa tlali quen quijito quichihuas huan anquinequise anquicuase nacatl, huan anitztoque huejca tlen nopa tiopamitl huelis anquicuase ipan tlen hueli tonal **21** masque huejca anitztoque tlen nopa lugar catli TOTECO Dios quitlapejpenis para ichaj. Huelis anquinmictise amohuacaxhua, o amoborregojhua catli TOTECO amnechmacatos, huan huelis anquicuase catli anquinequise npona campa anitztose quen ni mechnahuatijtoc. **22** Quena, quen ama onca caquihuili para anquinmictise masame campa hueli huan catli hueli masehualni masque tlapajpactli o amo tlapajpactli huelis quicuas, teipa anquipiyase caquihuili para anquicuase ininnacayo sequinoc tlapiyalme ipan nopa tlali sintla huejca anitztoque tlen campa tiopamitl. **23** Pero monequi xijpiyaca miyac tlamocuitlahuili para amo xijcuaca nopa estli, pampa nopa estli quihuica inemilis nopa tlapiyali. Huajca amo quinamiqui anquicuase inemilis se tlapiyali ica nopa nacatl. **24** Monequi anquitoyahuase ieso tlalchi huan ma yohui quen elisquía atl. **25** Amo xijcuaca estli para amojuanti huan amocnehua itztose cuali pampa anquichijtose catli xitlahuac iixpa TOTECO. **26** Pero nopa tlamantli catli anquiiyocatlalijtoque para nemactli o tlacajcahualistli para TOTECO, o catli monequi anquimacase quema anquitlamiltise catli anquitencahuilijtoque anquichihuase, nochí ya ni monequi anquinextise iixtlá TOTECO ipan nopa lugar campa yaya quitlapejpenijtos. **27** Huan san npona ipan itlaixpa amoTECO Dios huelis anquitlatise nopa tlacajcahualistli tlatlatli. Huan nopa sequinoc tlacajcahualistli monequi anquitoyahuilise nopa estli ipan tlaixpamitl, pero nopa nacatl huelis anquicuase.

28 “Xijtlacaquilica cuali huan xijchihuaca nochí catli nimechnahuatijtoc para

quej nopa amojuanti huan amoconeuhua ica cuali anitztose nochipa, pampa anquichijtose catli quinamiqui huan catli xitlahuac iixtlá amoTECO Dios.

Amo quema ma quinhueytlatlaca tiotzitzí

29 “Teipa amoTECO Dios quintzontlamlitis nochí nopa masehualme, huan anquiselise nopa tlali para amoaxca huan npona anitztose. **30** Quema ya panotos nochí ya nopa, amo ximomasiltica ica inintlatnamiquilis nopa masehualme catli achtihiuya itztoyaj npona huan TOTECO quintojtocac amoixtla. Amo ximonejnehuilica: ‘¿Quenicatzá quichijque ne masehualme catli itztoyaj nica achtihi para quinhueyichihuase inintiotzitzí?’ Amo ximonejnehuilica para nojquiya anquinequise anquinhueyichihuase. **31** Pampa nochí tlamantli catli onpano fiero catli amoTECO Dios amo quijijyohuá huan amo quinequi quiitas, ya nopa catli quichihuaj nopa masehualme catli ama itztoque ipan nopa tlali para quinhueyichihuaj inintiotzitzí. Hasta quintlatíaj ininconeuhua ipan tlitl para quinmacase inintiotzitzí quen elisquía se tlacajcahualistli.

32 “Huajca monequi ximomocuitlahuica miyac para anquichihuase nochí catli nimechnahuatijtoc. Amo xijquixtilica, niyon amo xijmiyaquilica ni tlanahuatilme.

Amo quema xiquinhueyichihuaca tiotzitzí

13 “Teipa huelis monextis campa amojuanti se catli quijitos para yaya se tlajtol pannextijquetl, o yaya se tlachixquetl catli tlachiya ipan temictli huan ipan tlanextili. **2** Huelis amechyolmehuas tlaque hualas achi nepa huan teipa nelía mochihuas catli amechpohuilejtoc. Pero sintla nojquiya amechihilhuis: ‘Ma tiyaca huan ma tiquintoquilica nopa tiotzitzí catli amo anquiniximatij, huan ma tiquinhueyichihuaj,’ **3** amo xijneltoquilica. Pampa ica catli quijtohua nopa tlajtol pannextijquetl o se tlachixquetl, TOTECO Dios amechyejyecohua para quimatis sintla anquicnelíaj ya ica nochí amo yolo huan ica nochí amoalma. **4** Monequi xijtoquilica san amoTECO Dios huan san ya xi-

quimacasica. Monequi xijchijtinemica itlanahuatil huan xijtlacaquilica catli amechilhuía. Monequi san ya xijhueyimatica huan ipan ya ximotlatzquilica.⁵ Huan nopa tlajtol pannextijquetl o tlachixquetl monequi xijmictica pampa amechilhui ximoajcomanaca ica amoTECO Dios catli amechmanahui campa antetequipanohuayayaj san tlapic ipan tlali Egipto. Quinequiyaya amechiyocatlalisis tlen nopa ojti catli TOTECO amechnahuatijtoc xijtoquilica. Huan sintla anquimictise, huajca anquiquixtise catli amo cuali tlen amojuanti.

⁶“Monequi xijmictica tlen hueli masehualis masque se catli anquicnelíaj sintla quinequi amechcuapolos para anquihueyichihuase tlen hueli tiotzi. Huajca sintla se moicni, o se moichpoca, o motelpoca, o mosihuá catli tiquicnelíia, o se mohuam-pox catli más nechca mitzichtacailhuis para cuali anquinhueyichihuase tiotzitzicatli ta huan amohuejcapan tatahua amo anquiniximatiyayaj, monequi xijmictica.⁷ Sintla quijtohua xijtoquilica inintiotzitzimasehualme catli itztoque nechca, o huejca, o nica o npona ipan nochitlalipactli;⁸ amo xiquintlacaquilica. Amo xiquintquilica nopa tiotzitzicatli, niyon amo xijtlaso-jtlaca nopa masehuali. Monequi xijnexatica tlamiyacapa catli quijtojtoc,⁹ huan teipa monequi xijmictica. Ta achtihui monequi ximomatlanana ica ya quema nochimosenhilme para tijmajcahuilis nopa achtihuitetl, huan teipa nochisequinoc masehualme nojquiya quichihuase.¹⁰ Xijtepachoca hasta miquis, pampa yaya quinequiyaya amechiyocatlalisis tlen TOTECO Dios catli amechquixti ipan tlali Egipto campa antetequipanohuayayaj san tlapic.¹¹ Huan quej ni nochisequinoc israelitame quimatisse huan majmahuise huan amo aqui momemas para nojquiya quichihuas se tlamanli fiero quej nopa.

¹²“Huan quema amoTECO amechmacatos nopa tlali, ya ni catli anquichihuase sintla anquicaquise para onca se altepetl¹³ campa itztoque israelitame catli amo cuajcualme huan catli amo quineltocaj TOTECO. Sintla anquicaquise para itzto-

que catli quincuapolohuaj sequinoc catli itztoque npona huan quinnextilíaj ma quinhueyichihuaca tiotzitzicatli amo anquiniximati,¹⁴ monequi xijtlatzintoca cuali campa hueli quenicitza eltoc nopa tlamanli npona. Huan sintla npona tlatlajco amojuanti melahuac eltoc se altepetl tlen masehualme catli quichihuaj ntlamanli catli TOTECO amo quinequi qui-¹⁵itas, monequi xiquinmictica ica machete nochicatli npona onca.¹⁶ Teipa xij-sentilica nochicatli pajpatiyo catli oncac ipan nopa altepetl huan xijtlalica tlatlajco tianquis. Huan xijtlatica huan nojquiya xijtlamiltatica nochicatli npona altepetl quen se tlacajcahualistli tlatlatili para amoTECO Dios. Huan quej nopa, npona altepetl moca-huas mowntonijtoc tetl tlasosoltic huan ayacmo quema quicualchijchihiuase.

¹⁷“Amo ximoaxcatica tleno catli eltoya ipan npona altepetl. Nochi xijtzontlamiltica huan xijtlatica para TOTECO amo cuanis amohuaya quen quincualancaitayaya npona masehualme ipan npona altepetl. Huan quej nopa amechtlaso-jtlas, huan amechicnelis huan amechchihuas ximo-miyacuquilica miyac quen quintencahuili amohuejcapan tatahua para quichihuas.¹⁸ Huan ya npona quichihuas pampa anquineltoquilitose itlanahuatil amoTECO Dios, huan anquichijtose nochicatli npona tlana-huatilmecatli na nimechmacatoc ama, huan anquichijtose san catli xitlahuac ixtla TOTECO.

14 “Aniconehua TOTECO Dios, huajca amo xijchihuaca catli sequinoc quichihuaj. Amo ximotequilica niyon se tlamanli ipan amotlacayohua quen quichihuaj para quinhueyitlalise inintiotzitzicatli, niyon amo xijhuatanica amocuaixpa quema se acajya miquis.² Anitztoque masehualme catli antlaiyocatlalilme para amoTECO Dios pampa yaya amechtlapejpenijtoc para aniaxcahua. Amechtlapejpenijtoc tlen nochisequinoc xinach masehualme ipan tlaltipactli para anelise se tlamanli masehualme catli senquistoc ya iaaxca.

**Tlapiyalme tlapajpactique
huan catli amo tlapajpactique**
(Lv. 11:1-47)

3 "Amo xijcuaca niyon se tlapiyali catli amo tlapajpactic iixtla TOTECO.

4 "Ya ni inintoca tlapiyalme catli huelis anquincuase: torojme, borregojme, chivome, 5 nochi tlamantli masame, huan nopa cuatitlan chivojme huan borregojme.

6 "Huelis anquincuase nochi nopa tlapiyalme catli quicuajcuaj ompa inintlacualis huan nojquiya quipiyaj iniiistihua maxaltic. 7 Pero amo huelis anquincuase tlapiyalme sintla san quicuajcuaj ompa inintlacualis, pero amo maxaltic iniiistihua, o maxaltic iniiistihua, pero amo quicuajcuaj ompa inintlacualis.

"Huajca amo xiquincuaca camellos, cuatochime huan pesojme, pampa masque quicuajcuaj inintlacualis ompa, amo maxaltic iniiistihua. Nochi inijuanti mocahuaj amo tlapajpactique para amojuanti.

8 "Huan pitzome nojquiya amo tlapajpactique pampa masque quipiyaj iniiistihua maxaltic, amo quicuajcuaj ompa inintlacualis. Amo xijcuaca nacatl tlen ni tlapiyalme, niyon amo xiquitzquica inintlahoyhua catli mictoque.

9 "Ica tlapiyalme huan michime catli itztoque ipan atl, san huelis anquincuase catli quipiyaj ininpiletlapalhua huan nojquiya catli quipiyaj inincacahuayo. 10 Pero nochis sequinoc monequi anquinitase para amo tlapajpactique.

11 "Huelis anquicuase nochi tlamantli totome catli tlapajpactique. 12 Pero amo huelis anquicuase nopa tototl catli itoca hueyi cuajtli, niyon catli quitlapana omitl, niyon nopa tzopilotl catli itztoc nechca atl. 13 Amo hueli anquicuase niyon se tlamantli tzopilotl, 14 niyon se tlamantli cacalotl, 15 niyon nopa huejcapantic cuatotoli avestruz, niyon nopa cuajtli tlen tlayahua, niyon nopa atototl catli chipahuac. Amo hueli anquicuase niyon se tlamantli tlen cuajtli, 16 niyon nopa tololojtl, niyon nopa cuamojmojtl catli hueyi, niyon nopa cuamojmojtl catli ijcatoc ijhuiyo ipan itzonteco. 17 Amo xijcuaca nopa pelícano

catli patlani campa atl, niyon nopa cuajtli catli quincua tlapiyalme mictoque, niyon nopa tototl yayahuic catli quincua michime, 18 niyon nopa cigüeña, niyon nopa garza, niyon nopa atotome catli quipiyaj ininmetz huehueyac, niyon nopa tzole. Nochi ya ni amo tlapajpactique huan amo hueli anquincuase.

19 "Nochi tlamantli sayolime catli patlanij san sejco anquinitase para amo tlapajpactique huan amo huelis anquincuase. 20 Pero catli quipiyaj inieltlapal quen chapoltzitz hueli anquinitase para tlapajpactique, huan quena, huelis anquincuase.

21 "Amo xijcuaca niyon se tlapiyali catli mijqui iseltzi, pampa anitztoque anma-sehualme catli antlatzejzelotlique para TOTECO Dios. Pero, quena, huelis anquimacase o anquinemaquiltise nopa nacatl sequinoc tlali ehuani catli itztoque amo-huaya ipan amoaltepehua. Inijuanti queña, huelis quicuase.

"Amo xiquicxitica se pilchivojtzi ipan ilechi inana quen quichihuaj se tetlajchi-huijquetl.

Quenicatza ma temacaca inindiezmo

22 "Ximomocuitlahuica para sesen xi-huitil xiquiyocatlalica para TOTECO nopa diezmo catli quitocarohua tlen nochis catli anquipixcase. 23 Huan quema ya anquimacatose TOTECO Dios amodiezmox tlen tri-gó, xocomeca atl, aceite, huan amoachti-hui ejcagua tlen amohuacaxhua, amoborrregojhua huan amochivojhua, huajca huelis anquicuase catli anmechtocaros iixtla ya ipan nopa lugar catli yaya quitlapej-penis para quiquetzas ichaj para ipan itztos. Huan quej nopa anquimajtiyase an-quiimacasise TOTECO Dios para nochipa. 24 Huan se tonal quema TOTECO Dios anmechtiochihuas huan anmechmacas tlali, sintla amotlal mocahuas nelía huejca tlen nopa lugar campa yaya quiquetzas ichaj, huelis amo huelis annejnemise huan anquihuicase nochis tlamantli huan tlapiyalme catli mochihuam amodiezmo. 25 Sintla quej nopa eltoc, huajca huelis anquinemacase nopa diezmos tlen sesen tlamantli

huan san nopa tomi anquihuicase campa TOTECO Dios quitlapejpenijtos para ichaj. 26 Huan quema anajsitij, huelis anquihuase nochi catli amoilhuise más cuali. Huelis anquincohuase huacaxme, borregojme, xocomeca atl, o tlen hueli seyoc tlaili o tlamantli catli anquinequise para huelis anquimacase. Huan nopona teipa huelis anilhuichihuase huan anpaquise ixtla amoTECO Dios san sejco ica nochi amochampoyohua.

27 “Pero amo quema xiquelcahuaca xiquinmajmacaca catli anquipiyaj nopa levitame catli itztoque ipan amoaltepehua pampa amo quiselijtoque inintlat quen amojuanti.

28 “Huan sese eyi xihuitl monequi xiuyocatlalica amodiezmo tlen nochi pixquistli tlen nopa xihuitl huan xicajocuica ipan amoaltepehua. 29 Huan ya nopa anquinmacase nopa levitame pampa inijuanti amo quiselijtoque tlali, o xiquinmacaca sequinoc tlali ehuani catli ajsitoque amo-huaya, o catli icnotzitzti o cahual sihuame. Quej nopa inijuanti nojquiya huelis tla-cuase hasta ixhuise. Huan sintla quej nopa anquichihuase, amoTECO Dios amechtio-chihuas ipan nochi tlamantli catli anquichihuase.

Tlapojpolhuili tlen nochi tlahuquilistli
15 “Sesen chicome xihuitl monequi xiquintlapojpolhuica israelitame catli amechtlahuiquilijtose, 2 huan quej ni anquichihuase. Sintla sese israelita mase-huali quitlanejtijtoc ihuampox o iteixi-matca se tlenijqui, quema ajsis nopa xihuitl, ma quitlapojpolhui por catli quitlanejtijtoc. Amo ma quichihaulti ma qui-tlaxtlahui catli quitlahuiquiliyaya sintla yaya se israelita catli quitlahuiquilia pam-pa ya ajisco nopa xihuitl catli TOTECO qui-ixquetztoe para tlapojpolhuili tlen nochi israelita tlahuquilili. 3 Pero se seyoc tlali ejquetli catli amechtlahuiquilia, quena, noja hueli anquitlajtlanise ma ammech-cuepili catli amechtlahuiquilia ipan nopa xihuitl. Pero sintla elis se israelita catli amechhuiquilia, amo. 4 Para quej nopa amo itztose teicneltzitzti ipan nopa tlali ca-

tli anmoaxcatise, pampa amoTECO Dios nelia amechtiochihiwas miyac nopona, 5 sintla anquineltocatiyase nochi nopa tlanahuatilme catli ama nimechmacatoc. 6 Quena, amoTECO Dios amechtiochihiwas quen quijijtojtoc quichihuas, huan yeca anquipiyase para anquintlanejtise se-quinoc tlalme, pero anisraelitame amo quema monequis ammotlanehuise. Huan anquinnahuatise miyac tlalme huan inin-masehualhua, pero niyon se seyoc tlali ej-quetli amo huelis amechnahuatis.

7 “Quema amoTECO Dios amechmacas nopa tlali, sintla itztose sequin amoisraelita icnihua nopona catli nelia teicneltzitzti, amo ximochihuaca nel anyoltetique ica inijuanti. Niyon amo ximoitzcuinequica. 8 Xijtlapoca amomax huan ica paquillistli xiquintlanejtica nochi catli monequi. 9 Huan ximomocuitlahuica para amo xi-moilhuica para amo antetlanejtise pampa nechca para hualas nopa xihuitl chicome quema motlapojpolhuis nochi tlahuquilistli. Sintla quej nopa amoilhuise huan anquinextise anixcualantoque ica seyoc israelita catli mopantia ipan tlaohuijcayotl huan amo tlen anquitlanejtise, huaj-ca xijpiyaca cuidado pampa yaya huelis quinojnotzas TOTECO huan quipo-huilis catli anquichijtoque. Huan TOTECO quijitos para antlajtlacolchijtoque. 10 Monequi nochipa antepalehuise ica paquillistli huan amo ximochihuaca anitzcuime pampa sintla anquichihuase ni tlanahuatili, amoTECO Dios amechtiochihiwas ipan nochi tlamantli catli anpehuase anquichihuase. 11 Catli teicneltzitzti nochipa itztose ipan tlaltipactli huan yeca nimechnahuatia, xijpiyaca hueyi amoyolo inihuaya nochi catli quipanoj tlaohuijcayotl ipan amotlal, huan xiquinpalehuica miyac.

Xihuitl para quinmajcahuase tetequipanohuani

(Ex. 21:1-11)

12 “Sintla se israelita tlacatl o sihuatl mochihuas teicneltzi hasta monemacas ica ta para elis moaxca para mitztequipanos san tlamic, san huelis mitztequipanos chicuase xihuitl. Huan ipan xihuitl chico-

me tlen itequi, monequi tijmajcahuas para ayacmo elis moaxca. ¹³Huan quema tijmajcahuas, amo xijcahuil ma yohui san imax. ¹⁴Monequi xijmaca sequin motlapiyalhuas huan se parte tlen motrigo huan moxocomeca iayo catli cuali. Quena, xijmaca tlen nochí catli TOTECO ica mitztiochijtoc huan mitzmacatoc. ¹⁵Amo xiquelcahuaca para amojuanti nojquia antetequipanohuayayaj san tlaptic ipan tlali Egipto huan TOTECO Dios anmechmaquixti, huan yeca nimechmaca ni tlanahuatili.

¹⁶“Huan sintla se moisraelita tequipanojca quiijtohua amo quinequi mitzcahuas pampa mitzicnelia huan quipactia mochaj huan quiita para cuali tijmocuitlahuia, ya ni catli tijchihuas. ¹⁷Xijcui se hueyi huitzmalotl huan xijnechcahuilti campa puerta huan tijcyonilis inacas ipan puerta, huan quej nopa yaya mocahuas motequipanojca para nochipa. Nojquia san se hueli tijchihuas ica mosihua tequipanojca catli quinequis mocahuas mohuaya. ¹⁸Pero quema ajsis tonali para tijmajcahuas se motequipanojca huan neilia quistehuas, amo ximoilhui para amo cuali pampa monequi tijmajcahuas. Xiquelnamiqui para ipan nopa chicuase xihuitl mitzequipanojtoque cuali huan itequi ipati eliyaya ompa tlen itequi se peon. Huan nojquia motECO Dios mitztiochihuas ipan nochí tlamantli catli tijchihuas pampa tijmajcajqui ica cuali quen mitzna-huatjtoc xijchihua.

Iaxca TOTECO nochí achtihui ejca tlapiyalme

¹⁹“Nochi nopa oquichme catli achtihui tlacatij ipan amohuacaxhua o amoborregojhua, monequi xiquiniyocaquixtia para TOTECO Dios.

“Amo xijtequipanoltica nopa toro catli achtihui ehuas tlen amohuacaxhua, niyon amo xijximaca nopa achtihui ejca borrego. ²⁰Pampa monequi sesen xihuitl anquinmictise nopa achtihui ehuani para se tlacajcahualistli huan anquincause ica

amochampoyohua iixtla TOTECO Dios ipan nopa lugar catli yaya quitlapejpenijtos para quiuetzas ichaj. ²¹Pero sintla se achtihui ejca tlapiyal quipiya se tlenijqui catli amo cuali, amo huelis anquimacase TOTECO Dios para se tlacajcahualistli. Amo xijmacaca se tlapiyal catli xocuetzi, o huelis amo tlachiya, o quipiya seyoc tlamantli. ²²Pero nopa tlapiyalme, quena, huelis teipa anquincause ica amochampoyohua nopona campa anitztoque. Huan aqui hueli masehuali hueli quicuas, masque tlapajpactic o amo, quen ama, nochí hueli quicuase se masatl. ²³Pero amo xijcuaca ieso. San xijtoyahuaca tlalchi quen elisquia atl.

Nopa ilhuime ipan sesen xihuitl

(Ex. 23:14-17; 34:18-24)

16 “Quema ajsis nopa metztli Abib ipan toisraelita calendario quema quiixquetztoe para nopa ilhuitl catli itoca Pascua^e, monequi temachtli xiquelnamiquica nopa ilhuitl pampa ipan nopa metztli amoTECO Dios anmechquixti ipan tlali Egipto ica tlayohua.

²“Huan ipan nopa Pascua ilhuitl anquitencahuase iixpa amoTECO Dios tlacajcahualistli tlataltili catli huacaxme huan borrhgojme. Huan xijmacaca ipan nopa lugar catli yaya quitlapejpenijtos para nopo-nia moquetzas ichaj. ³Quema antemacase se tlapiyal para se tlacajcahualistli huan teipa anquincause, monequi xijcuaca ica pantzi catli amo quipiya tlasonejcayotl. Huan para chicome tonali anquincause pantzi catli amo quipiya tlasonejcayotl, pampa nopa pantzi anmechelnamiquiltis tlen tlaijyohuilstli. Huajca xiquelnamiquica nopa tonal para nochí amonemilis quema anmoisihuiltijque miyac para nimantzi anquistehuase ipan tlali Egipto huan amo oncac se tlatoctzi para mosone-huas amopantzi. ⁴Huan para nopa chicome tonali amo oncas niyon pilquentzi tlasonejcayotl ipan nochí amotlal. Nojquia monequi nimantzi xijcuaca inacayo nopa

^e16:1 Quemantic huetzi ipan marzo huan quemantic ipan abril ipan tocalendario tlen ama.

tlapiyali catli anquimacatoque TOTECO para tlacajcahualistli ipan nopa achthui tiotlac. Huan niyon quentzi nopa nacatl amo ma mocahuas para hualmostla ijnaloc.

5 “Amo xijmictica nopa tlapiyali para Pascua, niyon xijcuaca ipan tlen hueli al-tepetl catli TOTECO Dios anmechmacas campa anquinequise anquicuase. 6 San huelis anquichihuase ipan nopa lugar catli yaya quitlapejpenijtos para nopona ma mocahuas ichaj. Huan monequi xijmictica ica tiotlac quema ya temoc tonati, pampa ipan nopa hora antlacuajtej-que ipan tlali Egipto. 7 Huan inacayo nopa tlapiyali catli anquimactilaj TOTECO monequi xiquicxitica huan xijcuaca campa amoTECO Dios quitlapejpenis para ichaj, huan hualmostla ica ijnaloc amocuepase para amochajchaj. 8 Huan ipan nochi nopa chicuase tonali tlen nopa ilhuitl anquicuase pantzi catli amo quipiya tlasonicayotl. Huan ipan chicome tonali nochi amojuanti anquichihuase se tlasantilistli para anquihueyichi-huase amoTECO Dios huan ipan nopa tonal amo anquichihuase niyon se tlaman-tli tequitl.

Nopa ilhuitl tlen semanas

9 “Quema panotos chicome semanas tlen quema pejque anquipixcaj trigo, 10 anquichihuase nopa ilhuitl tlen sema-nas para anquitlepanitase amoTECO Dios huan anquimacase TOTECO nopa tlacajca-hualistli catli ipan amoyolo quisa xijmaca-ca. Xijmacaca quen imiyaca TOTECO an-mechtiochijtos. 11 Huan anilhuichihuase huan anpaquise nopona iixtla amoTECO Dios ipan nopa lugar catli yaya quitlapej-penijtos para nopona quiquetzas ichaj. Huan anyase nopona san sejco ica amoco-nehua, huan amotequipanojcahua, huan ininhuaya nopa levitame, nopa sequinoc tlali ehuani, nopa icnotzitzti huan nopa ca-hual sihuame catli itztose ipan amoaltepe. 12 Huan san sejco anquielnamisque para aneltoyaj antetequipanohuani ipan tlali Egipto. Huajca monequi xijchihuaca no-chi ni tlanahuatilme.

Nopa ilhuitl quema mochihuaj Pilxajcaltzitzti

13 “Huan sempa quema ya antlantose anquipixcaj trigo huan antlantose anquipatzcase amoxocomeca itlajca, anquichi-huase seyoc ilhuitl para chicome tonati huan nopa ilhuitl anquitocaxtise ilhuitl quema mochihuaj Pilxajcaltzitzti. 14 Ipan nopa ilhuitl nojquiya xipaquica ica amo-conehua, huan amotequipanojcahua, huan ininhuaya nopa levitame, nopa se-yoc tlali ehuani, nopa icnotzitzti huan no-pa cahualme catli itztose ipan amoaltepe.

15 “Para chicome tonali anilhuichihuase huan anpaquise iixtla amoTECO Dios npona campa yaya quitlapejpenijtos, pampa amoTECO Dios anmechtiochihuas miyac ica miyac pixquistli por nochi amo-tequi catli anquichihuase. Huajca teipa monequi anpaquise san sejco ica hueyi pa-quilistli.

16 “Huajca quen nimechilhuijtoc nica nochi tlaca israelitame monequi monexti-se expa ipan se xihuitl iixpa amoTECO Dios campa yaya quitlapejpenijtos para quipi-yas ichaj. Amnonextise ipan nopa Pascua ilhuitl, ipan nopa ilhuitl tlen semanas, huan ipan nopa ilhuitl quema mochihuaj pilxajcaltzitzti. Huan amo ximonextica san amomax, 17 monequi sesen ma quihiucas itlacajcahualis para temacas quen imiyaca TOTECO Dios quitiochijtoc.

Quenicatza jueces tetlajtolsencahuase

18 “Xi quintequitlalica jueces huan te-quitini ipan sesen altepetl ipan nopa tlali catli amoTECO Dios anmechmacas para elis iaxca sesen hueyi familia. Huan ini-juanti ma quintlajtolsencahuase mase-hualme quen quinamiqui. 19 Huan nopa jueces ma amo tlacajcayahuaca quema tlatlajtolsencahuaj, niyon ma amo techi-coincnelise. Ma amo mocahuase para se quinmacas se tlenijqui para quiixtzacuase catli nopa juez ya quimati para melahuac o para quipatlase inincamanal masehual-me catli xitlahuaque.

20 “Ica nochi amoyolo xijtemoca nopa tetlajtol sencahualistli catli nelia xitla-huac, huan san ya nopa xijtoquilca para

huelis noja anitztose huan anmoaxcatise nopa tlali catli amoTECO Dios ammechmacas.

21 “Amo xijquetzaca se tlaquetzali para nopa tiotzi Asera pampa tlahuel fiero. Niyon se cuahuitl quej ni amo hueli moquetzas nechca itlaixpa TOTECO Dios. 22 Niyon amo quema xiquinquetzaca teme tlaectli para anquinhueyimatise pampa ya nopa amoTECO Dios amo quinequi quiitas.

**Xijmacaca TOTECO tlacajehualistli
catli cuali**

17 “Amo xjmactilica amoTECO Dios se toro, niyon se borrego catli mocoohua, o catli quipolohua se tlenijqui, o quipyi se tlenijqui catli amo cuali. Pampa TOTECO Dios amo quinequi quiitas se tlacajehualistli quej nopa.

2“Quema anitztose ipan nopa altepe me catli amoTECO Dios ammechmacas, huelis anquicaquise para se tlacatl o se si huatl quipinahualtia TOTECO huan quixpatho nopa camanal sencahualli. 3 Huelis quihueyichihu se tiotzi o huelis anquicaquise para nopa masehuali quihueyichi hua tonati, o metzli o sitlalime catli ni mechnahuatijtoc amo xijhueyichihuaca. 4 Quema anquicaquise para quej nopa se quichihua, monequi xitlatzintocaca cuali campa hueli tlen nopa tlamantli, huan sintla anquimatise para nelia temachtl panotoc nopa tlamantli catli TOTECO amo qui nequi quiitas campa anisraelitame, 5 huajca monequi xijhuicaca nopa masehuali catli quichijtoc catli amo cuali hasta campa antetlajtolsencahuaj. Huan nopona xijte pachoca hasta miquis.

6“Monequi itztose ome o eyi masehual me catli tlatestigojquetzase para quitzto que quema quichihua catli fiero para se juez huelis quijitos ma miqui. Amo aqui hueli anquimictise sintla san se masehuali tlatestigojquetzas para quichijtoc catli amo cuali. 7 Huan quema monequi antemictise, injuanti catli tlatestigojquetzque para quichijqui catli amo cuali achihui quimajcahuilise tetl. Huan teipa noch masehualme catli itztose ipan nopa altepetl, nojquia ya nopa quichihuase. Huan

quej nopa tlamic nochi catli amo cuali catli onca ipan nopa altepetl.

8“Quematic monequi antequitini an quisencahuase se cuesoli catli mas ohui, huan ohui anquimatise catli melahuac. Huelis acajya temicti, o huelis onca se hueyi cualantli, o huelis ome mohuilana yaya. Ipan tlen hueli tlamanli catli pano ipan amoaltepe, sintla ohui anquimatise catli melahuac, huajca xiyaca campa TOTECO Dios quitlapejpenijtoc para quiquetzas ichaj. 9 Huan nopona xiquinpoluica nopa levita totajtzitzi o nopa juez catli npona tequiti. Huan xiquinilhuica tlaque cuesoli anquipiyaj. Huan injuanti quitlajtolsencahuase quen quinamiqui, huan amechilhuiuse tlaque monequi anquichihuase. 10 Huan antequitini, monequi anquichihuase san se quen amechnahuatise xijchihuaca catli quihuicaj tequitl npona campa TOTECO quitlapejpenijtos para itztos. Amo tleno mas xijchihuaca. 11 Senquistoc xijtoquilica nopa tlanahuatili catli amechnachtise huan xijchihuaca nochi inincamanal. Amo xijpatlaca niyon quentzi. 12 Huan sintla se masehuali yohui huan quitlajtlaniti consejo se juez o se totajtzitzi catli quitequipanohua TOTECO huan teipa pampa mohueyimati amo quinelto cas catli nopa juez o nopa totajtzitzi quiilhui, monequi miquis. Quej nopa anquitzontlamlitise tlaixpanoli catli onca campa anisraelitame. 13 Pampa nochi masehualme quimatise catli panotoc huan majmahuise para tlaixpanose.

**Quenicatza ma nejnemi
se israelita tlanahuatijquetl**

14“Quema anajsitose ipan nopa tlali catli amoTECO Dios ammechmacas, huan ya anmoaxcatijtose huan npona anitztose, huelis anquinequise se tlanahuatijquetl. Huelis anquijtose: ‘Tijnequij tijpiyase se tlanahuatijquetl catli technahuatis quen quipiyaj sequinoc masehualme catli itztoque ipan ni tlalme tonechca.’ 15 Huajca monequi xijtequitlalica para tlanahuatijquetl nopa tlacatl catli TOTECO Dios quitlapejpenis. Monequi xijtlalica se israelita huan amo se catli seyoc tlali ehua. 16 Pero

amo quinamiqui para nopa tlanaahuatijquetl quinmiyaquilis icahuayojhua, niyon para quintitlanis tlacame ma itztotij ipan tlali Egipto para quinmiyaquilis icahuayojhua nopona, pampa TOTECO anmechilhuejtoc para ayacmo quema ximocuepaca tlali Egipto. Quej nopa quijtohua. 17 Amo quinamiqui para se tlanaahuatijquetl ma quinpiyas miyac sihuame pampa quiqxistise tlen iojhui TOTECO. Huan amo cuali para quipiyas miyac oro o plata.

18 “Huan quema nopa tlanaahuatijquetl quiselis itequi para tlanaahuatis, monequi yaya iseli quiijcuilos ni tlamachtilme ipan se amatl para quipixtos. Ma quiijcuilo iniixpa nopa levita totajtzitz. 19 Huan nopa amatlajcuiloli ica ni tlanaahuatilme monequi nopa tlanaahuatijquetl nochipa quipiyas imaco. Monequi quipohuas mojmostla para nochil inemilis para quimatis quenicatzia quitelepanitas TOTECO Dios huan quenicatzia quichijtinemis nochil camanali catli quijtohua ni tlamachtili. 20 Quej nopa amo moiilhuis yaya más hueyi que sequinoc imasehualhua huan amo moiyoquixtis tlen ni tlanaahuatilme. Huan quej nopa yaya ica nochil iixhuihua huejcahuase para tlanaahuatise ipan tlali Israel.

Catli quiselise nopa levita totajtzitz

18 “Nopa levita totajtzitz huan nochil sequinoc levitame, amo quiselise tlali quen sequinoc anisraelitame anquiselise. Monequi quicuase tlen nopa tlacajcahualistli catli masehualme quimactilaj TOTECO ipan tlilt. Quena, panose ica nopa diezmos catli quiselise. 2 Amo quiselise niyon se tlali quen ne sequinoc anisraelitame anquiselise, pampa inijuanti quiselise TOTECO para iniaxca huan amo tlali. Quej nopa yaya quiijtojtoc.

3 “Huan quema masehualme quihualicaj tlacajcahualistli para quimactilise TOTECO, huelis se toro o se borrego, nopa totajtzitz monequi quiselise iajcol, icamachal huan catli onca ijítico nopa tlapiyali. 4 Nojquiya monequi quiselise nopa achtihui pixquistli tlen trigo, xocomeca atl huan aceite, huan nopa achtihui inijhuiyo amoborregojhua quema anquinximase.

5 Pampa amoTECO Dios quintlapejpenijtoc nopa levitame tlen nochil sequinoc huejhueyi familias para inijuanti huan inintepipan ixhuihua para nochipa san ya ma quitequipanoca.

6 “Sintla teipa aqui hueli levita catli mocahua para itztos ipan tlen hueli tlen amoaltepehua ipan tlali Israel, quinequi quisas huan yas ipan seyoc altepetl campa TOTECO quitlapejpenijtos para ichaj, 7 yaya huelis tequitis para TOTECO Dios quen sequinoc ilevita icnihua catli quitequipanohuaj TOTECO nopona. 8 Yaya hueli quiselis san se imiyaca tlacualistli quen ne sequinoc quiselaj huan ya nopa elis iyoca tlen quiselis quema miquis itata.

Ma amo quintoquilica nopa tlali ehuan

9 “Quema ya anajsitose ipan nopa tlali catli amoTECO Dios anmechmactilis para amoaxca, amo quema xijchihuaca quen nopa masehualme catli nopona itztoque quichihuaj. 10 Amo quema xijtencahuaca se amocone para tlacajcahualistli, niyon amo xijchihuaca se amocone ma pano ipan tlilt. Amo quema xiayaca ica se catli tetonalita, o catli teilhuá catli oncas teipa, o catli tlamatí, niyon ica se catli tetlajchihuá. 11 Amo quema xiayaca ica se catli tehuihuichihua, niyon catli tequitia ica magia, niyon catli quinnojnotza ajacame o catli mictoque. 12 TOTECO Dios tlahuel quincualancaita catli quichihuaj nochil ni tlamantli, niyon amo quinequi quinitas. Huan yaya quintojtocas nopa masehualme amoixpa ipan nopa tlali pampa inijuanti quichihuaj nochil ni tlamantli catli fiero. 13 Monequi amojuanti xiitztoca senquistoc xitlahuac iixpa TOTECO. 14 Nopa masehualme ipan nopa tlali catli amoaxcatise quintlacaquilaj catli tetlajchihuaj huan tetonalitaj, pero ica amojuanti, amoTECO Dios amo anmechcahuilis xijchihuaca ya nopa.

Nopa tlajtol pannextijquetl catli teipa hualas

15 “TOTECO Dios quichihuas para ma quisa tlen campa amojuanti seyoc tlajtol pannextijquetl quen na huan yaya, quena,

monequi anquitlacaquilise. **16** Ya nopa catli anquitlajtlanijque TOTECO Dios huejcajya ipan tepetl Sinaí, ipan nopa tonal quema nochí ammosentilijque nopona iixpa, pampa anquijtoque: ‘Ayacmo tijnequij tijcaquise itoscac TOTECO Dios, niyon ayacmo tijnequij tiquitase nopa hueyi tlilt, pampa timajmahuij para timiquise.’ Quej nopa anquijtoque.

17 “Huajca TOTECO nechilhui: ‘Cuali catli quijitoque nopa masehualme. **18** Na njchihuas ma quisa ipan ininteiximatcahu se tlajtol pannextijquetl quenta. Huan niquidhuis nocamanal catli yaya quinilhuiti nopa masehualme. Huan yaya quinpoohuilis catli njnahuatis. **19** Huan aqui hueli masehuali catli amo quicaquis nocamanal catli nopa tlajtol pannextijquetl quijitos por na, na njltatzacuiltis. **20** Huan sintla nopa tlajtol pannextijquetl mohueyimatis huan quijitos camanali catli na amo njmacatoc o sintla camanaltis ica inintequiticayo tioztiztzi, huajca monequi miquis.’ **21** Huelis amojuanti amoilhuisse: ‘¿Huan quenictaza tijmatise catli quijtohua amo ya catli TOTECO quinahuatijtoc?’ **22** Quej ni anquimatise. Sintla se masehuali quijtohua camanalti ica notequiticayo na ni-amoteco huan amechilhuis catli panos teipa, huan amo mochihuas, huajca amo njmacatoc nopa camanali catli quijito. Yaya san camanaltic tlen ya iseltzi itlanamiquilis pampa mohueyimatqui. Huajca amo xiquimacasica ya.

Altepeme campa hueli momanahuise

(Nm. 35:9-28; Jos. 20:1-9)

19 “Quema amoTECO Dios ya quintzontlamiltijtos nopa masehualme ipan nopa tlali huan amoaxcatijtose ini-altepehua huan ininchajchaj, **2** monequi anquiniyocatlalise eyi altepeme ipan nopa tlali catli TOTECO Dios teipa amechmacas para amoaxcatise. **3** Xijxejxeloca nopa tlali ica eyi partes, huan ipan sesen parte xiquiyocacahuaca se altepetl para amojuanti campa se masehuali hueli mochololtis sintla quimictis seyoc masque amo quinequiyaya. Huan monequi anquimo-

cuitlahuise cuali nochí nopa ojtli catli onajsi ipan nopa altepeme.

4 “Huan se catli temictijtoc huelis mochololtis huan mocahuas nepa huan quimanahuis inemilis sintla quinextis para amo quinequiyaya temictis huan amo panoc pampa quicualancaitayaya nopa masehuali. **5** Sintla ome tlacame yohuij cuatzontequivij campa onca huejhueyi cuahuitl huan nepa se copinis ihacha huan quiajsis ihuampox, huajca catli temicti huelis mochololtis ipan tlen hueli tlen nopa eyi altepeme huan quej nopa quimanahuis inemilis. **6** Pero sintla tlahuel huejca mocahua nopa altepetl campa hueli momanahuis, huelis iteiximatca nopa mijcatzi quipantis huan quimictis ipan ojtli masque amo quinamiqui para miquisquia, pampa amo quimicti nopa masehuali pampa quicualancaitayaya. **7** Huajca yeca nimechnahuatia xiquiyocatlalica eyi altepeme para amojuanti anquintequivihuese.

8-9 “Huan sintla ica cuidado anquitoquilise nochí ni tlanahtuilme catli nimechmaca ama, huan anquicnelise amoTECO Dios, huan nochipa annejnemise ipan iojhui, huajca amoTECO Dios más quihueyilis amotlal. Quena, yaya amechmacas nochí nopa tlali catli quintenahuijijtoc amohuejapan tatahua para amechmacas. Huan quema ya nopa panos, huajca monequi anquiyocacuixtise seyoc eyi altepeme campa momanahuise masehualme iyoca tlen nopa eyi catli ya anquixtose. **10** Huan quej ni amo anquitoya-huase ieso se masehuali ipan nopa tlali catli amoTECO Dios amechmactilía sintla amo quinamiqui para miquis. Huan quej nopa amo huetzis ipan amojuanti se tlazacuiltli tlen se miquistli.

11 “Pero sintla se tlacatl quicualancaita seyoc, huan quiojchiya campa yohui para quimictis, huan teipa yas ipan se tlen ni altepeme campa hueli momanahuis, **12** monequi nopa huehue tlacame tlen nopa altepetl quintitlanise tlacame para quicuitij tlen nopa altepetl campa hueli momanahuis. Huan monequi ma quimactilica se iteiximatca catli más nechca nopa mijcatzi para ma quimicti. **13** Amo xijtlasojtlaca ca-

tli temictijtoc. Xiquinquixtca ipan israelitame catli quitoahuaj inieso masehualme catli amo tleno quichijtoque. Quej no pa nochi elis cuali campa anitztose.

14 “Ipan nopa tlali catli TOTECO Dios anmechmacas, monequi anquitlepanitase nepamitl. Amo quema xiquicuinica teme catli quinextia se nepamitl catli quitlalij que amohuejapan tatahua.

Istlacatica tlajtol pannextiani

15 “Amo quema xijtlajtlacolmacaca se masehuali ica catli hueli tlaixpanoli sintla san setzi masehuali tlatestigojquetza para quichijtoc. Nochipa monequi ome o eyi testigos catli san se quiijtohuaj para quenicatza tlaixpanotoc.

16 “Sintla se tlacatl catli fiero itlalnami quilis monextis quen se testigo huan quiistlacahuis seyoc, huan quiijtos tlaixpanotoc, **17** huajca nopa ome tlacame monequi monextise iixpa TOTECO. Huan iniiipa nopa totajtzitzi huan nopa jueces catli quipiyase tequiticayotl ipan nopa tonali. **18** Huan nopa jueces quitemose ica cuidado catli panotoc. Huan sintla quipantise para catli tetelhuia tlatestigojquetzoc catli amo melahuac, **19** huajca nopa tlatzacuiltoni catli quinequiyaya ma quiseli ne seyoc, quiselis yaya catli istlacatqui. Huan quej nopa anquitlamiltise nochi catli amo cuali catli onca tlatlajco amojuanti.

20 “Huan nochi masehualme quimatise ni tlamatli huan majmahuise huan ayacmo quitelhuisse se catli amo tleno quichijtoc. **21** Amo xijtlasojtlaca catli tlatestigojquetzoc catli amo neli. Sintla quinequiyaya ma miqui ne seyoc, xijmictica. Huan sintla quinequiyaya ne seyoc ma quipolo iixteyol, itlancoch, imax o iicxi, xijpolhulica catli yaya iixteyol, itlancoch, imax o iicxi.”

Tlanahuatili tlen tlahuilanalistli

20 “Quema anquisase para anquinhuilalanati amocualancaitacahua, sintla anquinitase para quinpiyaj mas cahauyome, huan mas tlahuilanca carros, huan mas miyaqui soldados que amojuanti, amo xiquinimacasica pampa amojuanti

amohuaya yohui amoTECO Dios catli anmechquixti tlen tlali Egipto. **2**Huan quema ajsis hora para anmohuilanase, monequi nopa totajtzi monechcahuis campa nopa tlahuilanca pamitl tlen soldados huan quiijtos:

3 “Xijtlacaquilica anisraelitame, ama anmohuilanase ica amocualancaitacahua. Amo ximoyolmajmatica, niyon amo xiquinimacasica, niyon amo xihuhiupicaca, niyon amo xitlapoloca iniiipa. **4**Pampa amoTECO Dios, yaya itztoc ica amojuanti. Yaya anmechhuilanilis amocualancaitacahua huan quichihuas xitlatlanica.

5 “Huan sempa monequi nopa tlayacanani ma quincamanalhuica nopa soldados huan sintla se tlen inijuanti quichijtoc se yancuic cali huan ayamo ipan itztoc, ma yohui ichaj. Pampa huelis miquis ipan tlahuilanlistli huan elis seyoc catli achtilui quitequihiis nopa yancuic cali. **6**Sintla se tlen inijuanti quitoctoc se yancuic xocomeca mili huan ayamo quicualilijtoc itlajca, ma yohui ichaj. Pampa huelis miquis ipan tlahuilanlistli huan elis seyoc catli quitequis nopa xocomecatl itlajca. **7**Huan sintla se tlen inijuanti quiijtlantoc se ichpocatl huan ayamo moculijahc, ma yohui ichaj. Pampa huelis miquis ipan tlahuilanlistli huan elis seyoc catli mocuulis nopa ichpocatl.

8 “Huan nopa tlayacanani nojquiya quintlatzintoquilise nopa soldados sintla se tlahuel majmahui huan moilhuia tlapoles sintla yas tlahuilanati. Sintla se quiijtos para quena majmahui, ma yohui ichaj para nopa majmajtli amo quinmahuas se quinoc soldados.

9 “Huan quema nopa tlayacanani ya tlantose quincamanalhuiaj nopa soldados, quincahuase ininmaco nopa capitanes tlen soldados.

10 “Huan quema anmonechcahuise campa se altepetl para anquihuilanase, achtilui xiquintencahuilica quenicatza hueli ammosejseltise ininhuaya. **11** Huan sintla nopa masehualme catli itztoque ipan nopa altepetl quiselaj nopa camanali huan anmechpuertajlapose para ancalaque, huajca anmechtequipanose san tla-

pic ipan tequitl catli ohui. 12 Pero sintla amo quinequise moyoltlalise amohuaya huan san pehuase anmechhuilanase, huajca xijyahualoca nopa altepetl huan xijhulanaca. 13 Huan quema amoTECO Dios anmechmactilis ipan amomax, xiquinmictica ica machete nochi tlacame catli npona itztose. 14 Pero nopa sihuame, coneme, tlapiyalme huan nochi catli onca ipan nopa altepetl elis para amojuanti anquihuicase. Huan ximoyolpaquiltica quema anquitequihuaj nochi nopa tlamantli catli amoTECO Dios anmechcahuilijtoc xiquincuilica amocualancaitacahua. 15 Huan ya ni nojquiya xijchihuaca ica nochi altepeme catli mocahua huejca tlen campa antztoque.

16 “Pero ipan altepeme catli nechca amoatl catli amoTECO Dios anmechmacas para amoaxca monequi amo aqui xijcahuaca ma itzto. 17 Monequi xiquintzontlamiltica nochi heteos, amoreos, cananeos, ferezos, heveos huan jebuseos quen TOTECO Dios anmechnahuatijtoc xijchihuaca.

18 “Quinequi xiquinmictica para amo anmechnextilise anquichihuase nopa fiero tlamantli catli inijuanti quichihuaj para ica quinhueyichihuaj inintotzitzit. Pampa quej nopa anmechchihuase xitlajtlacolchihuaca iixpa amoTECO Dios.

19 “Sintla monequi miyac tonali anquihuilanase se altepetl para amoxcatise, xijcuaca inintlajca nopa cuame catli npona onca, pero amo xijtzontequica. Nopa cuame amo ya tlacame catli amocualancaitacahua para anquinhuilanase. 20 San huelis anquintzontequise cuame catli amo temacaj inintlajca para anquitequihuise quen tlaquetzalme para anquiaquilise itepa nopa altepetl hasta huetzis amomaco.

Tlaque ma quichihua catli quipantía se mijcatzi

21 “Ya ni xijchihuaca quema anitztose ipan nopa tlali catli amoTECO Dios anmechmacas para amoaxca sintla anquipantise canajya itlacayo se masehuali catli nesi para aqui quimictijtoc huan amo aqui quimati ajqueya quimicti para anquitlatzacuiltise. 2 Nopa huehue tlacame huan

jueces quiixtamachihuase quesqui ihuej-caca tlen campa eltoc nopa mijcatzi hasta sesen altepeme catli nechca para quimati-se catlique altepetl más nechca. 3 Huajca nopa huehue tlacame catli itztoque ipan nopa altepetl catli más nechca monequi quiitzquise se becerro catli ayamo quite-quipanoltijoque para tlaxahuas, 4 huan quihuicase campa se tlamayamtil catli quipiya se atlajtli ica atl campa amo quema aqui quimolejtoc, niyon tlatojtoctoc. Huan npona quiquechpostequise nopa becerro campa nopa tlamayamtil.

5 “Huan teipa monechcahuise nopa le-vita totajtzitzit catli TOTECO Dios quintla-pejeni ma quichihuaca itequi huan para tlatiochihuase ipan itoca. Huan nopa totajtzitzit tetlajtolsencahuase ipan tlen hue-li cualantli huan catli inijuanti quijtose, ica ya nopa tlamis camanali. 6 Huan nopa huehue tlacame tlen nopa altepetl catli más nechca momajtequise itzontla nopa becerro catli quiquechpostejque, 7 huan quijtose ni camanali: ‘Tojuanti amo tij-mictijtoque nopa tlacatl, niyon amo tij-quitztoque ajqueya quimicti. 8 TOTECO, techtlapojpolhui ni tlajtlacoli timoisraelita masehualhua catli ta techcojtoc. Amo techtlajtlacolmaca ica ieso ni tlacatl catli amo tleno quichijtoya.’ Huan quema quej nopa quichihuase nopa huehue tlacame, nopa altepetl ehuani amo quihuicase tlajtlacoli por imiquilis nopa masehuali. 9 Pampa quema anquichihuase catli xitlahuac iixpa TOTECO, ammoquixtilise nopa tlajtlacoli catli nochi anquihuicasquíaj quen anquimictijtosquíaj nopa tlacatl.

Sihuame catli quinatzquía ipan tlahuilanalistli

10 “Quema antlahuilanatij se altepetl tlen amocualancaitacahua huan TOTECO Dios quichihuas para ma huetzica amomaco, xiquinhuicaca ilpitoque nopa masehualme para anmechtequipanose. 11 Huan sintla aqui quiitas ipan inijuanti se sihuatl catli achi yejyectzi huan quiixtolas para mociulis para isihua, 12 monequi quihuicas ichaj. Huan npona ichaj quichihualtis ma motequili itzoncal huan motzonhuata-

nis huan ma quitequi iistihuá. **13** Huan monequi ma moquixtili iyoyo catli quipixtoya quema quiitzquijque huan motlalilis catli yancuic. Quema ya quipiya se metztli nejmaxtic ipan ichaj para quinchoquilis itatahua, nopa tlacatl ya huelis mocuilis huan mochihuas ihuehue huan yaya mochihuas isihuá. **14** Huan sintla teipa ayacmo quiixtocas huelis quicahuas nopa sihuatl ma yohui campa quinequi yas. Pero nopa tlacatl amo huelis quinemacas ica tomi, niyon amo quichihuas quen se sihua tequipanojquetl catli quicojtoc pampa quipinahaultijtoc.

Catli quitocarohua se achthui ejquetl

15 “Ya ni nopa tlanahtuati me para se tlacatl catli quinpiya ome isihuajhua, huan se quiicnelia huan ne se amo. Sintla nochí ome quintlacatiltijoque iconehua, pero nopa achthui ejquetl eli icone nopa sihuatl catli amo quiicnelia, monequi quichihuas catli xitlahuac. **16** Quema ajsis hora para nopa tetaj quinmajmacas iconehua catli quipixtoc, amo huelis quichihuas quen achthui ejquetl se icone nopa sihuatl catli quiicnelia pampa amo xitlahuac. Iachthui ejca itztoc yaya catli icone isihua catli amo quiicnelia huan yaya, quena, quitocarohua quiselis ompa imiyaca quema miquis itata. **17** Monequi quimacás nopa iachthui ejca cone ompa imiyaca catli sequinoc iconehua quiselise, pampa ya nopa quitocarohua pampa yaya catli achthui tlacatqui tlen ichicahualis itata. Huan quipiya tlanahtuati quiselis nochí catli quitocarohua se achthui ejquetl masque icone isihua catli amo quiicnelia.

Se telpocatl catli amo tlaneltoca

18 “Sintla acajya quipiya se icone catli amo tlaneltoca huan san mosisínía, ya ni catli quichihuase itatahua. Sintla amo quin Neltoquilá catli quilhuíaj itatahua, niyon amo quichihua cuenta quema quilitzacuítfaj, **19** huajca itatahua monequi quiitzquise huan quihiu case campa nopa huehue tlacame catli tlayacanaj ipan nopa altepetl. **20** Huan monequi quin Nelhuitij para inincone tlahuel tzontochontic huan

mosisínía huan amo quin Neltoquilá. Ma quin Nelhuiti sintla yaya se nel lacauajquetl huan tlaiquetl. **21** Huan teipa nochí tlacame tlen nopa altepetl quimictise nopa tel pocatl ica tetl. Huan quej nopa anquitla miltise catli amo cuali tlen tlatalco amo juanti, pampa nochí israelitame quicaqui se, huan momajmatise.

Miyac tlanahtuati me

22 “Sintla se tlacatl quichihuas se hueyi tlajtlacoli ica catli monequi miquis, huan anquimictise huan anquihuiyonise itlacyo ipan se cuahuitl, **23** amo quinamiqui para itlacyo mocahuas nopona se yohual huan quichihuas amo tlapajpactic nopa tlali. Monequi xijtocabaca ipan nopa tonal pampa tlatelchihuali catli huiyontoc ipan se cuahuitl, huan amo quinamiqui xijchi huaca amo tlapajpactli nopa tlali catli amo TECO Dios anmechmacas para amoax catise.

Tlanahtuati para timopalehuise

22 “Sintla anquipantíaj mocuapoloj toci se tlapiyali catli seyoc iaxca, huelis se borrego o se toro catli tlapoxonía, amo quinamiqui para san amo tlen anquichihuase. Monequi anquihuiquilise tlapiyal sempa. **2** Pero sintla iteco nopa tlapiyali amo mocahua nechca, o sintla amo tiquiximati ajqueya iteco, huajca nopa tlapiyali anquihui case amochaj. Nopona anquipixtose hasta iteco hualas huan quitemos, huan huajca monequi anquicuepilise. **3** Nojquiya ya nopa monequi anquichihuase ica se burro, o se yoyomitl, o tlen hueli tlamatli catli seyoc masehuali ipan amotl quipolos huan anquipantise. Amo san xijchihuaca quen amo anquita que nopa tlamatli.

4 “Sintla anquiatase huetztoe ipan ojtlí se acajya iburro o itoro, amo san xijcahuaca quej nopa. Xijpalehuitij iteco para qui tlanañas.

5 “Se sihuatl ma amo moquentis yoyomitl tlen tlacame huan se tlacatl amo moquentis yoyomitl tlen sihuame, pampa TECO Dios amo quinequi quitas catli quej nopa quichihua.

6 “Sintla tijpantía se toto tepasoli tlalchi, o ipan se cuahuitl, huan quipiya ico-nehua o tecsistli, huan nopa tenan quinpa-chohua, amo huelis tiquitzquis nopa tenan ica iconehua. 7 Huelis timocuilis san tec-sistli o iconehua, pero xijcahuas ma yohui nopa tenan. Huan quej nopa nochí yas cuál amohuaya huan anquipiyase se hueyi nemilistli.

8 “Quema acajya tlen amojuanti quichi-huas se cali yancuic, monequi quitlalilis se tepamitl itejteno calpani, huan quej nopa amo quihiucas tlajtlacoli por ieso se catli amo momocuitlahuis huan mocuatepexi-huis tlen calpani huan miquis.

9 “Ipan se xocomeca mili amo huelis anquitocase seyoc tlamantli xinachtli tla-tlajco isorcios, pampa TOTECO ayacmo an-mechcahuilis xijtequihuica catli anquitoc-toque niyon nopa xocomecatl itlajca.

10 “Amo quema xijpoxonica amotlal ica se toro huan se burro para san sejco ma te-quitica.

11 “Amo ximotlalilica yoyomitl tlaxine-paloli ica iniichcayo borregojme maneltic ica lino.

12 “Xijtlalilica itenhuaxo ipan nahui inacastla itencuelpachol nopa tlaquemilt catli anmoquentiáj.

Tlanahuatilme para amo ma momecatica

13 “Sintla se tlacatl mocuilis se ichpocatl para isihua, huan cochis ihuaya huan teipa quicualancaitas, 14 huan quitlajil-huis para ipa quiniximajtoya sequinoc tlacame o quijitos tlamiyacapa para quema mosanesejcotilique, amo quipantili para yaya nelia eliyaya se ichpocatl, huajca ya ni xijchihuaca. 15 Sintla quej nopa quitel-huis, itatahua nopa ichpocatl monequi ya-se campa nopa huehue tlacame catli tlaya-canaj ipan nopa altepetl huan catli mose-huiaj campa ipuerta, huan quinnextilise nopa yoyomitl catli quiixnextis para temachtli inincone nelia eliyaya se ichpocatl quema monamicti ica nopa tlacatl. 16 Huan nopa tetaj quinilhuis nopa huehue tlacame: ‘Nijmactili noichpoca para elis isihua ni tlacatl, pero ama ayacmo quinequi. 17 Ama quitelhuia para amo ne-

lia eliyaya se ichpocatl quema mocuili. Pero nica eltoc catli quinextia para, que-na, nelia eliyaya se ichpocatl.’ Huan que-ma quijitos ya ni, quipajpatlahuas nopa yoyomitl ica ieso iniixtla nopa huehue tlacame. 18 Huajca nopa huehue tlacame qui-itzquise nopa tlacatl catli mosihuajtijtoya huan quitlazacuiltise. 19 Quichihualtise para quiixtlahuas se multa catli elis 100 plata tomi huan nopa tomi quimacase ita-ta nopa ichpocatl pampa quipinahualti se israelita ichpocatl. Huan teipa nopa si-huatl quejipa elis isihua huan amo quema huelis quicahuas ipan nochí inemilis.

20 “Pero sintla quitlajilhuia huan nesis para melahuac amo eliyaya se ichpocatl quema mocuili huan amo onca se tlaman-tli catli quinextia para quena, se ichpo-catl, 21 huajca monequi nopa huehue tlacame quihiuicase icalteno ichaj itata, huan nopa masehualme tlen nopa altepetl qui-mictise ica tetl. Pampa quichijtoc se hueyi tlaixpanoli ipan israelitame huan tlacan-enqui quema itztoya ipan ichaj itata. Huan quej nopa anquitlamiltise nopa tlaixpanoli catli onca tlatlajco anisraelitame.

22 “Sintla anquipantise se tlacatl catli motectoc ihuaya se sihuatl catli quipiya ihuehue, monequi anquinmictise nochí ome. Huan quej nopa anquitlamiltise no-pa tlajtlacoli ipan israelitame.

23 “Sintla anquipantise se tlacatl catli motectoc ihuaya se ichpocatl catli quiijtlantoc seyoc tlacatl, quej ni anquichihuase. Sintla pano ni tlajtlacoli ipan altepetl, 24 huajca monequi anquinhuicase nochí ome campa tetlajtolsencahuaj nopa huehue tlacame nechca ipuerta nopa altepetl huan anquinmictise ica tetl. Monequi nopa ichpocatl miquis pampa amo quintzajtzili ma qui-manahuica catli itztoyaj ipan nopa altepetl. Huan nopa tlacatl miquis pampa quipinahuajtijtoya isihua se iiisraelita teiximatca. Huan quej nopa anquitlamiltise tlajtlacoli catli onca tlatlajco amojuanti.

25 “Pero sintla se tlacatl quipantis se ichpocatl ipan se potrero catli quiijtlantoc seyoc tlacatl huan quifuerzajhuis ma mo-teca ihuaya, san monequi xijmictica nopa tlacatl catli quichihualti ma ihuaya mote-

ca. 26 Nopa ichpocatl amo tleno xijchihui-
lica pampa amo tlajtlacolchijtoc para mi-
quis. Se tlacatl catli quifuerzajhuía se ich-
pocatl ma moteca ihuaya monequi miquis
san se quen monequi miquis se tlacatl catli
quimictia seyoc masehuali. 27 Pero xijmic-
tica san nopa tlacatl pampa quipanti nopa
ichpocatl iseli campa potrero, huan mas-
que tzajtzitosquía chicahuac, amo aqui
quicactosquía para quimanahuas.

28 "Sintla quipantíaj para se tlacatl qui-
fuerzajhuía ma ihuaya moteca se cuali
ichpocatl catli ayamo aqui quijtlantoc,
29 nopa tlacatl quipiya quimactilis itata
nopa ichpocatl 50 plata tomi pampa quipi-
nahualtijtoc. Nojquiya monequi mocuilis
nopa ichpocatl para isihua huan amo hue-
lis quicahuas para nochis inemilis.

30 "Amo aqui ma motecas ihuaya isihua
itata, niyon icahual sihua itata pampa ica
ya nopa quipinahaultía itata.

Ajqueya amo huelis itztose ica israelitame
23 "Sintla se tlacatl quipixtoc itecsis
catli pechtic, o sintla tlatzontectli
itoto, amo huelis itztos amohuaya campa
anmocahuaj amojuanti catli animasehual-
hua TOTECO.

2 "Se cuatitla conetl niyon iixhuihua
para nochipa amo hueli itztose campa
amojuanti catli animasehualhua TOTECO
anmocahuaj.

3 "Nojquiya amo hueli itztos amohuaya
niyon se amonita, niyon moabita mase-
huali, niyon iniixhuihua. Amo hueli itztos-
se amohuaya para nochipa campa amo-
juanti anmocahuaj catli anitztoque an-
imasehualhua TOTECO. 4 Ya ni eltoc pam-
pa quema anquisayaya ipan tlali Egipto,
inijuanti amo anmechmacaque atl, niyon
tlacualistli. Nojquiya inijuanti quitlaxtla-
huique Balaam, icon Beor, catli ehua al-
tepetl Petor ipan tlali Mesopotamia, para
ma anmechtelchihuas, 5 pero amoTECO
Dios amo quinejqui quitlacaquilis Balaam.
Huan quipatlac nopa tlatalchihuali ica se
tlatiochihuali para amojuanti, pampa ya-
ya anmechicnelía. 6 Huajca amo quema xi-
quinpalehuica ni masehualme, niyon amo
quema xiitztoca ica cuali inihuaya.

7 "Amo quema xiquincualancaitaca iix-
huihua Esaú catli inintoca edomitame pam-
pa inijuanti quen amoicnihua. Niyon amo
quema xiquincualancaitaca nopa egiptome
pampa anitztoyaj ipan inintla quen seyoc
tlali ehuan. 8 Huan se tlali Egipto ejquetel
catli quisqui nopena amohuaya anisraelita-
me huan mocajtoc amohuaya hasta quinpi-
yas iixhuihua, huajca iixhuihua huelise ca-
laquise para mocahuase amohuaya anima-
sehualhua TOTECO huan monequi xiquinita-
ca quen israelitame.

Tlanahuatilme para altepeme tlapajpacme

9 "Quema ansoldados anquinhuiilanati
amocualancaitacahua, monequi ximoiyocah-
uaca ica nochis catli amo tlapajpactli iix-
pa TOTECO. 10 Sintla ixinajcho se soldado
quisqui tlayohua, nopa soldado elis amo tla-
pajpactli iixpa TOTECO huan monequi moi-
yoquixtis tlen campa mochijtoque nopa
sequinoc soldados. Huan amo huelis cala-
quis sempa campa sequinoc 11 hasta tiotlac
quema temotoc tonati. Huajca, quena, hue-
lis maltis ica atl huan sempa huelis calaquis
campa mocahuaj ne sequinoc.

12 "Huan xiquiocatlalica se lugar para
ancuatenpanose catli elis quentzi huejca
tlen campa anmochijtoque. 13 Huan sesen
soldado monequi quihiucas se pala ica ite-
poshua huan quema quinequi cuatempa-
nos, monequi quixahuas se pilostotzi huan
teipa quixtzacuas icuitl ica tlali. 14 Pampa
monequi nochis elis tlatzejtzelotic campa
anquiquetztoque amoyoyoncalhua pampa
amoTECO Dios nemí nopena tlataljco
amojuanti para anmechmanahuis huan
anmechchihuas xitlatlanica ica amocua-
lancaitacahua. Yaya amo quinequi quiitas
se tlamantli catli amo tlapajpactli campa
amojuanti para amo anmechiyocacahuas.

Tlanahuatilme para xiteselica

15 "Sintla se tetequipanoquetl cholo-
hua tlen iteco huan ajsis campa amochaj,
amo xijmactilica imaco catli achtihiuya
eliyaya iteco. 16 Xijcahuilica ma mocahua
para itztos ica amojuanti campa quinequi
ipan nopa altepetl catli quipactía. Amo xi-
quintlaijyohuilstica.

**Ma amo elica tlacanenca sihuame huan
sihuanenca tlame**

17 “Niyon se israelita tlacatl amo hueli motemacas para ininhuaya ahuilnemis sihuame catli yohuij para quinhueyichihuatiq intiotzitzi quen quichihuaj tlacame ipan nopa tlalme catli amo quiiximatij TOTECO. Huan niyon se israelita sihuatl amo hueli motemacas para quinselis tlacame campa yohuij para quinhueyichihuatiq intiotzitzi. 18 Amo aqui huelis quimacas tomi TOTECO Dios catli quitlantoc pampa ahuilnemiyaya, masque se tlacatl catli quiselá tomi para itztos ica sihuame, o se sihuatl catli quiselá tomi para itztos ica tlacame. Masque nopa tomi elis se ofrenda catli anquimacaj TOTECO ica amopaqilis, amo xijmacaca pampa nopa tomi hualajqui ipan se tlajtlacoli catli TOTECO tlahuel amo quinequi quiitas.

19 “Quema anquitlanejtise tomi, o tlaqualistli, o tlen hueli tlamantli se moisraelita icni, quema anmecchuepilis nopa tomi, amo quema xijtlajtlanica ma anmecchtlatxlahui itlanca. 20 Sintla anquitlanejtise catli se seyoc tlali ejquetl, quena, huelis anquitlajtlanise ma anmecchtlatxlahui itlanca, pero ica amoisraelita icnihua, amo. Quej nopa amo TOTECO Dios anmecchtiochihuas ipan noch i tlamantli catli anquichihuase ipan nopa tlali catli amoaxcatise.

21 “Quema anquitencahuilise TOTECO Dios para temachtli anquichihuase se tlenjqui o para anquimacase se tlamantli, amo xijhuecjhauhltica para anquitlamichihuase, pampa elis se tlaixpanoli. TOTECO Dios anmechtlajtlanía xijchihiuaca catli anquitencahuilijke. 22 Pero amo tlajtlacoli sintla amo anquitencahuase para anquichihuase se tlamantli. 23 Monequi ximomocuitlahuica para xijchihiuaca noch catli ica amopaqilis anquitencahuilijke anquichihuase.

24 “Quema anpanose ipan seyoc masehuali ixocomecamil catli itzto amonechca, huelis anquicuase nopa xocomecatl itlajca quen anquinequise, pero amo huelis anquitemase ipan se chiquihuitl huan anquihuicase. 25 Sintla anpanose campa

seyoc quichijtoc itrigo mil, huelis anquicuise itlajca ica amomax para anquicuajtijase, pero amo huelis anquitequise ica se amotepos.

**Quenicatza hueli mocahuase
se tlacatl huan isihua**

24 “Quema se tlacatl mocuilia se sihuatl para elis itlahuical, huan teipa ayacmo quipactis pampa quipantilía quichijtoc catli amo cuali, yaya hueli quimacas se amatlajcuiloli catli quijitohua para quicahua huan teipa quitojtocas tlen ichaj. 2 Huan sintla nopa sihuatl quisas huan sempa monamictis ica seyoc, 3 huan miquis ihuehue catli teipa mocuilia o sintla yaya nojquiya quijicuilos se amatlajcuiloli para quicahuas, 4 nopa tlacatl catli elqui iachthui huehue amo huelis sempa mocuilia pampa eltoc quen ijtlacajtoc nopa sihuatl para ya. Ya ni se tlamantli catli TOTECO amo quinequi quiitas. Huajca xijpiyaca cuidado para amo anquihualicase tlajtlacoli ipan nopa cuali tlali catli amo TOTECO Dios anmecmacas para amoaxca.

Sequinoc tlanahuatilme

5 “Sintla se tlacatl yancuic mosihuajtijtoc, amo quinamiqui yas ipan tlahuilanlistli, niyon amo huelis quiselis se tequitl para se xihuitl. Yaya huelis itztos ipan ichaj huan quimacas paquillistli isihua catli mocuilijtoc.

6 “Amo aqui huelis tetlanejtis tomi huan tlajtlanis ma quiprendajcahuilica se molino o nopa tetl catli ipan quitijtisij trigo para harina pampa amo huelis quichihuase pantzi. Nopa elisquia quen quitlajtlanisquia ma quimaca inemilis.

7 “Sintla anquipantise se israelita catli quiichtectoc seyoc israelita, o catli quichihuase para seyoc israelita ma quitequipano san tlamic, o sintla anquipantise catli quinemaca seyoc israelita, monequi anquimictise nopa israelita catli fiero quichijtoc para tlamic catli amo cuali catli onca tlajtajco amojuanti.

8 “Monequi xijnetlocaca senquistoc catli anmecchilhuese nopa levita totajtzitzit sintla onca nopa cocolistli catli itoca le-

pra, pampa niquinnahuatijtoc catli monequi anmechilhuise huan monequi amojuanti xijneltocaca nochi catli quijtose ica cuidado. 9 Xiquelnamiquica catli quichijqui TOTECO Dios ica María quema tiquisayaj ipan tlali Egipto.

10 “Sintla antetlanejtise se tlenijqui, amo xicalaquica ipan ichaj para anquicuilise catli amechprendajcahuilis. 11 Ximochiyaca calixpa huan yaya quiqxistis huan amechmacas catli amechprendajcahuilis. 12 Huan sintla yaya se masehuali neltecneltzi huan amechprendajcahuilis itlaque, amo xicochica nopa tlayohua ica itlaque ipan amochaj. 13 Quema temos tonati monequi anquicuepilise para huelis mopiquis ica itlaque quema cochis huan yaya amechtiochihuas pampa anquitlaxtlaque. Huan amoTECO Dios amechitas para anquichijtoque catli xitlahuac iixpa.

14 “Amo xijc妖cayahuaca se catli teicneltzi catli amechmapalehuía, niyon amo xijhuejcahaultica para anquitlaxtlahuise, masque eli se catli san sejco anhualhuij, o se tlacatl catli seyoc tlali ejquetl catli amohuaya itztoc ipan amoaltepe. 15 Xijtlaxtlahuica se teicneltzi mojomostla quema ayamo oncalaquí tonati pampa yaya teicneltzi huan quimonequilá nopa tomi para ica mopanoltis. Pampa sintla amo, huelis yaya quitzajtzilis TOTECO huan quiilhuis catli anquichijtoque huan TOTECO quiitas para antlajtlacolchijtoque.

16 “Amo hueli anquimictise se tetaj por catli fiero quichijtoc se icones. Niyon amo hueli anquimictise icones se masehuali por catli quichijtoc itata. Quema monequi anquimictise se masehuali, xijmictica sesen por itlaixpanol catli yaya iseltzi quichijtoc.

17 “Xiquinchihuilica san catli xitlahuac nochi icnotitzti, cahualme huan sequinoc tlali ehuani. Amo quema xijtlajtlanica se cahualti ma amechprendajcahuili iyyo. 18 Nochipa xiquelnamiquica para achitihui antetequipanohuayayaj san tlapic ipan tlali Egipto, huan amoTECO Dios amechquixti. Huajca yeca nimechnahuatía xijchihuaca ni tlanahuatilme.

19 “Quema anquipixcatinemij trigo ipan amotrigojmil huan anquitaj para anquipanoque se trigo tzontli, amo ximocuepaca para anquipixcase. Xijc妖tehuaca para se seyoc tlali ejquetl, o se icnotzi, o se cahuali ma mocuili catli amohuaya itztoc. Huan quej nopa TOTECO Dios amechtiochihuas ipan nochi catli anquichihuase.

20 “Huan nojquiya quema anquihuítique amoolivo cuahua para ma huetzica amoolivos, amo xijhuitequica ininmacuayohua ome hueltas. Catli mocahuas elis para nopa seyoc tlali ehuani, nopa icnotitzti huan nopa cahualtzitzit.

21 “Huan quema anquitequiláj itlajca amoxocomecamil, amo xicompanuica sesen tzontli para anquicuisse catli mocahua. Xiquinchihuilica nopa seyoc tlali ehuani, huan icnotitzti huan cahualme. 22 Xiquelnamiquica amojuanti nojquiya aneltoyaj antetequipanohuani ipan tlali Egipto, huan yeca na nimechnahuatía xijchihuaca nochi ni tlanahuatilme.

Más tlanahuatilme

25 “Quema masehualme quipiyaj se inialantli huan yohuj monextitj iniixtla jueces campa mosehuíaj para ma quitlajtolsencahuaca, nopa jueces monequi quimanahuise catli amo tleno quichijtoc huan quitlatzacuiltise catli tlaixpanotoc. 2 Sintla quinamiqui catli tlaixpanotoc para ma quihuitequica, nopa juez tlanahuatis ma quiixtlapachoca huan nopona iixtla ma quihuitequica tlen quesqui hueltas quinamiqui por catli quichijtoc. 3 Huelis quihuitequise se masehuali hasta 40 hueltas, pero amo más, pampa huelis tlahuel anquicocose o anquipinahualtise tlamiyacapa.

4 “Amo xijcamailpica se toro catli ipan moquejquetza trigo para quiyolquixtis.

Se conetl para quihuicas itoca itata catli mijqui

5 “Sintla ome tlaca icnime itztoque ipan san se tlali huan se miquis huan amo quicajtehuas niyon se icones, nopa icahual monequi monamictis ica se tlacatl catli huala ipan ifamilia catli mijqui. Monequi

ihuejpol nopa cahuali mocuilis para isihu huan quichihuas catli quinamiqui para ihuejpol se cahuali ma quichihuua. 6 Huan nopa achtihui pilconetzi catli nopa sihuatl quitlacatiltis monequi quihuicas itoca nopa tlacatl catli mijqui huan teipa quiselis itlal. Quej nopa itoca yaya catli mijqui amo ixpolihuis campa israelitame. 7 Pero sintla nopa tlacatl amo quinequis mosihuajtis ica ihuejpol, nopa sihuatl monequi monextis iteno ipuerta nopa altepetl campa mosehuáj nopa huehue tlacame huan quinilhuis: ‘Nohuejpol amo qui-nequi mosansejcotilis nohuaya quen qui-namiqui para ma mocahua itoca iicni ipan tottal tiisraelitame.’ 8 Huajca nopa huehue tlacame tlen nopa altepetl quinotzase no-pa tlacatl huan quicamanalhuese huan sin-tla yaya quisenhuiquilis quiijtos amo qui-nequi mosihuajtis ica ihuejpol, 9 nopa si-huatl quinechcahuis huan iinixtla nopa huehue tlacame quiqxtilis itecac ipan iicxi, huan quixchijchas huan quiijtos: ‘¡Quej ni quichihuiláj se tlacatl catli amo quinequi quinpiyas coneme para iicni!’ 10 Huan teipa nochí israelitame quipina-haultise huan quitocaxtise: ‘Nopa tlacatl catli san iicxipa nemí pampa quiqxtili-jque itecac.’

Sequinoc tlanahuatilme

11 “Sintla ome israelita tlacame mohuila-naj huan monechcahuúa isihua se tlen nopa tlacame para quimanahuis ihuehue huan quiitzquis ne seyoc tlacatl ipan itlacayo campa amo quinamiqui, 12 huajca nopa te-quitini tlanahuatise ma quitzontequilica imax nopa sihuatl. Ma amo quitlasoijtlaca.

13-14 “Quema antlanemacaj o antlaco-huaj, amo xijtequihuica tlata-machihuali catli amo xitlahuac tlata-machihua. Nyon amo xijpiyaca para amoaxca se tlata-machihuali hueyi huan se catli tziquitetzi. 15 Monequi xijpiyaca cuajcuali tlata-machihualme catli ajsitoc para quej nopa an-itztose miyac xihuitl ipan nopa tlali catli amoTECO Dios anmechmacas, 16 pampa TOTECO Dios quincualancaita nochí mase-hualme catli tlacajcayahuaj huan quichi-huaj catli amo xitlahuac.

Ma quintzontlamiltica amalecitame

17 “Xiquelnamiquica catli anmechchi-huilijke nopa amalecitame ipan nopa oj-tli quema anquistinemiyayaj tlen tlali Egipto. 18 Xiquelnamiquica catli quichij-que para quema nochí amojuanti tlahuel ansiyajtoyaj huan antlapoloyayaj. Nyon quentzi amo quiimacasque Toteco Dios, huan yajque amoica ipan ojtlí huan quin-huylanque amomasehualhua catli san ica yolic mohuahuatatztiyohuiyaj amoica. 19 Huajca quema amoTECO Dios ya an-mechmanahujtos tlen nochí amocualan-caitacahua catli anmechyahualose ipan nopa tlali catli anmechmacas para amoax-ca, monequi xiquinixpolihuiltica nochí amalecitame tlen ni tlaltipactli para amo aqui quielnamiquis sintla se tonal itzto-yaj. Amo xiquelcahuaca xijchihuaca ya ni.

Nopa tlacajcahualistli tlen nopa achtihui pixquistli

26 “Ya ni catli monequi xijchihuaca quema anajsitose ipan nopa tlali catli amoTECO Dios anmechmacas para amoaxca, huan nopona ammocajtose para anitztose. 2 Monequi xijcuica nopa achtihui itlajca tlen nopa pixquistli catli anmechmacas nopa tlali huan anquihuicase ipan se chiquihuitl hasta campa TOTECO quitlapejpenijtos para quiquetzas itiopa campa itzto. 3 Huan nopona ammonextise campa nopa totajtzi catli tequiti huan an-quiilhuese: ‘Ica ni ofrenda, na niquijtohua ama iixtla TOTECO noDios para ya nicalaj-qui ipan nopa tlali catli tohuejcapan tata-hua quintencahuili techmacasquía.’ 4 Huan nopa totajtzi quicuis nopa chiqui-huitl catli anquimacase, huan quitlalis iix-melac itlaixpa amoTECO Dios, 5 huan an-quiijtose ni camanali iixtla amoTECO Dios:

Nohuejcapan tata Jacob eliyaya se arameo tlacatl catli nechcatitoya para miquis quema calajqui ipan tlali Egipto ica tlahuel quentzi iconehua. Pero no-pona mocajqui huan iixhuihua mochij-que tlahuel miyaqui masehualme ica miyac chicahualistli. 6 Pero teipa nopa egiptome quintequipanoltiyaj ipan tequitl catli nelia ohui huan quintlaiji-

yohuiltyayaj tlahuel. **7** Huajca nohuejcapan tatahua quitlajtlanjque TOTECO ininDios ma quinpalehui huan yaya quintlacaquili. Huan quinitac teicneltique, huan quenicatza quintlajiyohuiltyayaj huan quiitac nochi inintequi catli ohui. **8** Huan ica ihueyi chicahualis yaya tlahuel quimmajmati egiptome ica miyac tlanextilijcayotl huan miyac teztatl catli quichijqui huan techquixti tlen tlali Egipto. **9** Huan techhualicac nica huan techmacatoc ni tlali campa onca nochi tlamantli hasta onmocahua. **10** Huan yeca ama na nijhualica nopa achihui pixquistli tlen nopa tlali catli TOTECO Dios nechmacatoc.

Quej nopa anquijitose.

“Huan teipa xijtlalica nopa chiquihuitl iixtla amoTECO Dios huan ximotlancuquetzaca iixtla huan xijhueyichihuaca. **11** Teipa xijchihuaca se ilhuitl para xiyolpaquica iixpa TOTECO ica nochi tlamantli catli yaya anmechmacatoc ta huan mochampoyohua. Nojquia xiquinnotzaca nopa levitame huan seyoc tlali ehuan catli amohuaya itztose para ma moyolpaquiltica amohuaya ipan nopa tlacualistli.

Nopa seyoc diezmo

catli monequi sesen eyi xihuitl

12 “Huan ipan nopa expa xihuít monequi sempa xiquiyocaquixtica seyoc amo-diezmo tlen nochi catli anquipiyaj. Sempa xiquixtilica se chiquihuitl ipan sesen majtlactli chiquihuime tlen itlajca amotlal huan xiquinmacaca nopa levitame, nopa icnotzitzi, nopa cahualtzitzi, huan ini-juanti catli sequinoc tlali ehuan catli itztoque ipan amoaltepe ipan amotlal para quej nopa injuanti huelise tlacuase hasta ixhuise. **13** Huan teipa sesen anquijitose iixtla amoTECO Dios:

Ya niquiyocaquixtijoc tlen nochaj nopa diezmo catli tlatzejzeloltic para ta. Huan ya niquinmajmacatoc nopa levitame, nopa icnotzitzi, nopa cahualtzitzi huan nopa sequinoc tlali ehuan catli itztoque ipan totlal. Nijchijtoc nochi catli ta titlanahuatijtoc. Amo ni quelcrajqui, niyon amo niquixpanotoc

niyon se motlanahuatil. **14** Amo tleno tlen nopa diezmo nijcuajqui quema ni-momijcahujtoya, niyon amo niquitzqui quema amo nitlapajpactic nieliaya, huan amo niquintencahuiljtoc catli mijcatzitzi. TOTECO Dios, nimitznelto-quiljtoc huan nijchijtoc nochi catli technahuatijtoc. **15** Tlen ilhuicac xijtlachili ipan mochaj tlatzejzeloltic huan techtiochihua tisraelitame pampa tojuanti timomasehualhua. Xijtiochihua ni tlali catli nochi temaca hasta onmocahua. Ta techmacatoc ni tlali san quen tiquintencahuili tohuejcapan tatahua tijchihuasquía.

Israelitame itztoyaj tlaiyocatlalilme para TOTECO

16 “Ama ni tonal amoTECO Dios anmechnahuatía xijoquilica nochi ni tlana-huatilme huan leyes. Monequi ica miyac cuidado xiquinneltocaca ica nochi amoyo-lo huan ica nochí amoalma. **17** Ama anquijitoque para TOTECO Dios, yaya amo-TECO. Huan anquijitoque anquitoquilijtiyase iojhui huan anquichihuase nochi itlamachtilhua, ileyes huan itlanahuatilhua huan anquitoscacaquise. **18** Nojquia-ama amoTECO quijitojtoc para anisraelita-me, animasehualhua catli san yaya iaxca-hua quen anmechtencahuili quichihuas-quía huan monequi xijneltoquilica nochi itlanahuatilhua, **19** para yaya anmechhue-yitlalis más huejcapa que nochí sequinoc masehualme. Más masehualme anmech-hueyichihuase, huan anmechiximatise huan anmechtlepanitase que nochí sequinoc masehualme catli TOTECO quinchijtoc. Huan anelise antlaiyocatlalilme huan antlatzejzeloltique para TOTECO Dios quen yaya anmechilhujtoc.”

Teme ipan tepetl Ebal para se tlaelnamiquilistli

27 Teipa Moisés ininhuaya nopa huehue tlacame tlen israelitame quin-nahuatijque nopa masehualme huan quinhlui:

“Xijoquilica nochí ni tlana-huatilme catli ama nimechnahuatía. **2** Ipan nopa to-

nal quema anquiixcotonase nopa hueyatl Jordán huan ancalaquise ipan nopa tlali catli amoTECO Dios amechmacas, monequi xiquinquejquetzaca teme catli huejhueyi huan xiquinchipahualtica ica nextli. 3 Huan ipan nopa teme xiquijcuiloca nochí camanali tlen ni tlanaahuatilme catli ni mechnahuatijtoc xijchihuaca. Ya ni anquichihuase quema achtihiui anajsitj ipan nopa tlali catli nochí temaca hasta onmocahua catli amoTECO Dios amechmactilis quen quiijtojtoc quichihuas. 4 Huajca quema ya anquipanotose nopa hueyatl Jordán, monequi xijtlananaca ipan tepetl Ebal nopa teme catli ya nimechilhuijtoc, huan xiquinchipahualtica ica nextli. 5 Nojquiya monequi xijchihuaca se tlaixpamitl ica teme para amoTECO Dios, huan amo xiquintejtequica nopa teme ica niyon se tepestli. 6 Xiquintequihuica teme catli nejnejmaxtic huan amo tlatectli para ica nopa xijchihuaca nopa tlaixpamitl. Huan noppa ipan nopa tlaixpamitl xijmactilica amoTECO Dios tlacajcahualistli tlatlatili. 7 Xijmacaca tlacajcahualistli para tlasehuilistli huan noppa iixtla amoTECO Dios xijcua ca tlen nopa tlacajcahualistli huan xiihuichihuaca. 8 Ipan nopa teme xiquijcuiloca para cuali ma nesi nochí ni camanali tlen ni tlanaahuatilme.”

9 Teipa Moisés ihuaya nopa levita totajtzitzi quinilhuijque nopa israelitame:

“Israelitame, amo ximolinica. San xijtlacaquilica. Ama amojuanti anmocuepto que imasehualhua amoTECO Dios. 10 Huajca monequi xijneltoquilica amoTECO Dios huan xijchihuaca nochí itlanahuatilhua huan itlamachtilhua catli ama timechnahuatijtoque xijchihuaca.”

Catli quinajsis israelitame sintla amo quineltocase

11 Huan nojquiya ipan nopa tonal Moisés quinilhui nochí nopa masehualme:

12 “Quema anquipanotose nopa hueyatl Jordán, nopa huejhueyi familias tlen Simeón, Leví, Judá, Isacar, José huan Benjamín moquetzase ipan nopa tepetl Gerizim para tlayolmelahuase tlaque tlatichuali anisraelitame anquipantise sintla

anquineltocase TOTECO. 13 Huan nopa huejhueyi familias tlen Rubén, Gad, Aser, Zabulón, Dan huan Neftalí moquetzase ipan tepetl Ebal para tlayolmelahuase tlaque tlatelchihuali anquiselise sintla amo anquineltocase TOTECO. 14 Huan nopa levitame tlanaanquilise ica inintoscac catli chicahuac para nochí anisraelitame anquiaquise huan quiijtose ni camanali:

15 Tlatelchihuali ma eli catli quichichihuas se tlaixcopincayotl ica tepestli tlaatiltli, o catli ica imax quinchichihuas tiotzitzí, huan ichtacatzí quintlalis canajya campa amo aqui quimatis sintla quinhueyitlalis. Ya nopa TOTECO amo quinequi quiitas.

Huan nochí anisraelitame anquijtose:
‘Quej nopa ma eli.’

16 Tlatelchihuali ma eli catli amo quittlepanitas itata o inana.

Huan nochí anisraelitame anquijtose:
‘Quej nopa ma eli.’

17 Tlatelchihuali ma eli catli quipatlas nopa teme catli quinextia se nepamtli para quiichtequilis seyoc itlal. Huan nochí anisraelitame anquijtose:
‘Quej nopa ma eli.’

18 Tlatelchihuali ma eli catli quicuaplos ipan ojtlí se catli popoyotzi. Huan nochí anisraelitame anquijtose:
‘Quej nopa ma eli.’

19 Tlatelchihuali ma eli catli quichihuilis catli amo xitlahuac se seyoc tlali ejquetl, o se cahualtzi o se icnotzi. Huan nochí anisraelitame anquijtose:
‘Quej nopa ma eli.’

20 Tlatelchihuali ma eli catli ihuaya motecas isihua itata pampa quiixpanotoc itata.

Huan nochí anisraelitame anquijtose:
‘Quej nopa ma eli.’

21 Tlatelchihuali ma eli catli quichihuas tlen hueli ica se tlapiyali.

Huan nochí anisraelitame anquijtose:
‘Quej nopa ma eli.’

22 Tlatelchihuali ma eli catli ihuaya motecas isihua icni o se catli icone itata o inana.

Huan nochí anisraelitame anquijtose:
‘Quej nopa ma eli.’

- 23 Tlatelchihuali ma eli catli ihuaya motecas imona.
Huan nochí anisraelitame anquijítose:
‘Quej nopa ma eli.’
- 24 Tlatelchihuali ma eli catli quimictis seyoc ichtacatzi.
Huan nochí anisraelitame anquijítose:
‘Quej nopa ma eli.’
- 25 Tlatelchihuali ma eli catli quiselis tomi para quimictis seyoc catli amo tleno quichijtoc.
Huan nochí anisraelitame anquijítose:
‘Quej nopa ma eli.’
- 26 Tlatelchihuali ma eli catli amo quitlepanitas ni tlanahuatilme huan amo quineltocas.
Huan nochí anisraelitame anquijítose:
‘Quej nopa ma eli.’

Tlatiochihualistli para catli tlaneltocaj

(Lv. 26:3-13; Dt. 7:12-24)

- 28 “Sintla nelnelía melahuac anquinetlócase amoTECO Dios huan anquichihuase nochí ni tlanahuatilhua catli ama nimechnahuatía, huajca yaya anmechchihuas más anhuejhueyi que nochí sequinoc masehualme ipan ni tlalipactli.
- 2 Sintla anquitlacaqulise catli TOTECO Dios anmechilhuijtoc, anquipantise nochí ni tlatiochihualistli.
- 3 Anelise antlatiochihualme ipan altepetl huan campa anmilchihuase.
- 4 Tlatiochihualme elise nochí amocone-hua, huan nochí catli anquipixcase, huan nochí inincone-hua amohuacaxhua, amoborregojhua huan nochí sequinoc amotlapiyalhua.
- 5 Anmechtiochihuas huan nochí amo-chiquihua tzontis ica cuatlaclti huan nojquiya oncas catli anquite-quihuise campa anquitzotzoltíaj amoharina para anquichihuase amopantzi.
- 6 TOTECO anmechtiochihuas ipan nochí tlamantli catli anquichihuase. Anmechtiochihuas quema anhualahuij huan quema anyohuij.
- 7 “Amomaco TOTECO anmechmactilis amocualancaitacahua catli quinequise anmechhuilanase. Masque hualase campa

amojuanti cuali motecpantose, pero quen hueli yase para mochololtise tlen amojuanti.

8 “TOTECO ammechtiochihuas huan quietemitis amocuacalhua campa anquiajoctose catli anquipixcatoque. Ammechtiochihuas ipan nochí tlamantli catli anquichihuase. Yaya tlahuol anmechtiochihuas ipan nopa tlali catli anmechmacas para ipan anitztose, huan anitztose ica paquiplistli.

9 “TOTECO anmechchihuas se xinach masehualme catli antlatzejzeloltique para ya quen amecheitenahuilijtoc anmechchihuas sintla anquichihuase itlanahuatilhua huan anquitoquilise iohui.

10 Huan nochí sequinoc masehualme ipan tlalipactli quiitase para anisraelitame anitztque masehualme catli TOTECO moaxcatijtoc. Huan nochí quimatisse anquihuicaj itoca huan anmechimacasise.

11 TOTECO anmechmacas tlahuol miyac tlamantli catli cuali para anmoricojchihuase. Anmechmacas miyaqui amocone-hua, huan amotlapiyalhua quinpiyase miyaqui inincone-hua. Yaya anmechmacas miyac pixquistli ipan nopa tlali catli quintencahuilijtoya amo-huejcapan tatahua anmechmacas.

12 Huan TOTECO quitlapos campa onca ihueyi ricoyo nepa ilhuicac huan anmechmacas atl quema itechmonequi nochí amotlal. Huan quitiochihuas nochí amotequi. Anquipiyase hasta onmocahua para huelis anquintlanejtise tlacuallistli sequinoc tlalme imasehualhua. Pero amojuanti amo aqui monequis anquitlajtlanise ma anmechtlanjejtica se tlenijqui.

13 TOTECO anmechchihuas antlayacanase huan amo anhualase tlaica. Mojmostla más antlejcose huan amo anyase para tlatzintla. Pero monequi xijneltoca-ca itlanahuatilhua amoTECO Dios catli ama nimechnahuatía huan ica tlamocuitlahuili, nochí xijchihuaca.

14 Amo ximoiyocatlalica tlen ni tlanahuatilme para anyase campa amoopoch, niyon amo-nejmac, san xitlahuac xiyaca. Huan amo quema xiquintoquilica tiotzitzí, niyon amo xiquintlepanitaca.

**Tlatelchihualistli para
catli amo quinelto case TOTECO**

(Lv. 26:14-46)

- 15 Pero sintla amo anquineltocase amoTECO Dios, niyon amo anquichijtine-mise noch i tlanahuatilhua huan ileyes catli ama na nimechnahuatijtoc, hualas amopani noch i tlatelchihuali.
- 16 Anelise antlatelchihualme ipan alte-petl huan campa anmilchihuase.
- 17 TOTECO quitelchihuas amochiquihua huan mocahuase cactoque. Quitel-chihuas campa anquitzotzoltilaj amoharina huan amo tleno anqui-piyase.

- 18 Elise tlatelchihualme amocone-hua, huan noch i catli anquipixcase. Elise tlatelchihualme inincone-hua amo-huacaxhua, huan amo borregojhua huan noch i sequinoc amotlapiyal-hua.
- 19 Huan amojuanti nojquiya anelise antlatelchihualme ipan noch i tlaman-tli catli anquichijtiyase. Quena, anelise antlatelchihualme quema an-hualahuij huan quema anyohuij.

20 "TOTECO anmechtitlanilis tlatelchi-huali huan anmechchihuas ximocuajcuap-loca huan amo anquimatise tlaque anqui-chihuase ipan noch i nopa tlaman-tli catli panos hasta ipan se tlatoctzi anmechtontla-miltise amocualancaitacahua pampa anqui-chijtoque catli fiero huan anquitlahuelca-toque TOTECO. 21 TOTECO anmechtitlanilis tlahuel hueyi cocolistli hasta noch i anmech-tontlamiltis ipan nopa tlali campa ancala-quise para amoaxcatise. 22 TOTECO anmechmacas huac tlatlaxistli, tlasamahuilot huan totonic ipan amotlacayo. Oncas tlato-tonilotl catli tejiyomictis, tlahaquistli huan huejhueyi cocolistli ipan amotrigoj-mil. Huan noch i cocolistli anmechtepotz-tocas hasta anmechtontlamiltis. 23 Nopona huejcapa ipan ilhuicactli huan tlatzintla ipan tlali elis quen tepostli. Ilhuicactli anmechtlasomatis nopa atl huan tlali anmechtlasomatis itlajca. 24 TOTECO quichi-huas ma huetzi amopani xali huan amo atl. Quena, amotlal quicuepas tlaltejpoctli hasta anmechtontlamiltis.

**Israelitame amo tlatlanise
sintla tlajtlacolchihuase**

25 "Huan TOTECO anmechtemactilis ininmaco amocualancaitacahua para ma anmechtlanica. Anyase campa inijuanti cuali ammotecpantose, pero teipa ammotlamixelose para amnochololtise tlen inijuanti. Nochi masehualme ipan tlaltipactli anmechijiyase pampa tlahuel fiero anitz-tose. 26 Nopa totome huan tecuanime qui-cause amotlacayohua huan amo aqui itz-tos para quinmajmatis.

27 "TOTECO anmechtitlanilis fiero coco-me quen quinchihuli nopa Egito ehuani, huan anmechchihuas tlahuel xisamahui-yaca campa hueli ipan amotlacayo. Anmechmacas sahuame, huan nopa cocolis-tli catli tlahuel ajhuayohua huan amo on-cas pajtli catli ica amnochicahuase tlen ni cocolistli. 28 Nojquia TOTECO anmech-chihuas xilocjitiyaca, xipopoyotiyaca, huan ximocuajcuapolojinemica. 29 Huan antlamachijchintinemise quema tona quen se popoyotzi quichihua ipan itzintla-yohuilo. Niyon se tlaman-tli amo quisas cuali ipan noch i catli anquichihuase. Tla-toctzitzi anmechtla jiyohultise huan anmechtla chtequilise. Amo aqui hualas para anmechpalehuis. 30 Anquijtlanise se si-huatl para amosihuajtise ihuaya, pero se-yoc ihuaya motecas. Amnochijchihuilise amochajchaj, pero amo anquiaxilise para anquitequihuise. Anquichihuase xocome-ca mili, pero amo huelis anquihuelicmati-se itlajca. 31 Amoixtla quiechtequise huan quihuejhuelse inacayo amotoro catli tlapoxtionia, pero niyon quentzi amo huelis anquicuase. Anmechculise amopil-burro huan ayacmo anmechcuepilise. Amoborregojhua mocahuase ininmaco amocualancaitacahua, huan amo aqui anmechpalehuis para sempa amoaxcatise. 32 Amoixtla quinmactilise sequinoc tlali ehuani amooquichpilhua huan amosihuapilhua. Masque tlahuel anquintemose mojmostla huan anquinequise anquinita-se, amo tleno huelis anquichihuase. 33 Nopa pixquistli tlen amotlal huan itlajca noch i amotequi quicuase masehualme catli amo anquiniximati. Huan antlajijyohuise

nochipa huan san tlen hueli ammechchi-huilise mojmostla. ³⁴Quema anquitätase nochi ni huejhueyi tequipacholi, anmolo-cojuepase. ³⁵TOTECO ammechtajijoy-huilitis ica nopa cocolistli catli quichihua ma palani amotlancuaco huan amometz-tomahuuya. Ica nopa cocolistli amo onca pajtli. Huan ipan nochi amotlacayo tlen amoixihua hasta ipan amotzonteco an-quipiyase cocome catli amo quipiya pajtli.

³⁶“TOTECO quichihuas para amojuanti huan amotlanahuatijsca anmechhuicase ipan seyoc tlali catli amojuanti huan amo-huejcapan tatahua amo anquiximatque. Huan nopona ammechfuerzajhuese anquin-hueyichihuase tiotzitzti catli tlachijchihual-me ica cuahuitl huan tetl. ³⁷Huan annesise fiero hasta anquinmajmatise nochi mase-hualme nopona catli amechitase. Huan an-mechhuetzquilise huan anelise quen se ahuilcamanalí para inijuanti ipan nopa tlali campa TOTECO ammechhuicas.

**Sintla tlajtlacolchihuase,
amo oncas tlajca ininmil**

³⁸“Anquitocase miyac xinachtli pero anquiquixcase pilquentzi, pampa quitlamí-cuase chapolime. ³⁹Anquitocase xocomeca milme huan anquinmocuitlahuise. Pero amo anquitequise inintlajca, niyon amo anquijise iayo pampa ocuillime quitlamí-cuase. ⁴⁰Anquipiyase olivo cuame campa hueli ipan amotlal, pero amo huelis ampolose aceite, pampa tlajca iseli tepehuis. ⁴¹Anquinpiyase amotelpocahua huan amoichpocahua, pero amo mocahuase amohuaya pampa quinhuicase ilpitoque ipan sequinoc tlalme para tetequipanose san tlaptic. ⁴²Chapolime quitlamicuase nochi amocuahua huan nochi amotlatoc. ⁴³Nopa sequinoc tlali ehuani catli itztose ipan amotlal mochihuase más miyaqui huan más tejtetique. Huan amojuanti an-quipolojitiyase más huan más amochica-hualis. ⁴⁴Inijuanti amechtlatlanejtise huan amojuanti amo tleno anquipiyase para anquintlanejtise. Inijuanti tlawayacana-se, huan amojuanti anyase hasta tlaica.

⁴⁵“Nochi ni tlatelchihualme elise para amojuanti sintla amo anquinequij anqui-

caquise amoTECO Dios. Ni tlatelchihual-me amechequiliyase hasta amechajsise huan amechezontlamiltise sintla amo anquinequij anquichihuase itlana-huatilhua huan ileyes catli yaya tlanahua-tijtoc. ⁴⁶Nochi ni fiero tlamantli amechajsise sintla amo antechtlacaquiláj. Huan elis quen se tlanextilijcayotl para nochipa catli amechnexitilis amojuanti huan amoixhuihua nopa hueyi tlajtlacoli catli an-quichijtoque iixpa TOTECO. ⁴⁷Pampa amo anquihueyichijque amoTECO Dios ica pa-quilistli huan ica cuali amoyolo iixpa que-ma miyac tlamantli amechmacayaya. ⁴⁸Huajca yaya ammechcahuilis anquinte-quipanose amocualancaitacahua catli TOTECO amechetitlanilis para amecheatlani-quij. Huan antetequipanose ica mayantli, huan amiquistli, niyon amo anquipiyase amoyoyo. Nochi tlamantli anquipolose. AmoTECO ammechchihuas antetequipano-se chicahuac hasta amechezontlamiltis. Antequítise quen se tlapiyali ica se tepestli ilpitoc iquechtlia catli tlahuel quicoco-hua. ⁴⁹TOTECO quinhuaticas campa amojuanti sequinoc tlali ehuani catli más huej-ca itztoque ipan tlalipactli. Huan ame-chajsiquij quen se cuajtli patlantihuala nelchicahuac huan quicuitehuas se piyo. Elise se xinach masehualme catli niyon inincamanal, amo anquimachilise. ⁵⁰Elise masehualme catli ixqualantose, huan amo quintlepanitase huehuentzitzti, niyon amo quinicelise pilconetzitzti. ⁵¹Huan ininsol-dados quincuase nochi inincone-hua amo-tlapiyalhua huan quicuase tlajca amomil-hua hasta quitlamiltise. Amo amechca-huilise trigo, niyon xocomeca atl, niyon aceite, niyon inincone-hua amohuacax-hua, niyon inincone-hua amoborregojhua, huan ammiquise ica mayantli.

⁵²“Quiyahualose nochi amoaltepehua huan quinhuilanase hasta quihuehuelo-tzase nochi calme catli más huejhuejcapa huan nopa tepame catli cuali tlachijchi-huali catli ipan ammotemachijtoyaj para amechmanahuise. Quinyahualose huan quintlanise nochi altepeme ipan nochi no-pa tlali catli amechmacas amoTECO Dios. ⁵³Tlahuel amayanase huan anquincuase

amooquichpilhua huan amosihuapilhua catli TOTECO Dios amechmacatoc tlen amotlacayo. Quena, ininnacayo anquicua-se quema amechhuilanase amocualanca-itacahua. **54** Hasta nopa tlacame catli más quipiyaj teicnelili huan más tetlaosjtaj campa amojuanti, teipa fiero quitlachilis iicni, huan isihua catli quiucnelyaya, huan iconehua catli noja mocahuaj itztoque. **55** Huan amo quinmacas quentzi nopa nacatl tlen seyoc icone catli quicua pampa amo tleno más oncas. Tlahuel antlaijiyohuise quema amocualancaitacahua quinyahualose nochi amoaltepehua. **56** Huan nopa sihuatl catli ama achi más momahui-lia huan amo quinequi moquetzas tlalchi iicxipa, teipa quincualancaitas ihuehue huan iconehua catli tlahuel quinicnelyaya. San fiero quintlachilis. **57** Quincualancaitas hasta ichtacatzi quicuas itecyo catli quisqui ijttico quema tlacatqui icone para amo quinmacas sequinoc iconehua, pampa amo oncas tlacualistli ipan nopa tonali quema amocualancaitacahua hualase huan quinhuilanase amoaltepehua.

58 “Nochi ya ni hualas amopani sintla amo anquinequise anmomocuitlahuise huan anquichihuase senquistoc nochi ni tlanahtuilme catli ijcuilijtoc ipan ni amatlapohuali. Huan sintla amo anquimahui-lise amoTECO Dios catli temajmati huan catli quinamiqui para nochi amojuanti xij-tlepanitaca, **59** yaya amechtitlanilis amojuanti huan amoixhuihua nochi ni huejhueyi cocolistli catli temajmati huan amo quipiya pajtli huan tlahuel antlaijiyohuise. **60** Anmechmacas nochi nopa fiero cocolistli catli quinajsic nopa masehualme tlen tlali Egipto huan tlahuel amechmaj-matiyaya. Huan nopa cocolistli amo quema amechcahuas. San anquisenhuiquilese anquijiyohuise mojmostla. **61** Nojquia TOTECO amechmacas tlatzacuiltoni huan amechtitlanilis nochi sequinoc cocolistli catli más fiero catli amo mopantía ijcuilijtoc ipan ni amatlajcuiloli tlen tlanahtuilme. Huan antlaijiyohuise hasta yaya amechtzontlamiltis. **62** Huan san se ome an-israelitame amocahuase anitztoque, masque aneltoyaj anmiyaqui quen ininmi-

yaca sitlalime ipan ilhuicac, pampa amo anquitlacaquilijque itoscac amoTECO Dios.

63 “Huan quen TOTECO paquiyaya para amechchihuilíá catli cuali huan amech-miyaquilíá, teipa paquis pampa yaya amechtlamtiasolhuilijtos, huan ya amechtzontlamiltis. Huan sintla amo anquineltocase amechpolihuitlis ipan nopa tlalme campa anyase antetequipanotij. **64** TOTECO amechsemanas huan amech-jejxelos ipan nochi masehualme tlen se iyecapa tlali hasta seyoc. Huan nopona anquinhueyichihuase tiotzitzti, huan tlaixcopincayome catli tlachijchihualme ica cuahuitl huan tetl catli amojuanti huan amohuejcapan tatahua amo quinximat-que. **65** Huan quema anitztose ipan nopa sequinoc tlalme, amo anyolpactose, niyon amo anquipantise se piltlaltzi campa hue-lis anmosiyajquetzase, pampa TOTECO amechchihuas ximajmahuica. Yaya quichi-huas ma temis amoixteyol ica cuesoli, huan temis amoyolo ica miyac tequipacholi. **66** Mojmostla amonemilis eltos mahuilili. Tlayohua huan tonaya anmajma-huise huan amo quema anquipiyase temachtli amonemilis. **67** Nelía tlahuel anmajmahuise hasta se ijnaloc anquijitose: ‘¡Nijnequisquía ma ya tlayohuiyasquía!’ Huan se tlayohua anquijitose: ‘¡Nijnequisquía ma ya tlanesisquía!’ Quej nopa anquijitose por nochi nopa fiero tlamantli catli anquijitase catli amechchihuas xi-momajmatica. **68** Masque TOTECO amechilhuijtoc para amo quema anmocue-pase tlali Egipto ipan nopa ojtlí ipan catli anquisque, yaya amechhuicas sempa ipan tlali Egipto ipan barcos. Huan nopo-na antlacame huan ansihuame anmone-macase para antetequipanose san tlaptic ica amocualancaitacahua, pero amo aqui quinequis amechcohuas.”

Nopa camanal sencahualli ihuaya TOTECO
29 Ya ni nopa camanal sencahualli ca-tli TOTECO quinahuati Moisés ma quichihua ica nopa israelitame ipan tlali Moab, iyoca tlen nopa seyoc camanal sen-cahualli catli yaya quichijqui ininhuaya

ipan tepetl Horeb^f. 2 Huan Moisés quinsentili nochí israelitame huan niquinilhui:

“Anquiitztoque nochí catli TOTECO qui-chihuili Faraón, huan nochí itlapalehuij-cahua huan nochí imasehualhua ipan tlali Egipto. 3 Anquiitztoque nochí nopa hueyi tlanextilijcayotl huan tiochicahual nextili catli TOTECO quichijqui para tenextilis ihueyi chicahualis. 4 Pero hasta ama TOTECO amo amechmacatoc se amoyolo para xijmachilica tlaque quiijtosnequi nochí nopa tlamantli catli anquiitztoque ica amoixteyol huan anquicactoque ica amo-nacas. 5 Para 40 xihuitl nimechyacanqui ipan nopa huactoc tlali, huan ipan nochí nopa tonali amo tlantoc amoyoyo, niyon amotecac. 6 Amo anquicuajque pantzi, ni-yon amo anquijique xocomeca atl, niyon amo anquijique seyoc tlalistli catli más cococ, pero yaya amechmacac tlacualisti para xijmatica para TOTECO Dios, yaya catli nelía amoTECO.

7 “Quema tiajsicoj ipan ni tlali, quisque techhuilanacoj Sehón, nopa tlana-huatij-quetl tlen Hesbón, huan Og nopa tlana-huatijquetl tlen Basán, pero tiqintlan-que. 8 Huan timoaxcatijque inintial huan tiquinmajmacaque nopa huejhueyi famili-as Rubén, Gad huan tlajco nopa hueyi fa-milia Manasés. 9 Huajca ama monequi xij-chihuaca nochí catli quiijtohuaj ni tlana-huatilme tlen ni camanal sencahualli huan quej nopa nochí catli anquichihuase qui-sas cuali.

10 “Ama nochí anisraelitame amoque-tzaj nica iixtla amoTECO Dios ica nochí amotlayacancahua ipan sesen hueyi famili-a, huan ica huehue tlacame catli quihui-caj tequiticayotl campa amojuanti, huan ica nochí amotlayacanca soldados. 11 Huan itztoque nica nochí amocone-hua, amosihuajhua huan nopa sequinoc tlali ehuani catli amohuaya mocahuaj catli cuajcuahuij huan asacaj. 12 Nochi anitzto-que nica iixtla TOTECO Dios para ancal-a-quise ipan ni camanal sencahualli catli amoTECO Dios ama quichihua amohuaya.

Huan amojuanti nojquiya ammotestigo-quetzase para ammotemacase huan anqui-neltocase nochí catli eltoc ipan ni camanali. 13 Ama yaya quinequi sempa amech-hueytalilis quen animasehualhua. Quine-qui sempa quiijtos ama para yaya amoTe-co Dios quen quintencahuili amohueca-pan tatahua Abraham, Isaac huan Jacob para quichihuasquia. 14 Pero TOTECO amo san quichihua ni camanali huan tlatesti-gojquetztl ica amojuanti, 15 catli ammo-quetzaj nica. Nojquiya quichihua ica nochí sequinoc catli ama ayamo tlacatij para itztose nica iixtla.

16 “Anquielnamiquij cuali quenicatza tiisraelitame tiitztoyaj nepa ipan tlali Egipto huan quenicatza tipanoque ipan sequinoc tlalme huan altepeme catli ti-quinpantijque ipan ojtlí huan tiajsicoj ni-ca. 17 Nojquiya anquinitztoque nopa fiero tiotzitzí huan tlaixcopincayome catli tla-chihualme ica cuahuitl, tetl, plata huan oro catli nopa masehualme quinhueyichi-huayayaj. 18 Amo xijcahuaca ma itzto campa amojuanti se tlacatl, se sihuatl, se familia, o se hueyi familia catli quinequis quihuecamajcahuas TOTECO Dios huan pehuas quinhueyichihiwas inintiotzitzí se-quinoc tlalme. Pampa catli quinhueyichi-huaj tiotzitzí temahuaj huan itztoque quen se cuahuitl catli temaca itlajca catli tecocohua huan temictía.

19 “Amo aqui catli quitlaquila ni ca-manali tlen ni tlatelchihualistli ma moil-huis para amo quema quiajsis ya. Ma amo moilhuis yaya se masehuali catli nelcuali huan moyolilhuijtos amo quiajsis tlatza-cultili masque quichihuas san catli quine-quis huan quinhueyichihiwas tiotzitzí. Sintla quej nopa moilhuis, yaya motlaminen-polos huan amechnenpolos nojquiya. 20 TOTECO ayacmo quitlapojpolhuis catli quej nopa moilhuis. Tlahuel cuanlis ica ya pampa TOTECO quitlasomati itlanahua-tilhua. Huan nochí ni tlatelchihualme catli ijcuilijtoc ipan ni amatlapohuali qui-ajsis catli quej nopa moilhuía. Huan TO-

^f29:1 O Sinai.

TECO quiixpolos ya huan nochí iixhuihua tlen ni tlaltipactli. 21 Huan TOTECO quiyocatlalis nopa tlacatl tlen nochí huejhueyi familias tlen israelitame. Huan Toteco quichihuas ma quiajsi nochí nopa tlatelchihualme catli nopa camanal sencahuali quijtohua para quiajsis huan catli eltoc ijcuilijtoc ipan nopa Tlapohualí tlen nopa Tlanahuatilme.

**Tlaijiyohuise ininconeuhua
sintla tlajtlacolchihuase**

22 “Teipa amoconeuhua catli tlacatise, huan amoixhuihua catli hualase teipa, huan nochí sequinoc tlali ehuani catli ajisquij tlen huejhuejca, quittase nochí nopa tlatzacuiltlistli huan cocolistli catli TOTECO quittitanlis ipan ni tlali, 23 huan quijtose: ‘Nochi ni tlali san quipyia azufre, istatl huan tlasoli catli tlatla. Amo tleno huelis quitocase huan amo tleno huelis quiyolitis, pampa niyon se xihuitl, amo huelis moscaltis ipan ni tlali. Eltoc quen huejcajya quema TOTECO quintzontlamilti altepeme Sodoma, Gomorra, Adma huan Zeboim catli quitlamisosolo ica ihueyi cualancayo.’”

24 “Huan teipa nochí tlaltipac ehuani tlatzintocase: ‘¿Quenque ya ni quichijqui DIOS ica ni tlali? ¿Quenque nimantzi cuylanqui?’

25 “Huan tlananquilise quej ni: ‘Ya ni eltoc pampa nopa israelitame quihuejcamajcajque nopa camanali catli ininTECO catli elqui ininDios ininhuejcapan tatahua quichijqui ica inijuanti quema quiniquixti ipan tlali Egipto. 26 Inijuanti yajque motlatlajtitoj huan motlancuaquetzatoj iniixtla tiotzitzli catli amo neli huan catli amo quiniximatiyayaj, niyon amo quipiyayayaj caquihuili para quinhueyichihuase. 27 Huan yeca nelía cuanqui ininDIOS ica ni tlali ehuani huan quichijqui ma huetzi ininpani nochí tlatelchihualme catli ijcuilijtoc ipan ni amatlapohuali. 28 Huan DIOS quiniquixti tlen ni tlali ica ihueyi cualancayo huan quinmajcajtoc ipan sequinoc tlalme quen eltoc hasta ama.’ Quej nopa quijtose sequinoc masehualme tlen anisraelitame.

29 “Onca sequin tlamantli ichtacatzí catli amo tijmatij pampa TOTECO amo technextilijtoc. Nopa tlamantli iaxca TOTECO toDIOS. Pero nopa tlamantli catli yaya technextilijtoc eltoc para tojuanti huan toconeuhua para nochipa ma tijchijtinemica nochí ni camanali catli quijtohua ni tlanahuatilme.

**Quenicatza sempa quiselise
tlatiochihualistli**

30 “Teipa amopani hualas nochí ni tlatiochihuali huan ni tlatelchihuali catli nimechpohuilijtoc ipan ni tonal huan catli nimechtalalijtoc para xijtlapejpenica. Huan anquinejnehuilise tlen ni tonal ipan nopa tlalme campa amoTECO Dios anmechtojtocas. 2 Huan sintla quema anquinejnehuilise, amojuanti huan amoixhuihua anmocuepase ica amoTECO Dios huan anquineltocase catli quijtohua quen nimechnahuatía ama ica nochí amoyolo huan ica nochí amoalma, 3 huajca amoTECO Dios quipatlas amonemilis huan sempa anmechtglasojtlas. Huan yaya anmechsanejcotilis sempa tlen nochí tlalme campa anmechsemantos. 4 Huan masque anmechsemantoc campa más huejca ipan iyecapa ni tlaltipactli, hasta nepa yas amechtemoti, huan tlen nepa yaya amechhualicas. 5 Huan teipa TOTECO Dios anmechhualicas sempa ipan ni tlali catli amohuejcapan tatahua moaxcatijque huan sempa anmoaxcatise amojuanti. Huan TOTECO quichihuas para quisas cualli amotequi huan amechmiyaquilis más huan amo quen amohuejcapan tatahua. 6 Huan yaya quitlalis nopa tlanextilijcayotl tlen nopa camanal sencahuali ipan amoyolo huan ipan ininyolo amoixhuihua. Anmechylpajpacas para xiquicnelica ica nochí amoyolo huan ica nochí amoalma, huan quej nopa nelnelía anquipiye se nemilistli.

7 “Huan amoTECO Dios quichihuas ma huetzi nochí ni tlatelchihualme ipan amo cualancaitacahua, huan ipan catli amechcocolíaj. 8 Huan amojuanti sempa anquineltocase catli quijtohua amoTECO Dios huan anquichihuase nochí itlanahua-

tilhua catli na nimechnahuatía ama. ⁹Huajca quena, TOTECO quichihuas ma quisá nelía cuali nochí tlamantli catli anquichihuase ica amomax. Huan nochí quisás cuali para amoconeňua, huan ininco-nehuá amotlapiyalhuá, huan momiyaqui-lis nopa pixquistli tlen amotlatoc. Quena, amoTECO Dios sempá paquis amohuaya huan sempá amechchihuilis catli cuali, quen achtihiuya paquiyaya huan quinchihuiliyaya catli cuali amohuejcapan tata-hua. ¹⁰Quej nopa elis sintla anquineltoca-se amoTECO Dios, huan anquichihuase nochí itlanahuatilhua catli ijculijtoc ipan ni amatlapohuali tlen itlanahuatilme, huan anmocuepase ica ya ica nochí amoyolo huan ica nochí amoalma.

¹¹“Ni itlanahuatili catli ama nimech-maca amo tlahuel ohui para anquichihuase, niyon amo ohui para anquimachilise. ¹²Ni itlanahuatilme amo eltoc nepa ilhui-cac para anquijtose: ‘¿Ajqueya huelis tlej-co-s nepa ilhuicac por tojuanti para ma techhualiquili, huan techchihuas ma tij-tlacaquilita itlanahuatilhua TOTECO huan quej nopa tijchihuase?’ ¹³Nojquiya ni itlanahuatilme amo mocahua ipan ne seyoc nali ne hueyi atl para anquijtose: ‘¿Ajqueya huelis quiixcotonas ne hueyi atl por tojuanti para ma techhualiquili itlanahuatil-hua TOTECO huan techchihuas ma tijtlaca-quilita huan tijchihuase?’ ¡Amo! ¹⁴Ni ca-manali catli huala tlen TOTECO eltoc tlahuel amonechca. Eltoc ipan amocamac para antlacamanalhuise huan eltoc ipan amotlalnamiquilis para huelis ammonejne-huilise catli quijtohua huan xijchihuaca.

¹⁵“Xiquitaca ama nijtlalijtoc amoixtla ipan se lado nemilistli huan catli cuali, huan ipan seyoc lado, miquilistli huan catli amo cui-ali, huan monequi xijtlapejpenica. ¹⁶Ama nimechnahuatía xiquicnelica amoTECO Dios huan xijtoquilita iojhui, huan xijchi-huaca nochí itlanahuatilhua huan ileyes. Sintla quej nopa anquichihuase, huajca an-itztose ica cuali huan anquinpiyase miyaqui amoconeňua, huan TOTECO Dios amech-tiochihuas ipan nopa tlali campa ancalaqui-se ama para amoxcatise. ¹⁷Pero sintla ipan amoyolo amohuejcatlalise tlen TO-

TECO huan amo anquineltoquilise nochí ni itlanahuatilme, huan sintla tiotzitzitl amech-cajcajahuase huan pehuas anquinhueyitla-lise huan anquintequipanose, ¹⁸ipan se tla-toctzi nimechilhuá anmiquise. Amo an-huejcahuase anitztose ipan nopa tlali catli ama anquixcotonase hueyatí Jordán para amoxcatitj.

¹⁹“Huajca ama ipan ni tonal niquinno-tza ilhuicactli huan tlaltipactli ma motes-tigoyerquetzaca para ama nijtlalijtoc amoix-tla nemilistli huan miquilistli, huan tlati-chihualistli huan tlatelchihualistli para xijtlapejpenica. Huajca xijtlapejpenica nemilistli para amojuanti huan amoixhuihua nelnelía anitztose. ²⁰Xijtlapejpenica xi-quicnelica amoTECO Dios huan xijnelto-quilita. Ximotemacaca ica ya pampa yaya amonemilis, huan yaya amechchihuas anitztose miyac xihuitl ipan nopa tlali catli TOTECO quintencahuili amohuejcapan tatahua, Abraham, Isaac huan Jacob para amechmacasquía.”

Josué catli quiselis itequi Moisés

(Nm. 27:12-23)

31 Huan na niMoisés sempá niquinca-manalhui nochí israelitame, huan niquinlhui:

²“Na nijpiya 120 xihuitl huan ayacmo nihueli nimechyacanas ipan tlahuilanca-yotl. Nojquiya TOTECO nechilhuijtoc para amo huelis nijpanos ni hueyatí Jordán. ³Pero amoTECO Dios amohuaya yas huan yaya amechyacanas anquixcotonase ni hueyatí. Yaya quintzontlamiltis nochí nopa masehualme amoixtla, huan amoxcatise inintla. Huan Josué elis amotlayacanca quen quijtojtoc TOTECO. ⁴Huan TOTECO quinchihuilis nochí nopa masehualme no-pona quen quichijqui ica Sehón huan Og, nopa itlanahuatianni tlen nopa amorreos catli quintzontlamilti huan moaxcati nochí inintla. ⁵Huan quema TOTECO quichihuas para nopa altepeme ma huettica amomaco, xi-quinchihuilita nochí catli nimechnahuatij-toc xijchihuaca. ⁶Ximoyoltetilica huan xi-moyolchicahuaca. Amo ximajmahuica, ni-yon amo xihuihuipicaca inixpa, pampa amoTECO Dios yaya catli yohui amohuaya

huan amo amecheahuas, niyon amo amechetlahuelcahuas.”

⁷Teipa nijnotzqui Josué huan iniixtla nochí israelitame niquilhui: “Ximoyoltetili huan ximoyolchicahua, pampa ta tiquinhucas ni masehualme ipan nopa tlali catli TOTECO quintencahuili ininhuejcapan tatahua para quinmacas. Huan elis ta catli tiquinmajmacas nopa tlali. ⁸TOTECO mitzyacantiyas ta huan mohuaya itztos. Amo mitzcahuas, niyon mitztlahuelcahuas, huajca amo ximomajmati, niyon amo ximotequipacho.”

Tlapojpolhuili para nochí tlahuquilistli

⁹Huajca Moisés quiijcuilo nochí ni tlana huatilme huan quinmactili nopa levita totajtzitzit catli quihiuicayabaj nopa caxa ica nopa camanal sencahualli huan niquinmactili nochí nopa huehue tlacame catli quipixque tequiticayotl ica israelitame. ¹⁰⁻¹¹Huan quinmacac ni tlana huatili, quinlhui: “Sesen chicome xihuital, monequi xijpohuaca ni tlana huatilme quema ajsis nopa xihuital quema nochí israelitame quintlapojpolhuise iniisraelita icnihua catli quintlahuiquilitaj. Xijpohuaca ipan nopa semana quema anquielnamiquise nopa ilhuitl quema mochihuaj Pilxajcaltzitzi, huan nochí ammosentilise iixtla TOTECO Dios ipan nopa lugar catli yaya quilaapejpenijtos.

¹²“Xiquinsansejcotilica nochí tlacame, sihuame, coneme huan sequinoc tlali ehuani catli itztose amohuaya ipan amoaltepehua para ma quicaquica quema anquipohuase ni ley huan quimatise huan quitlepanitase amoTECO Dios, huan ica miyac tlamocuitlahuili ma quichihuaca nochí catli quiijtohua nopa camanalipan ni tlana huatilme. ¹³Huan amocone hua catli aymo tleno quimatij tlen ni tlana huatilme, huelis quicaquise huan quiyecose quitlepanitase amoTECO Dios nochí tonali catli anitztose ipan nopa tlali catli anquipanose ni hueyatl Jordán huan ammoaxcatise.”

Itlayacapan tlana huatil TOTECO para Moisés

¹⁴Huan teipa TOTECO quilhui Moisés: “Xiquita, ya monechcahuía nopa hora para timquis. Huajca xijnotza Josué,

huan ximonextica tlen anome ipan nopa yoyon tiopamitl campa timopantíaj para niquiyocatlalís para nopa tequitl catli qui-chihuas.”

¹⁵Huajca Moisés huan Josué yajque ipan nopa yoyon tiopamitl campa mopantíaj ihuaya TOTECO, huan nopona monexti TOTECO ipan se mixtli catli motlali campa icaltempa nopa yoyon tiopamitl. ¹⁶Huan TOTECO quilhui Moisés:

“Ya nechca para timquis huan timosen-tilis ica motatahua. Huan ni israelitame nechcajtehuase huan quiixpanose nopa camanal sencahualli catli quichijque nohuaya. Quichihuase quen ahuilnenca sihuame catli momecatíaj ica sequinoc, pampa quinhue-yichiuhase tiotzitzit catli amo quiniximati catli onca ipan nopa tlali. ¹⁷Huajca teipa tlahuel nicualanis ica injuanti. Huan nopa tonal niquincahuas huan nimoicancuepas. Amo niquincaquis huan masehualme quin-tzontlamiltise. Quena, tlahuel miyac tlajiyohuilstli huan tlao huijcamayotl quinajsis hasta ica ohui quiijtose: ‘¿Huelis nochí tlajiyohuilstli techajsi pampa Toteco Dios ayacmo tohuaya itztoc?’ ¹⁸Huan nelnelía nimoicancuepas ica injuanti ipan nopa tonali por nochí catli amo cuali quichijtose huan por quinhueyichijtose tiotzitzit, huan yeca amo nimocuatotonis por injuanti.”

¹⁹Huan ama TOTECO quiijto: “Xiqui-cuilocá ni huicatl huan xiquinmachtica nopa israelitame para ma huicaca huan elis quen se testigo ica injuanti catli quin-nextilis para amo cuali ma nechcajtehuaca. ²⁰Pampa na nijchijtos para ma cala-quica ipan nopa tlali catli niquintencahuilli ininhuejcapan tatahua. Elis se tlali campa nochí quipiya hasta onmocahua. Huan tlacuajtose huan ixhuitose huan moricoj-chijtose, pero teipa yase ica tiotzitzit. Quena, nechcahuase huan quinhueyichiuhase tiotzitzit huan quintequipanose. Ayacmo nechnequise huan quiixpanose nopa camanal sencahualli catli nijchijqui ininhua-ya. ²¹Pero teipa quema quinajsis miyac tlamantli tlajiyohuili, huajca ni huicatl elis quen se testigo catli quintelhuúa huan quinpo huijis catli fiero quichijtoque. Huan iniixhuihua quielnamiquise ni hui-

catl huan huicase. Ama quema ayamo ni-quincahuilá ma calaquica ipan nopa tlali catli niquintencahuili, ya cuali nijmati canque onajsis inintlanejnehuilis.”

22 Huajca ipan nopa tonal Moisés quiij-cuilo ni huicatl huan quichijqui nochí israelitame ma quitzontecotlalica. 23 Huan TOTECO quitequimacac Josué, icone Nun, huan quiilhui:

“Ximoyoltetili huan ximoyolchicahua pampa elis ta catli tiquinhuicas ni israelitame hasta nopa tlali catli nimechtenca-huiljtoc huan na niitztos mohuaya.”

24 Quema Moisés tlanqui quiijcuilohua nochí nopa camanal tlen nopa tlanahua-tilme ipan se amatlapohuali, 25 quincama-nalhui nopa levita totajtzitzí catli quipix-que nopa tequitl para quihicase nopa ca-xa ica nopa camanal sencahualli tlen TOTECO, huan quinilhui:

26 “Xijhuicaca ni amatlapohuali ica itlanahuatilhua TOTECO, huan xijtlalica inacastla nopa caxa catli quihuica nopa camanal sencahualli catli quichijqui TOTECO Dios para nopona ma elto quen se testigo catli quiita catli anquichihuaj.

27 “Na nijmati tlahuel anmotlepanitaj huan antzontochontique. Ipan nochí ni tonali quema ninejnentoc amohuaya, anmotzontochonchijtoque ica TOTECO, huan nij-mati para noja más anmotzontochonchi-huase ica ya quema ya nimictos. 28 Huajca ma monechcahuica campa na nochí huehue tlacame huan nopa tlayacanquetl tlen sesen hueyi familia para niquinlhuis ni tlamantli huan niquintestigojquetzas ilhuicactli huan tlaltipactli ica injuanti. 29 Nijmati quema nimquis anmotzontochonchihuase huan anquicahuase nopa ojtlí catli nimechnahua-tijtoc xijtoquilica. Huan teipa ipan nopa tlayacapan tonali amopani huetzis catli tlahuell fiero, pampa anquichihuase catli amo cuali iixpa TOTECO huan anquicualanise TOTECO por nopa tiotzitzí catli anmochihuile-se.” Quej nopa Moisés quinilhui nopa levitame.

Nopa huicatl catli quisencajqui Moisés

30 Huajca Moisés quipojqui ni huicatl tlen ipejya hasta itlamíya iniixtla nochí is-

raelitame catli mosentilijtoyaj nopona, quinilhui:

32 “Nochí ipan ilhuicactli huan tlaltipactli ma quitlacaquilica catli na niquijtos.

2 Xijselica notlamachtíl quen anquise-líaj atl quema tlaquiyahui.

Quen ajhuachtli nochí quitzacua huan pitzajatl quiapachohua xihuime huan sacatl, san nocamanal xijmatica.

3 Na nitlayolmelahua itoca TOTECO. Niteilhuía quenicatza onpano ihueyiti-lis Toteco Dios.

4 Yaya catli techmanahuía.

Nochi itequi eltoc cuali.

Xitlahuac nochí catli quichihua.

Yaya nopa Toteco Dios catli temachtli.

Amo quema quichihua catli amo ijqui.

Yaya quichihua catli melahuac huan cuajcualtzi.

5 Pero nopa israelitame amo quichijto-que catli cuali.

Amo quinamiqui elise iconehua pam-pa motzontochonchijtoque ica ya.

6 ¿Quej nopa anquitlaxtlahuíaj TOTECO, anisraelitame?

Antzontochontique huan anhuihuime.

¿Amo yaya amotata catli anmechtla-catilti?

Yaya anmechchijtoc huan anmechma-catoc nemilistli.

7 Xiquelnamiquica nopa tonali huejcay-ya huan quenicatza panotihuila-jque amohuejcapán tatahua.

Xiquintlatzintoquili amotatahua huan nopa huehue tlacame ma anmechpohuilica.

8 Oncac se tonal huejcayja quema Toteco Catli Más Hueyi quinmaj-macac nochí xinach masehual-me sesen tlali campa itztosquíaj.

Yaya quiquetzqui miyac nepamitl campa hueli para tlatlajco ma onca tlalme ica ininmasehual-hua quen ininmiyaca israelita-me.

9 Pampa tiisraelitame tiimasehualhua TOTECO.

- Tiiaxcahua catli yaya teipa quiselis
quen se quiselía se tlenijqui ca-
tli se tetaj quimacatehua icone.
- 10** TOTECO techpanti tiisraelitame huan
tohuejcapan tatahua ipan nopa
huactoc tlali,
campa nopa ajacatl quihuijhuitectoc
chicahuac huan campa amo tle-
no onca.
- Techmanahui, huan techmachi huan
techmocuitlahui cuali quen ti-
eliyayaj tiixiteyol sitlal.
- 11** Techchihuili quen se cuajtl moeltla-
palpapatlatza ipan itepasol huan
quinnotza ipilconeheua ma patla-
nica.
- Huan quema quiita iconehua siyahuij
patlantinemij, quipajpatlahua iel-
tlapal para ieltlapaltipa ma hue-
tzica huan quinhuicas campa te-
peixco hasta campa itepasol.
Quej nopa techmocuitlahujtoc TOTECO.
- 12** Yaya TOTECO iseli techyacantoc huan
amo aqui más.
Amo quipixqui niyon se tiotzi catli
quipalehui.
- 13** TOTECO quichijqui ma titlatlanica.
Techtlamacac tiisraelitame ica nopa
cuatljacayotl catli más cuali on-
ca ipan mili.
Ipan tepeixco quiqxiti nectli huan
techmacac ma tijcuaca huan
ipan sequinoc teme catli tetic
techquixtili aceite.
- 14** Techtlamacac ica mantequilla huan
lechi tlen inintlapiyalhua.
Tijcuajque ininnacayo nopa pilborre-
gojitzitz catli más yejectzitz.
TOTECO techtlamacac ica oquich bo-
rregojme huan oquich chivojme
catli achi cuali catli oncayayaj
ipan tlali Basán.
- Techmacac nopa trigo catli más cuaj-
cualtzi,
huan tiquijke catli más cuajcualtzi
xocomeca atl.
- 15** Pero tiisraelitame pejqui tineltlacuaj,
huan pejqui más timochihuaj tihuej-
hueyij hasta tlahuel tielque tito-
mahuaca.
- Huan tijtlahuelcajque Toteco Dios ca-
tli techchijchijqui.
Tijhuejcamajcajque nopa hueyi tetl
catli techmanahuijtoya,
huan amo tijnequiyayaj yaya catli to-
temaquixtijca.
- 16** Huan tiisraelitame tijpejpehualtijque
huan tijcualanijque TOTECO
Dios,
pampa tiquinhueyichijque tiotzitz catli
fierojtiqe.
- 17** Tiisraelitame tiquinmactilijque tlacaj-
cahualistli ajacame tlen Amo-
cualtlacatl,
quema titlatencahuayayaj iniixpa no-
pa tiotzitz catli amo ya Toteco
Dios,
huan amo quema tiquinximajtoyaj.
Inijuanti eliyaya tiotzitz catli yancui-
que,
catli sanoc onajsicoj huan catli totata-
hua amo quintlepanitayayaj.
- 18** Israelitame, anquielcajtoque amo Tata
huan amo Tlamanahuijca. An-
quielcajque Toteco Dios catli
techmacatoc nemilstli.
- 19** Huan TOTECO quitac catli tijchihua-
yayaj huan tlahuel tohuaya cu-
lanqui.
Tojuanti catli tiiquoquichpilhua huan ti-
sihuapilhua tijchihuilijque ma
techcualancaita.
- 20** Huan teipa TOTECO quijto: ‘Na noj-
quiya nimoicancuepas ica ini-
juanti,
huan niquitas hasta canque tlamis
ininmosisinijcayo.
Nelnelia inijuanti amo cuajcualme.
Itztoque quen coneme catli amo aqui
huelis ininpan motemachis.
- 21** Nechchijque ma niquintlasomati pam-
pa quinhueyichijque tiotzitz
huan tlaixcopincayome catli
amo ya Toteco Dios.
Nechpejpehualtijque ica ininteteyo-
hua. Huajca na nojquiya niquin-
chihuas ma nechtlasomatica
pampa niquinpalehuis mase-
hualme catli amo ya nomase-
hualhua.

- Huan niquinpejpehualtis nopa israelitame ica masehualme catli amo quinitaj sintla quipiyaj ininpati.
- 22 Nocualancayo tlejcos quen se tlilti, huan lemenis hasta ajsis campa más huejcatla ipan mictla. Quitlamilatis noch i tlaltipactli huan itlajca.
- Hasta campa pehua tepeme quitlatis ne tlilti.
- 23 Nielis quen se catli quinmajcahuilis cuatlamintli, pampa nijtitlanis ipan injuanti noch i catli amo cuali.
- 24 Coccoxquetiyase ica mayantli huan mi quise ica tlatotonilotl. Se fiero cocolistli quintzontlamiltis. Ni quintitlanilis tecuanime catli mosi siníaj huan cohuame catli tlahuel pajyoque catli mohuahuatatzaj tlalchi.
- 25 Ipan calles huetzise inincone hua mic toque ica machete, huan ipan calijtic oncas majmajtl. Telpocame huan ichpocame mi quise, huehuentzitzi huan coneme catli noja chichij nojquiya.
- 26 Na niquijto para niquinsemanas huan ni quintlamix polos ipan tlaltipactli hasta amo aqui quinelnamiquis.
- 27 Pero amo niquijiyohuisquía quema nechpaquitasquía nocualancaitacahua. Amo nijnuequi ma mohueyimatica ini juanti catli nechcocolíaj huan quiijtose: Amo elqui ininDIOS catli quintlamilti nopa israelitame. Tojuanti tosel tzitzti tijchijque ica tochicahualis.
- Quej nopa quiijtojtosquíaj amocualancaitacahua.
- 28 Pero anisraelitame anquipolojtoque tlalnamiquilistli, huan anhuihuitique. ¡Amo tleno anquimachilíaj!
- 29 Sintla elisquíaj antlamatini anquimachilisquíaj huan anquimatisquíaj canque antlamitij.
- 30 Pampa ¿queniquicatza elqui para se amocualancaitaca iseli huelqui anmechtojtocac se mil anisraelitame? Huan ¿queniquicatza elqui para ica ome anmechtojtocaque 10 mil? Ya ni elqui pampa niamotECO, catli niamotlamahuijca, nimechtemactili ininmaco amocualancaitacahua.
- 31 Inintlamahuijca amocualancaitaca hua amo hueli ihuaya motlalis totlamanahuijca tojuanti.
- 32 Pero anisraelitame anitztoque quen xocomeca tzontli catli amo cualli. Anitztoque quen masehualme tlen altepeme Sodoma huan Gomorra huejcajya.
- Huan nopa xocomeca atl catli anquiyoliltíaj quipiya ipajyo huan tlahuel chichic.
- 33 Amoxocomeca atl eltoc quen nopa inintencococa cohuame catli temictíaj quen mahuaquijme.
- 34 Nicajocnihuala miyac tlamantli fiero para ica nimechtlatzacultis. Quena, nicajoc toc tlatzacultilistli quen elisquía miyac tomi.
- 35 Nochi nicajoc toc para nopa tonal quemita tlacuepilis huan nimechmacas anisraelitame. Pampa amo huejcahuas para ajsis nopa tlatocdzi quema anhuetzise. Ya eltoc nechca nopa tonal quema ni mechtzontlamiltis. Ya anmechnechcahuía amohora.'
- 36 TOTECO quistehuas huan quintlajtol sencahuas imasehualhua quemai quitas ayacmo quipiyaj fuerza. TOTECO quintlasojtlas itequipanojcha huan quinchihuas ma moyolcuepaca ica ya quema quiitas noch i quincajtejtoque huan amo aqui quinpalehuía.
- 37 Huan TOTECO quinilhuis: '¿Canque itztoque amotiotzitzi, nopa tlamanahuijani catli ipan anmotemachiyayaj?

- 38** ¿Canque itztoque catli quicuayayaj
ichiyajca amotlacajcahuialis,
huan quiijiyayaj nopa xocomeca atl
catli anquinmactiliyayaj?
Ma motlananaca para ma anmechpa-
lehuiquij.
Ma hualaca huan ma anmechmana-
huiquij, pero amo hueli.
- 39** San na niyojtzí niDIOS,
huan iyoca tlen na amo aqui seyoc.
Na nitemaca nemilistli huan nitequix-
tilia.
Na nitecocohua huan na nittepajtía.
¡Amo aqui huelis momanahuis tlen na
nomaco!
- 40** Nijtlanana nomax para ilhuicac huan
nitlatestigoquetza.
Niquijtohua: Nelía melahuac,
- 41** huan temachtli nijtentis nomachete
catli cahuani huan nipehuas ni-
tetlajtolsencahuas,
huan nimomacuepas ica nocualanca-
itacahua.
- ¡Niquinmacas catli quinamiqui catli
amo quinequij nechitase!
- 42** Nochi nocuatlaminhua nijchihuas xo-
lontoc ica inieso.
Huan ica nomachete niquintzontlamil-
tis nochí injuanti.
- ¡Quena, ipan nomachete oncas inieso
catli niquinmijmictijtoc huan
catli niquinitzquitoc!
- ¡Nojquiya quipiyas inieso inintlaya-
canchua nocualancaitacahua
catli quipiyaj inintzoncal hue-
hueyac!
- 43** ¡Ximoyolpaquiltica, nochí anmase-
hualme ipan tlaltipactli ininhu-
ya imasehualhua TOTECO Dios!
Yaya momacuepas ica catli quinmictij-
que itequipanojcahua.
- Quena, quincuepilis icualancaitacahua.
Quipajpacas itlal huan imasehualhua.”
- Itlayacapan tlanahtuilhua
catli quinmacac Moisés**
- 44** Huan Moisés ihuaya Josué, icono
Nun, monextijque iniixtla nochí israelita-
me, **45** huan Moisés quinpohuili ni huicatl
tlen ipejya hasta itlamiya.

46 Teipa quinilhui nopa israelitame:
“Ximonejnehuilica cuali ipan nochí ni
tlamantli catli ama na nimechmachiltía,
huan xiquinnahuatica amoconeuhua ma
quichihuaca nochí catli quiijtohua ni tla-
nahuatilme. **47** Pampa ya ni amo ya se tla-
mantli catli amojuanti huelis san anqui-
ahuilmatisé. Ni tlanahtuilme eltoque ne-
milstli para amojuanti. Huan sintla an-
quineltocase ni tlanahtuilme, anhuejca-
huase para anitztose ipan nopa cuali tlali
catli ama anquipanose ni hueyatí Jordán
huan amoaxcatise.”

**Totecó quicahuili Moisés ma quiita nopa
cuali tlali**

48 Ipan nopa tonal TOTECO quicama-
nalhui Moisés huan quilhui:

49 “Xiya ipan nopa tepeme Abarim
huan xitlejco hasta nopa tepetl Nebo ca-
tli eltoc ipan inintlá moabitame iixme-
lac altepetl Jericó ipan seyoc nali ne
hueyatí. Huan tlen nopona xijtlachili no-
pa tlali Canaán catli niquinmacas ma
moaxcatica ni israelitame. **50** Huan teipa
timquis ipan nopa tepetl catli ipan ti-
tlejos, huan timosanejcotilis ininhu-
ya moteiximatcahua. Timquis quen mo-
icni Aarón catli mijqui ipan tepetl Hor
huan mosanejcotili ica iteiximatcahua.

51 Anome, ta huan Aarón, amo anmote-
machijque ipan na iniixtla nopa israeli-
tame quema anitztoyaj campa nopa
atlajtli Meriba nechca Cades ipan nopa
huactoc tlali Zin. Huan amo antechhue-
yichijque iniixtla. **52** Huajca san ica huej-
ca huelis tijtlachilis nopa tlali catli ni-
quinmactilis ni israelitame, pero amo
huelis ticalaquis ipan nopa tlali.”

Moisés quintiochijqui nochí israelitame

33 Quema polihuiyaya quentzi para
miquis Moisés, itequipanojca To-
teco Dios, yaya quintiochijqui nochí nopa
israelitame ica ni camanali. **2** Quiijo:

“Quema monexti TOTECO, itlatlanex
hualajqui tlen campa hueli.
Hualajqui tlen tepetl Sinaí, tlen Seir
huan tlen nopa tepeme ipan Pa-
rán.

Hualajqui tlen ilhuicac campa quiyahualojtoyaj majtlactli mil itequihuajcahua.

Yaya hualajqui techhualiquili nopa tlanaahuatilme catli elqui quen se tltil catli toponi catli quihui-cayaya ipan inejmac.

3 TOTECO nelía techicnelía tiimasehual-hua, huan techpiya nochti titlatzetzelotijca masehualhua imaco.

Tojuanti tijtoquiláj.

Tijtlalíajトイエヒウア campa pano iicxi-hua.

Huan tijtlacaquiláj huan nimantzi tiyohuuj campa yaya techtitla-ni.

4 TOTECO techmacac itlanahuatilhua ica na, ya nopa catli más ipati catli tiisrael-itame tijpiyaj.

5 TOTECO mochijqui totlanahuatijca tiisraelitame quema nochti tlayacanani huan nochti ixhuime tlen nochti huejhueyi israelita familias timosentilijque.”

6 Huan Moisés quiijo tlen nopa hueyi familia tlen iixhuihua Rubén:
“¡Ma itzto nopa familia tlen iixhuihua Rubén!

Ma amo miquica, ma amo tlamicá, masque Rubén amo quinpiya miyaqui iteipan ixhuihua catli hualahuuj ica ya ieso.”

7 Huan tlen nopa hueyi familia Judá, Moisés quiijo:

“TOTECO, xijtlacaquili inintoscac iix-huihua Judá catli techyacanaj ipan tlahuilancayotl.

Xijchihua ma mocuepacá ica cuali huan sempa mosansejcotiliquip tohuaya.

Xiquinmanahui ica mohueyi chicahua-lis.

Xiquinpalehui ica inincualancaitaca-hua.”

8 Huan Moisés quiijo tlen iixhuihua Leví:

“TOTECO, nopa levitame catli mitz-te-quipanohuaj ica temachatlí,

ta tiquinmacatoc nopa Tumim huan Urim, nopa dados catli tlatzej-

tzelotic, para huelis quimatise mopaquilis.

Tijyejyeco ininhuejcapan tata campa nopa atl Meriba campa nochti israelitame quinajnanzuiliyayaj. Tijchijqui para iixhuihua mitztequipa-nose xitlahuac.

9 TOTECO, nopa levitame inijuanti catli más mitzneltoquiláj mocama-nal.

Más itztoque temachatlí ica ta, hasta quinitaque inintatahua, ininna-nhua huan iniicnihua, quen amo quiniximatiyayaj para quitlamichihuase mocamanal.

10 Inijuanti techmachtíaj tiisraelitame nochti motlanahuatilhua.

Quitlalíaj copali ipan motlaixpa moix-tla,
huan tlapiyalme mitzmacaj ipan motlaixpa quen tlacajehualistli tlatlatili.

11 Xiquintiochihua levitame, TOTECO, huan ica paquili xijseli nochti ininte-qui.

Xiquinquixtili ininchicahualis nochti inincualancaitacahua para ayaco ma motlananaca.”

12 Tlen nopa familia Benjamín Moisés quiijo:

“TOTECO tlahuel quinicnelía iixhuihua Benjamín, huan inijuanti itztoque ica temachili ipan imax.

Nochipa yaya quinmocuitlahuía huan quinmanahuía.”

13 Tlen iixhuihua José, Moisés quiijo: “Ma TOTECO quitiochihua inintal iix-huihua José.

Ma quiselica nopa atl catli más cuali tlen ilhuicac.

Ma meya nopona nopa atl catli eltoc más tlahuejcatla tlen ni tlalti-pactli.

14 Inintal ma temaca catli más cuaj-cuali pixquistli catli ya icsic campa cuali tona huan cuali metztona.

15 Iixhuihua José para nochipa ma quiselica itlajca catli más cuali temaca nopa tepeme huan tlachiquilme catli huejca.

16 Ma quiselica nopa cuatlactli catli más cuajcuali onca ipan tlaltipactli. Quena, miyac catli cuali ma quiselica hasta onmocahuas. Huan ma quinita ica cuali TOTECO catli monexti nohuaya ipan nopa xihui tzontli catli tlatlayaya. Nochi ni tlatiochihualli ma huala ipan iixhuihua José, yaya catli quinnahuatiyaya iicnihua huejcajya.

17 Iixhuihua Efraín, icono José, elij nelía huejhueyi quen iachtihui cone se toro. Iixhuihua quipiyase chicahualistli quen icuacua se toro. Elise tetique quen se búfalo catli aymo aqui quimaxojtilijtoc. Nopa miyaqui miles tlen ininsoldados iixhuihua Efraín, huan nopa miyaqui miles tlen iixhuihua Manasés quincuacuajhuese nochi tlamantli masehualme hasta campa más huejca tlalme ipan ni tlaltipactli, huan quintlanise nochime ica san se huelta.”

18 Tlen iixhuihua nopa huejhueyi familias tlen Zabulón huan Isacar Moisés quiijo: “Xiyolpaquica aniixhuihua Zabulón huan Isacar quema anpanquistinemij campa hueli tlali ipan amotequi, huan quema anmocuepaj ipan amoyoyoncalhua para anmosiyajquetzase. Nochi amotequi ma quisa cuali.

19 Anquinnotzase sequinoc masehualme ma yaca campa tepetl, huan nopona antemacase para TOTECO nopa tlacajcahualistli tlen tlascamatili catli más cuajcualti. Anquitlanise tomi ica nochí iricojoyo catli onca ipan hueyi atl, huan nochí catli ipati catli motlatijtoc ipan xali iteno hueyi atl.”

20 Tlen iixhuihua nopa hueyi familia Gad Moisés quiijo: “Ma tijhueyichihuaca TOTECO catli quinmacac huejhueyi tlali iixhuihua Gad. Iixhuihua Gad mosohuaj huan tlachiyaj cuali, quen se sihua tecuani catli quichiya para ipan huitonis se para quicotonilis imax huan itzonteco.

21 Gad motlapejpenili huan mocahui catli más cuali tlali. Quiselijque achi miyac quen catli quinamiqui tlayacanani. Yaya ihuaya imasehualhua yajque quen tlayacanani tlen israelita-me para tlahuilanatij. Inijuanti quichihuase nochí catli xitlahuac catli TOTECO quinnahuatijtoya ma quichihuaca.”

22 Tlen iixhuihua Dan Moisés quiijo: “Iixhuihua Dan itztoque quen iconese tecuani catli quisa campa motlatijtoc ipan ojtlí ipan Basán, huan huitoni ininpan catli quinonpanoj para quincocos.”

23 Tlen iixhuihua Neftalí Moisés quiijo: “TOTECO anmechcualita aniixhuihua Neftalí, huan nelmiyac itladiochihual anquiselijtoque. Ximoaxcatica nopa hueyi atl campa temo tonati, huan nopa tlali Neguev ica tlani.”

24 Tlen iixhuihua Aser Moisés quiijo: “TOTECO más ma quintiochihua iixhuihua Aser que nochí sequinoc iconehua Israel. Nojquiya iniicnihua quinicnelise. Ma quixolonica iniicxihua ipan aceite pampa nochí quipiyaj hasta onmocahua.”

25 Huan nochí inincuapuertas quipiyase hierro huan bronce para ica motzacuase para nochí catli quipiyaj mocahuas temachtli. Huan ininchicahualis huejahuas para nochí inninemilis.”

- 26 Amo aqui seyoc quen Toteco toDios tiisraelitame.
 Yaya nopa tlanahuatijquetl catli más hueyi catli nejnentinemí ipan il-huicac ica nochí iyejyeja.
 Yaya nimantzi huala tlen ilhuicac techpalehuiqui.
- 27 Toteco Dios catli nochipa itztoya huan nochipa itztos, yaya catli ipan timotemachíaj.
 Imaco timocahuaj nica ipan tlaltipac-tli huan ichicahualis catli amo quema tlamis techmapalehuúa.
 Yaya quintojtocas amoixtla icualanca-itacahua huan anmech nahuatis xiquintzontlamiltica.
- 28 Huajca israelitame nochipa itztose ica temachili.
 Quena, iixhuihua Israel nochipa yol-paquisé.
 Anitzose ipan amotlal ica miyac trigo huan xocomeca atl.
 Huan tlaquiyahuis cuali quema mone-quí.
- 29 Tlahuel antlatiochihualme anisraelita-me.
 Amo aquime sequinoc masehualme quen amojuanti catli anmech-maquixtijtoc TOTECO.
 Yaya catli anmech manahuúa huan anmechpalehuúa.
 Yaya quen amomachete catli ica antlatanise.
 Por ya nochí amocualanca itacahua motlancuaquetzase amoixtla, huan ininpan anmoquetzase.”

Imiquilis Moisés huan campa motojqui
34 Huajca Moisés quisqui tlen nopa huactoc tlali Moab huan tlejcoc ipan nopa tepeme catli itoca Nebo. Yajqui hasta iixco nopa tepetl Pisga catli eltoc iixmelac altepetl Jericó. Huan tlen nopo-na TOTECO quinextili nochí tlali tlatenca-huali tlen Galaad hasta Dan, ² huan nochí nopa tlali Neftalí, Efraín huan Manasés

huan nochí tlali Judá hasta nopa Hueyi Atl Mediterráneo. ³ Huan quinextili nopa tlali Neguev, huan nopa tlamayamitl tlen Jericó, nopa altepetl tlen palmeras huan quinextili hasta Zoar. ⁴ Huan TOTECO qui-ilhui:

“Ya ni nopa tlali catli nijtencahuili Abraham, Isaac huan Jacob para niquim-macasquía iniixhuihua. Ama nimitzcahui-litoc para ica moixteyol xiquita, masque amo huelis ticalaquis ipan ne tlali.”

⁵ Huan quej nopa Moisés, itequipanожca TOTECO, mijqui ipan nopa tlali Moab quen TOTECO quiilhuijtoya. ⁶ Huan TOTECO quitojqui ipan se tlamayamitl ipan tlali Moab, iixmelac Bet Peor, ipan se lu-gar catli hasta ama amo aqui quimati. ⁷ Huan masque quipiyayaya 120 xihuítl quema mijqui, cuali tlachiyayaya huan noja eliyaya nelteletic itlacayo.

⁸ Huan nopa israelitame quichoquilique Moisés para 30 tonali ipan nopa huac-toe tlali tlen Moab quen momajtoyaj qui-chihuj. Huan teipa tlanqui nopa tonali tlen choquistli.

⁹ Huan Josué, icone Nun, quiseli tlahuel miyac tlalnamiquili quema Moisés quitlali imax ipan ya. Huajca nopa israelitame quitepanitaque Josué huan quito-quilique icamanal para quichihuase nochí catli TOTECO quinahuatijtoya Moisés ma quichihuaca.

¹⁰ Pero ayacmo quema oncac seyoc tlajtol pannextijquetl ipan israelitame quen Moisés catli moixtlachiliyaya ihuaya TOTECO quema ihuaya camanaltiyaya. ¹¹ Huan pampa quej nopa moiximatiyaya ica TOTECO, huelqui quichihua huejhueyi tlanextilicayotl huan tetzatl catli TOTECO quitiitlanqui ma quichihua ipan tlali Egip-to iixtla Faraón, huan iniixtla itlapalehui-cahua huan nochí sequinoc catli itztoyaj ipan itlal. ¹² Huan ica Moisés TOTECO qui-chijqui huejhueyi tlamantli iniiexpa israelitame catli quinmajmati. Quinnextili que-nicatza ihueyi chicahualis TOTECO.